





20291. V. Fg







CALENDAR-
RIUM NOVUM
AD
BENE MORIEN-
DUM PERQUAM
UTILE.


*Excellentissimis Re-
verendissimis Illustrissimis
Perillustribus Prænobilibus Nobilibus
DD. sub titulo*

BEATISSIMÆ
VIRGINIS

MARIÆ
IN COELOS
ASSUMTÆ,

Sodalibus in Xenium
oblatum Labaci.

LABACI, Typis Joan. Georgij Mayr.



030038989



PRÆFATIO AD LECTOREM.

Perfrequens tibi est, pro negotijs disponendis Calendarium consulere; ut scias, quis qualisve dies sit, an Cælum faveat, &c. Negotium habes omnium negotiorum MORI, è quo felix, vel infelix pendet æternitas. Huic disponendo, ecce Calendarium novum! in hoc enim negotio vel maximè necesse est observes, quali moriaris die, fasto; an nefasto, & an cælum faveat. Mori quidem naturæ est; sed artis est, bene mori. Hanc ut discas, dies singulos observa: nam ars bene moriendi hoc uno traditur præcepto: Ad mortem te bene præpara. Ut autem ad incertam diem bene sis paratus, fac

PRÆFATIO.

omni die sis paratus. Pro quo Calendarium hoc consule: in eo uti reperies, nullam esse diem, quã mori non possis; ita nullam esse, quã mori non possis bene. Dies hic nefastus, nullus est, nisi quem tu ipse feceris morte infelici (& tuã quidem culpã) nefastum. In Calendarijs cæteris sæpe non favet cælum negotijs bene conficiendis; ast in novo hoc Calendario semper favet. Sidus quotidie propitium oritur; quo si utaris, quod optas, facile consequeris: hoc est: assignatur quotidie è Divis aliquis, quem si imiteris, si colas, si invoces, non decrit morienti. Quid enim est ad mortem se bene præparate, quã bene vivere? Quomodo autem melius vives, quã si vestigijs, quibus Sancti ad bene moriendum abiêrunt, insistas? si devoto eos cultu amicos tibi facias? si roges, ut Patroni assistant? Quã laboras, ut spirituales tibi Patrem eligas & concilies, qui in agone te languentem excitet, luctantem erigat; & si nactus es virum

fer-

PRÆFATIO.

ferventem, pium facilem, promptum, industrium, & negotij tam ardui expertum, magnam felicitatis parem te affecutū opinaris. Laudo, non improbo. Sed quantò felicior eris, si habueris è Cœlitibus, qui tibi, assistat morienti! quem millenos inter reperias pium, facilem, promptum, ferventem, industrium magis, quàm qui, quòd ardentissimo Divini Amoris Oceano totus est immersus, & vult opitulari, & quod vult, potest? imò, quòd maximum est, quem reperias negotij tam ardui magis expertum, quàm qui experientia didicit propria, quàm sit periculosum mori, & tot inter insidias, bene mori? Ejusmodi non unum, sed plurimos Calendarium hoc proponit, quos tibi concilies. Et ne causeris temporis angustias, quæ longiores meditationes & preces sæpe non permittunt, è sancti alicujus diei cujusvis gestis aliquid excerpfi, & commendationem ad ipsum Divum cum contritione adjunxi. Manè, priusquam

PRÆFATIO.

quam ad alia te negotia conferas, pro negotio omnium maximè agendo inspice Calendarium, & quod illius diei Sanctum fecisse leges, imitari per diem serio propone: deinde toto cordis affectu Sanctum ipsum pro felici morte Patronum roga. Idem sub finem sacri, cui interes, & sæpius per diem, & priusquam vesperi decumbas, præstare, non erit perniciosum. Et, ne dubita, sic bene ad mortem te præparabis.

Tantillam rem, an facere gravaberis pro tua salute? non spero: scio enim, quàm velis bene mori. Age igitur, salutis tuæ cupidus, Calendarium hoc tibi familiare, & utile redde, & DEUM pro me ora.

N. N.

Omnia & singula de Sanctis in hoc libello dicta intelligo, & intelligi volo juxta Decretum URBANI VIII.

5. Junij, 1631.

JANUA.



JANUARIUS.

I. JAN.

JESUS octavo à Nativitate die circumcisus sanguinem copiosè fudit. O quantos sanguinis imbres vita vespera dabit, si aurora ejus cruore tam multo rubet! Tua scelera, ô Homo! culter erant (verè faxeus) qui JESUM infantem sic faucia vit.

OJESU, Fili MARIÆ, annorum vitæ meæ, & totius æternitatis sanctissimum centrum, da pro novo anno te ipsum mihi, & me tibi, ut ita Nomini tuo serviat annus hic meus, omnes anni mei, menses, hebdomadæ, dies, horæ, minuta, & momenta vitæ & mortis meæ, ut singula tua sint, & omnia tuis meritis unita influant in Divinum Oceanum sacrosanctæ æternitatis tuæ, ut felici morte annos tempo-

A

ris

2 JANUARIUS.

ris mei concludam, & simul inchoem, nunquam finiendos annos illius gloriæ, ad quam me creâsti, utque illam haberem, factus es JESUS, Amen.

Hoc idem mihi impetrate omnes Sancti, quos felici morte defunctos hodie felici æternitate donavit DEUS.

Omnes Sancti mei nominis, & meæ patriæ, ac Patroni mei menstrui omnes.

Omnes Sancti, quibus sacra est illa, quæ mihi nascenti prima fuit dies.

Omnes Sancti, quibus sacra est illa, quæ mihi morienti ultima erit dies.

Omnes Sancti, & Sanctæ DEI, tūque O MARIA Mater agonizantium, ora pro me, & omnibus hodie nascentibus, & hodie agonizantibus. Impetrate mihi à Crucifixo JESU felicem mortem, & beatam æter-

JANUARIUS.

3

æternitatem, Amen. Credo, spero, amo, adoro te, pulcherrime ac optime super omnia DEUS meus! & ideo doleo, ac desidero plus dolere & confiteri. Doleo super omnia, quòd te tam ingratus offenderim. DEUS meus & omnia. In gratiarum actionem, & satisfactionem, offero tibi hujus diei & vitæ meæ totius actiones, atque momenta singula.

Nota, hæc clausula quotidie repetitur.

2. JAN.

S. Macarius plenus sanctarum lacrymarum senex, & semper ad DEUM vigil, ad seipsum inquebat: Anime mi, ne te in terras è cœlo demitte; ibi DEUM, & cum DEO DEI aulam omnem habes. Toto septennio cocti nihil in cibum admisit, quadragesimam sine cibo, viginti dies sine somno transegit. Pro castitate sex menses nudum se culi-

4 JANUARIUS.

cum aculeis exposuit. Centenarius denique obiit. Vis diu tibi, & DEO vivere? corpori parum indulge.

S. Macari, per lacrymas, per jejunia, per puritatem, ac preces tuas omnes, rogo, doce me animum nunquam è cœlo demittere, ut tandem beatâ morte animam meam è terris in cœlum emittam, ibi DEUM, & cum DEO DEI omnem aulam habiturus. Hoc idem mihi impetrate omnes Sancti &c. ut suprâ pag. 2.

3. JAN.

S. Genovæ quòd templâ frequentaret, mater alapam, matri cæcitatem inflixit DEUS: quam pia filia sustulit. Per hebdomadam non nisi bis cibum, vinû virginitatis venenum nunquam admisit. Hinc cœlum quoties aspexit, illa lachrymis, hoc gaudijs fluere est visum.

Sancta Virgo ora pro me, ut illuminet cæcitatæ meæ tenebras
JESUS:

JANUARIUS. 5

JESUS: ut ex his tenebris ad æternum gloriæ lumen transeam. Hoc idem mihi impetrate omnes SS. ut suprà pag. 2.

4. JAN.

S. Titus, Pauli Discipulus, Virgo vixit. Morientis facies jam gloriosa cœlesti lumine radiabat. Vitam in laboribus pro animarû lucro actam ubi posuit, Animam cœlo Angeli invehentes jufferunt quiescere. Sic Virgines & Apostoli moriuntur.

S. Tite, roga pro me JESUM, ut in hora mortis illuminet vultum super me, ne hora mortis meæ sit potestas tenebrarum, sed ut cum Angelis lucis videam faciem DEI. Hoc idem mihi impetrate omnes SS. ut suprà pag. 2,

5. JAN.

S. Eduardus in Angliæ Regem à S. Petro unctus, conjugio Virginitatem copulavit. Mendicû ægrum (pium onus) humeris regijs ad

aram portavit, & sanavit. Undâ, quâ manus ipse lavit, cæci tenebras suas eluerunt. Sub sacro præsentis ipse ex ara JESUS benedixit. S. Joannis Evangelistæ amore rogantibus nihil negavit: quo dein nuntio mortis suæ horam didicit. Mortui corpus, uti & anima viventis, corruptionem non vidit.

S. Eduarde, impetra mihi, ut sic vivam JESU meo, ut & in morte, & in Judicio supremo mihi benedicat JESUS, & ego deinde unâ tecum æternùm benedicam JESUM. Hoc idem, &c. pag. 2.

6. JAN.

SS. Tres Reges è Regnis suis Bethlehemum abiêrunt, ut Christo nato dicerent Sacramentum: ne aberrarent, stellam ducem addidit cœlû. Ne vereduces in Herodis irati manus inciderent, è cœlo moniti per aliam viam regna revifunt. Sic superis curæ est, qui Superos curat.

O Sancti Tres Reges, Melchior, Gaspar, Balthasar, pro me orate, ut cœleste lumen sic per vitæ hujus pericula sequar, ut ad Christû, cui Sacramentû in Bapismo dixi, in æternitate beata securus pertingam. Hoc idem, &c. pag. 2.

7. JAN.

S. Raymundus nobilis Hispanus à puero MARIÆ devotus: adultus in ejus Annunciationem augustiùs celebrandam etiam liberalis. In D. Domminici cætum admissus MARIÆ monitu pro liberandis vinctis Sodalitaté erexit, Angelo suo usus excitatore, ut surgeret ad preces, & pallio, ut per mare navigaret.

Sancte Raymunde, qui jam es in portu æternitatis, & potentissimus es apud JESUM & MARIAM orator; ora pro me, ut ita JESU & MARIÆ cor meum & omnes vires liberaliter impendam, ita Angelo me ad sancta excitanti paream, ut me

8 JANUARIUS.

suprema Angeli tuba à somno mortis excitet ad æternùm laudandum DEUM meum. Hoc idem, &c. pag. 2.

8. JAN.

S. Laurentio Justiniano 19. anno Sapiencia divina osculum tulit, & omnis ei mundus desipuit. Episcopus, Pater Pauperum est factus dicens: Cœlo excludendos divites, nisi Janitores pauperes corrumpere. Moriturus lectum respuit, quòd Christus objisset in cruce: què ut vacuus meritis quis Judicem non horreret, Crucem ejus completendam aiebat. Crux arrha salutis.

S. Laurenti Justiniane, ora pro me verè meritis vacuo, ut vacuitatem meam in die mortis & judicij impleant infinita merita crucifixi Judicis mei JESU Christi. Hoc idem, &c. pag. 2.

9. JAN.

SS. Julianus & Basilissa conjuges; quòd

quòd cogitarent jungere Virginitatem nuptijs, adfuit cum MARIA JESUS, & animos addidit, dum utriusque nomen libro vitæ scriptum ostendit. Hæc Virgo, ille Martyr obiit. Tales convivas meretur Virginitas.

Orate pro me, ut omnes dæmonis versutias vincam, & sic ad æternam gloriam me præparem, ut inscribar & ego libro vitæ, & nullo me unquam peccato deleam. Hoc idem, &c. pag. 2.

IO. JAN.

S. Martianus Confessor orationem suam jejunijs & eleemosynis reddebat alatam. Inopem de die obvium nullum vacuum dimisit; noctu per urbem, quibus daret, quærebat. Vestem, præterquam unam tum habebat nihil, pauperi dedit, & recepit è cœlo auream. Da pauperi, qui DEUM cupis debitoré.

Ora pro me, ut & ego me morti

TO JANUARIUS.

meæ per corporalem & spiritualement
Eleemosynam ita parem, ut cum
anima corpus hoc, velut vesté exu-
erit, aurea & nuptiali æternitatis
veste induatur. Hoc idé, &c. pag. 2.

II. JAN.

S. Theodosius Abbas in se rigidus,
paucis panibus centum & amplius
mensaspavit: grano uno granariũ
totum implevit. Militum Duci ejus
cilicium pro lorica fuit. Basilio è
suis Monacho mortem suavissimã
impetravit. Indulget ijs DEUS,
quod petunt, qui sibi nihil indul-
gent.

O impetra mihi mortem sanctã:
impetra, ut ita meum corpus & ani-
mam ad illum transitum disponam,
ut omnia, quæ corpore vel anima
ago, sint mihi solario morienti. Hoc
idem, &c. pag. 2.

II. JAN.

S. Arcadius Martyr, ut Christũ
servaret, fortunas dimisit & latuit;

ut

ut verò amicū sui loco captum au-
dijt, Tyranno se stitit, solâ patientiâ
tectus, & pro Christo simul & amico
servando manus, pedesque præbuit
refecandos. Ut vincas, satis est,
si Christum habeas.

Ora pro me, ut ita DEUS manus
meas doceat ad prælium, ita diri-
gat gressus meos in viam æternita-
tis, ut nec manus mea, nec pes
meus me scandalizet; sed totum
corpus meum & anima mea tota
DEO meo serviat, ut in æternitate
possideam totum DEUM meum.
Hoc idem, &c. pag. 2.

13. JAN.

S. Godefridus Cappenbergensis
Comes humana omnia posthabuit,
ut certius haberet cælum. Conju-
gem inter sanctimoniales, se inter
Divi Norberti Canonicos transtulit.
Cœli cupidus, dissolvi identidem
cupiens, moriturus obvium habuit
cœlestem chorum: mortuus nep-

12 JANUARIUS.

ti multa luce coruscus apparuit. Vis à DEO honorari? mundi honores fuge.

S. Godefride precibus tuis ad illam gloriam cœlestem & coronam, ad horam mortis sanctæ, ad quam tam sollicitè anhelasti, me apta: & juva, ut sic per temporalia transeâ, ut non amittam æterna. Hoc idem, &c. pag. 2.

14. JAN.

S. Felix Nolanus vinculis, quæ pro fide tulit, ab Angelo fuit exemptus. Latenti telas aranæ pro muro contra hostes texuerunt, & Angeli sex menses cibum ministrârunt, & solatio fuerunt. Tutissimus ubique est, quem DEUS tuetur.

Defende me, S. Felix, contra persecutores, in mortis articulo animam meam ad mortem æternam quæsituros: oppone tecum Angelo tuo murum pro me; recrea me, ut in æternitate felici sim tecum æternum felix. Hoc idem, &c, pag. 2.

15. JAN.

15. JAN.

S. Paulus Eremita, quindecim annos natus eremum subiit : ibi ad centesimum decimum vitæ annum palma eadem eum vestiit & pavit. Corvus annis sexaginta indies panem ei medium, ac cum Antonius adesset, integrum tulit. Flexis genibus orans exspiravit : animam inter Cœlites cœlum petere vidit Antonius. Tumulum, in quo humaretur, leones duo effoderunt. Securum iter est è cella in cœlum.

S. Paule, ora pro me, ut tales hîc socios amem, qui me ducant, vel quos ergo ducam illuc, ubi es : ora, ut orem bene, & inter bonos melior, inter malos bonus vivam, & moriar bonus, eamque ad illos choros, inter quos te vidit Antonius. Hoc idem, &c pag. 2.

16. JAN.

S. Furseus Anglus C. in cœlum raptus ab Angelis, qui vel dæmo-

14 JANUARIUS.

num jacta in eum tela clypeo excipiebant, vel crimina objecta difuebant. Jussus ad corpus rediit, ut Orbem, quem viderat perfidiâ, discordiâ, avaritiâ, & crudelitate ardere, corrigeret. Correxit decenni labore, & ad æternam quietem abiit. Quietem hanc non speret, qui non laborat.

Ora pro me Anglice Apostole, ut & me, & alios à mundi & inferni flamma cœlo servem, & cœlestes Angeli me scuto suo à dæmonum igneis jaculis protegant, nunc, & in hora felicitis mortis meæ. Hoc idem, &c. pag 2.

17. JAN.

Sanctus Antonius Ægyptius Confessor, ut perfectus esset, quod in templo audiit, Juvenis omnia vendidit: & dedit pauperibus. Charismata, quæ in alijs meliora vidit, est æmulatus. A dæmonibus mirè tentatus, sed vicit, quia vigil: laqueis

JANUARIUS. 15

queis mundum plenum vidit; sed evasit, quia humilis. Fac similiter, si vis similiter vincere.

Ora pro me S. Antoni, ut semper vigilem, & humilis sim, quò & dæmones vincam, & mundi laqueos evadam: & laqueo contrito liberer, adserârque in libertatem filiorum DEI. Hoc idem, &c.
pag. 2.

18. JAN.

S. Prisca Romana, Virgo nobilis, tredecim annos nata, verberibus operta, ferventi adipe delibuta, leonibus objecta, triduanâ inediâ afflicta, in equuleo unguis ferreis cruciata, rogo accenso injecta, sed illæsa. Tandem vocante per Angelos sponso capite plexa ad nuptias evolavit. Cadaver, ne modò læderetur, ab Aquilis custoditum. Vis omnibus his altior esse? esto Virgo.

O tenerrima, & fortissima Virgo,

go, per illa mortis tuæ instrumenta, doloribus quidem, sed & gloriâ plena, te rogo, juva me, ut per mortis meæ dolores sic transeam, ut mortis æternæ dolores evitem, & ad gaudiorum illorum æternitatem ducar, ubi tu cum Virginum Sponso gaudes. Hoc idem, &c. pag. 2.

19. JAN.

S. Abundantiæ Virgini nascenti & morienti, ultrò campanæ applauserunt, & ultrò, cùm baptizaretur, in templo lampades accenserat. Octennis tam familiaris fuit JESULO, ut aureum ab eo pomum acceperit, & vicissim flores hibernos porrigeret. Tam pulchra est casta generatio, ut & Superos in amorem sui trahat.

Ne quæso, ô DEO tam chara Virgo, mei morientis obliviscere inter æternas tuas delicias apud JESUM tuum & MARIAM. Ora illos,

los, ut lætitiã Angelis creet mea
mors, non dæmonibus: ut in tem-
plo sancto gloriæ suæ DEUM meũ
unã tecum benedicam, æternũ
benedictus. Hoc idem, &c. pag. 2.

20. JAN.

S. Sebastianus sub Diocletiano
Imperatore miles, sed Christianus,
multos ad fidem convertit, multos
firmavit. Unde è cœlo audiit:
nunquam non tecum eris. Prop-
ter Christum sagittis meta factus,
& metam sanctam attigit DEUM,
apud quem pestiferorum est Advoca-
tus. Multa potest apud DEUM,
qui pro DEO patitur multa.

Tuis quæso precibus, sancte Se-
bastiane, apud DEUM effice, ut
plus luem animi, quàm corporis
horream; ut ita omnia in DEI ocu-
lis faciam, ut in vita, in morte, in
æternitate semper sim cum DEO, &
experiar illud: Nunquam non me-
cum eris. Hoc idem, &c. pag. 2.

21. JAN.

21. JAN.

S. Agnes tredecim annos nata, tam chara fuit Christo, ut eam anulo sibi subarrhârit, & Angelum addiderit, qui cœlesti eam cyclade texit, ne à lenonibus videretur. Hinc impolluto calle carnis spurcitas transivit, & gladio tranfixa, lucidas Sponsi sedes accepit. Agnetem imitare, qui vis amari ab Agno DEI.

Tibi gratulor felicitatem tuam, ô B. Agnes! Ora & pro me illum, cui jam juncta es in cœlis, ut ne sinat me ire in tenebras exteriores; verùm, etiam me in lucidas illas sedes accipiat. Hoc idem, &c. pag. 2.

22. JAN.

S. Vincentius Martyr in craticula, inter verbera & equuleum, inter prunas ardentes & ferreos ungues, inter candentes laminas & testacea fragmenta pro Christo constitit, Angelo confortante. Sacrum

crum ejus cadaver abjectum contra aves & lupum defendit corvus. Quem DEUS defensum cupit, quis lædat?

Sancte Vincenti Divi Laurentij æmule, patriâ, doloribus, gloriâ, solare me in supremo lectulo ad mortem jacentem: ut æternis prunis stratum lectum evadam, tecumque in beata æternitate quiescam. Hoc idem, &c. pag. 2.

23. JAN.

S. Joannes, Vir misericordiarû, unde & Eleemosynarius dictus, mortuus à S. Petro in æternam cœli mansionem induci visus est. Speras misericordiam in cœlis? esto misericors interris.

Doce me S. Joannes erga egen-tes miserationem, ut liberaliter vel ope corporali, vel precibus, consilio, modis omnibus omnes juvè, quos à me juvari vult DEUS: ut morienti mihi sit Pater misericordiarum

rum DEUS meus, sımque beatus inter misericordes, & æternam misericordiam consequar. Hoc idem, &c. pag. 2.

24. JAN.

S. Babylas M. vinculis ligari pro Christo vivus non horruit, & decollatus, vincula non dimisit, ut semper Christo conjunctus esset. Dum vincimur pro Christo, nobis Christum devincimus.

Impetra mihi sancte Christi Martyr, ut voluntas mea sic DEI voluntati sit semper conjuncta, ut seu vivam, seu moriar, libenter patiar, quidquid vel pro Christo, vel à Christo patiendum occurrit. Et hæc sit mea ad mortem præparatio, in morte solatium, in æternitate corona, maxima & minima pro Christo libenter, & cum gratiarum actione fuisse perpeffum. Hoc idem, &c. pag. 2.

25. JAN.

S. Pau-

S. Paulus è Saulo conversus, ex persecutore factus Apostolus, ex lupo agnus, ex vase iniquitatis Vas electionis, quod portaret nomen JESU coram gentibus. Visita converti, dic verè cum eo: Domine, quid me vis facere?

Ora pro me S. Paule, ut ante mortem sic convertar, ut faciam, quod me vult facere DEUS, JESUM opere & verbo portem coram hominibus, ut me morientem per Angelos suos JESUS portet ad Regnũ suum. Hoc idem, &c. pag. 2.

26 JAN.

S. Polycarpus, S. Joannis discipulus Marcionem hæreticum Satanæ primogenitum dixit: igni additus gratum DEO odorem dedit, cum diceret, nolle se Christo maledicere, qui sibi semper faceret bene. Qualem putas peccator dat odorẽ?

Sancte mi! ora, ut nullus Satanæ minister, nemo improbus, ne ipse qui-

quidem Satanas mihi seu viventi, seu morientinoocere quidquam possit. Commenda me Magistro tuo Joanni, ut ille spiritum tunc meum, cum exspiravero, deponat in eo, in quo ille quievit, sinu DEI JESU. Hoc idem, &c. pag. 2.

27. JAN.

S. Joannes Chrysoftomus velut Elias à Jezabele, plurima passus ab Eudoxia. Ei SS. Petrus & Joannes scripturas aperuerunt : scribenti Paulus adfuit, sacrificanti Spiritus Sanctus, morituro S. Basiliscus M. ad cujus corpus orans audijt : Joannes frater, crastinus dies nos loco conjunget : & SS. Viatico munitus, est conjunctus. Beatus qui non abijt in consilio impiorum.

S. Joannes, aperi os tuum aureum pro me apud DEUM, ut ego in vita Sanctorum muniar præsidio, & in morte eorum solatio confirmer : ut sine Viatico non discedam, & mor-

tis

tis meæ dies nos loco conjugat æternum. Hoc idem, &c. pag. 2.

28. JAN.

S. Jacobus, dictus pœnitens, quadraginta jam annis in eremo & abſtinentia, & miraculis admirandus; in horrendum carnis & homicidij ſcelus prolapſus. Sed pœnitens toto decennio inter offa mortuorum ſe vivus ſepelijt: quot hebdomadis non niſi bis radicibus reſectus, donec ſepulchro ſuo immoreretur. Qui ſtat, videat, ne cadat.

O ſancte Jacobe, precibus tuis mihi impetra, ut timore & amore ſuo carnes meas conſigat DEUS, ut cum tremore ſemper operer ſalutem, & quæram æternitatem meam: ut aut nullius peccati reū, aut certè pœnitentem me vita mea morti meæ, & mors mea æternitati meæ ſiſtat. Hoc idem, &c. pag. 2.

29. JAN.

29 JAN.

S. Constantinus Ep. M. per aquam
 ferventis balnei, & ignem victor
 transivit, & ab Angelis est curatus.
 post mortem obitam cadaver di-
 vino monitu quæsitum, Angelorum
 choris circumseptum est repertum.
 Bene cœptis constanter insiste, qui
 Angelis vis charus esse.

Adesto & mihi unà cum Angelis
 tuis, ut per mundi hujus tribulatio-
 nes velut per ignem & aquam vi-
 ctor vivens & moriens illuc abeam,
 ubi unà tecum & cum Angelis æter-
 num cantem: Gloria Patri, & Filio
 & Spiritui sancto. Hoc idem, &c
 pag. 2.

30. JAN.

S. Martina V. & M. effusa in ege-
 nos opulenta hæreditate cœlum te-
 nuit: unde & terrenis blandimentis
 & terriculamentis superior fuit, &
 è cœlo impetravit, quod voluit Dū
 demum & vitam, quam unam reli-
 quam

quam habebat, dedit, voce cœlesti est invitata ad cœlum. Vis ad cœlum invitari? dimitte terram.

Ora pro me S. Virgo, ut si non re, animo saltem sic omnia terrena dimittam, ut invitari etiam merear ad cœlum; & tremenda illa mortis hœra sit mihi æternæ beatitudinis principium. Hoc idem &c. pag. 2.

31. JAN.

S. Marcella Romana è nobilissima & ditissima pro Christo pauperissima facta, unde cœlestibus solatijs tam repleta fuit, ut fustibus & flagellis cæsa gratias ageret. Adfunt cœlestia, ubi absunt terrena solatia.

O S. Marcella, Viduarum exemplar, ora pro me, ut tempestivè relinquam, quidquid mihi morienti molestum esse potest: omniâque hæc singula ita agam, quasi in ipso opere sim moriturus. Hoc idem, &c. pag. 2.



FEBRUARIUS.

I. FEBR.

SANCTUS Ignatius Antiochiæ Episcopus pro Christo vinc-tus, & ad bestias damnatus, aiebat: Nun- incipio Christi esse discipulus. Ignis crux, bestia, tota tormenta Dia- boli in me veniant, tantum ut Chri- sto fruam. In ejus corde post mor- tem repertum est nomen JESU hinc aiebat, non posse se aliud lo- qui, quam JESUM. Ex abundan- tia cordis os loquitur.

S. Ignati, inscribe & mihi no- men JESU, ut constanter assuescam inter prospera & adversa elevato ad JESUM & MARIAM corde ig- nita in coelum amoris jacula evi- brare, & sic vel nunc incipiam es- se Christi discipulus: ut & vita mea & morte mea JESUM & MARIAM lau-

laudem, amem æternùm. Hoc
idem, &c. pag. 2.

2. FEBR.

Postquam impleti essent purgationum dies, ingressa MARIA templum, JESUM per manus Simeonis Patri æterno obtulit: & gladium doloris per Simeonis vaticinium recepit. DEO charus non est, quem non affligit.

O purissima Domina mea, dulcissimum amarissimi agônis solatium! da morienti mihi JESUM, & sic me servum tuum cum Simeone in æterna pace dimitte. Non recuso longum illum purificationis meæ diem in purgatorio; mallet tamen DEI amore, quàm pro pœna culparum illum pati. Nunc igitur illumina me, accende me, & purifica me. Hoc idem, &c. pag. 2.

3. FEBR.

Sanctus Blasius Episcopus nec
minis, nec blanditijs adduci po-
tuit,

tuit, ut dijs sacrificaret: tandem virgis cæsus, & in equuleo ferreis pectinibus laniatus caput pro Christo dedit, ut ab Angelis coronaretur. Nemo coronabitur, nisi qui legitimè certaverit.

S. Blasii, ora pro me, ut ita in hac vita inter diaboli tentationes certem, ut felix hinc ad coronam, non ad pœnam egrediar: & intrem in gaudium Domini tui, ac mei. Hoc idem, &c. pag. 2.

4. FEBR.

S. Theophilus Confessor, ut officio restitueretur, DEO, Deique Matre ejuratâ, dæmonis fit mancipium, sentiens fœditatem criminis, quadraginta dies noctesque MARIÆ supplex, recipitur in gratiam, & triduo pòst felix in templo animam exspirans, per MARIAM in cœlum intromittitur. Vis cœlum intrare, ad MARIAM pulsa; MARIA cœli Janua est,

S. Theo-

S. Theophile, pulsa pro me cœli Januam MARIAM, ut dum vivo, constanter MARIÆ, & ejus Filij mancipium permaneam, & moriturus eam habeam propitiam, & per ipsam in gaudium Domini introducar. Hoc idem, &c pag. 2.

5. FEBR.

S. Agatha Virgo eligens humilem & fervilem Christianorum vitam præ Regum opibus & superbia, & malens Virgo mori, quàm nupta vivere, colaphos, candentes laminas in equuleo, acutas testas, vivos carbones, & mamillam abscindi sustinuit. Tandem inter preces ad cœlum migravit. An non, qui se humiliant, exaltantur?

S. Virgo & Martyr Agatha, tuis precibus mihi impetra, ut dum vivo, eligam potius cum Christo humiliari, quàm cum mundo regnare, & ita merear exaltari in cœlis,

ubi tecum, & cum Christo æternum regnum & triumphem.

SS. Joannes, Jacobus, & Paulus, veri JESU socij, pro quo cum alijs pluribus Nangasachi in Japonia crucifixi sunt & lanceis confossi. Qui Christi esse cupiunt, crucifigi non timeant.

Orate pro me SS. Martyres, ut vivus & moriens Christo confixus sim cruci: obediens illi usque ad mortem: laudans illum etiam post mortem in beata Crucis amicorum ac discipulorum æternitate. Hoc idem, &c. pag. 2.

6. FEBR.

S. Dorothea V. & M. post tormenta ad gladium itura risit, quia ad Sponsi hortos se abire ajebat: risit hæc Theophilus Scholasticus, & è Sponsi illius horto recentes in Februario rosas, flores & poma petijt: misit illa mox per cœlestem ephebum, & in Sponsi odorem

Theo-

Theophilum traxit. Tam dulce
cœlum est, ut qui illud cogitat,
tormenta rideat.

Sancta Virgo, ora, ut per spinas
& molestias vitæ hujus penetrem
ad æterna illa viridaria Sponsi tui,
ubi sim æternùm Theophilus; hoc
est, DEI amans in paradiso DEI
mei. Hoc idem, &c. pag. 2.

7. FEBR.

Sanctus Theodorus Martyr Ia-
res, quos Licinius Imperator ei
adorandos obtulit, confregit, &
pauperum prædam fecit: ideo in
crucem actus, puerorum sagittis
est scopus factus: sed solutus ab
Angelo, gladio cecidit. Priusquam
in pugnam descenderet, audiit è
cœlo: Maçte Theodore: ego tibi
adereo. Esto cum DEO, ut DEUS
tecum sit: & securus eris.

Adesto mihi morienti unà cum
Angelo tuo, sancte Theodore, ut
igneæ dæmonum sagittæ mihi non

noceant : & pro me ora , ut in supremo mortis agone semianimem me animent JESUS & MARIA : ut vincam , & vobiscum sim in beata æternitate. Hoc idem, &c. pag. 2.

8. FEBR.

S. Marina V. cum Patre asceterium ingressa Marinus audiit. Accusata tamen à puella stupri illati, tacuit : septis religiosis ejecta , & quinto post anno recepta calumniam tulit, usque dum mors detersit, quæ Marinam detexit. Innocentia premitur, non opprimitur.

O S. Virgo , impetra mihi , ut non timeam ab humano, timeam autem à divino judicari die : & possideam in patientia innocentem animam , & innocens compaream pro tribunali DEI , qui judicabit & illum , qui patitur , & illum , qui infert injuriam. Ille innocentem dicat, & habeo satis. Hoc idem, &c. pag. 2.

9. FEBR.

9. FEBR.

S. Apollonia V. sub Decio, ut Christum teneret; passa est sibi è malis confractis dentes evelli. In rogum insuper, quem minabatur lictor, ni Christum abjiceret, sanctiore intus igne inflammata seipsam injecit, & in cœlum evolavit. Bene perdit corpus, ut non perdat animam.

Ora pro me S. Virgo, ut bene penetrem, præstare, ut hîc patiatur corpus momento uno dolorem parvulum, quàm post mortem cum anima dolores maximos & æternos. Ora, ut hîc bene patiar, & bene moriar: ut ibi vivam ætarnum, ubi nihil molestum patietur corpus, vel anima. Hoc idem &c. pag. 2.

10. FEBR.

S. Austreberta Virgo, ut Christo Sponsa fieret, nuptias fugâ elusit: aquas, ne fugam sisterent, ca-

sto & sicco pede transivit. In Cœnobio Pauliacensi Virginum Mater, animam agens, quos aliæ Cœlites in auxilium vocabant, obvios vidit. Dum vivis, Cœlites cole, & vocatos obvios habebis; dum morieris.

Te, ô S. Virgo, nunc cum illis invoco: adsis mihi in illo puncto, in quo vertitur omnis cardo spei meæ. Adsint tecum ij, qui tibi morienti adfuerunt Cœlites, & Cœlitum omnium Rex JESUS, Regina MARIA: quos ego unâ tecum cupio, ut cum illis merear DEUM æternùm videre. Hoc idem, &c. pag. 2.

II. FEBR.

S. Victoria Virgo bis triumphavit: semel, cùm mortali sponso in amplexus ruente, è summo tecto præceps abiens in templum, seque DEO devovens Hymenæum vicit. Iterum cùm pro Christo mor-

mor-

mortem obiens vicit Diocletianum & Maximinianum Impp. Sic triumphans in terris, quidni triumphet & in cœlis?

Tuis me precibus fulci, ô Victoria, ut pro anima mea & Christi honore pugnans semper vincam, & maximè, quando in ultimum agonem descendam, ut victor abeam ad æternos triumphos. Hoc idem, &c. pag. 2.

I 2. FEBR.

S. Antonius Episc. primas litteras à Spiritu S. didicit, cui pro Minervali se ipsum dedit, cum DEI cultui se totum inter Monachos dedit: in quam virtutis scholam è mundo & Patrem pellexit, qui grandævus à filio vitæ sanctioris rationem didicit. Nemini hic Magister deerit, nisi qui sibi ipse defuerit.

Sancte Antoni, ora Magistrum tuum pro me, ut illa, quæ nescio,

ita me scire, & illis, quæ scio, me sic uti, ita vivere ac mori doceat, prout verum Spiritûs Sancti discipulum decet. Hoc idem, &c. pag. 2.

13. FEBR.

B. Jordanus è D. Dominici familia, sic B. Virgini familiaris erat, ut non semel ipsa sceleratos ad istum mitteret persanandos: quam ipse vidit in ara prehensa filioli manu ad illa verba (Gloria Patri, &c.) omnibus benedicere. Vis à Virgine benedici? non cessa de ipsa & filio dicere bene.

B. Jordane, ora pro me Virginem inter mulieres Benedictam, ut mihi viventi & morienti, seu repente, seu aliter moriar, etiam ipsa cum prole pia benedicat. Hoc idem, &c. pag. 2.

14. FEBR.

S. Auxentius Abbas in Concilio Chalcedonensi verbis & miraculis Divinitatem Christi, & Christiparæ Virgi-

Virginitatem propugnavit. Tantæ fuit patientiæ, ut scaturientes è tabido corpore vermes, si exciderent, ceu gemmas reponeret. Cœlo non est aptus, quem non patientia aptat.

Doce me S. Auxenti, ut pretiosos faciam dolores, qui mihi per vitam omnem evenient : ut ita habeat coram DEO pretium omnis actio mea, vita mea, mors mea. Sciam obsecro pati, sciam vivere, sciam mori. Hoc idem mihi impetra sancte Valentine Episcopo pro Christo capite plexe, nunc Epilepsiæ Thaumaturge, & vos, &c. pag. 2.

15. FEBR.

S. Faustinum Sacerdotum & Jovitam Diaconum, fratres acerbissimis tormentis per totam Italiam, igne, bestiis, mari gloriosos, Brixia, quæ eos genuit, gladio coronavit. In carcere, dum alijs SS. Euchari-
stiam ministrârunt, ipsis Angeli mi-

nistrabant. Ad aram Angeli servi-
unt : & hominem pudeat?

O ter Sancti Fratres, pro me ora-
te, ut ego & vos & Angelos habeam
& adjuutores & ministros : ut ex
hoc carcere non exeam, nisi SS.
Viatico munitus, & ad eam, quam
Christi, & vestro sanguine emistis,
transeam immortalitatem. Hoc
idem, &c. pag. 2.

16. FEBR.

S. Juliana Virgo, quòd Eleusium
Gentilem nollet habere sponsum,
experta est Judicem & carnificem.
Dæmonem specie Angeli boni ma-
la suadentem vinculis ipsa suis liga-
vit & flagellavit. Ad flammam dam-
nata eas lacrymis extinxit, & lebe-
tem ferventis aquæ precibus disru-
pit : caput denique pro Christo de-
dit. Suggestiones non admitte, &
Dæmonem superâsti.

S. Virgo ora pro me, ne arte ullâ
unquam fallat Angelus tenebrarû,
præ-

præcipuè in morte cum æternitate
luctantem. Tu illum alliga, ut plus
tua pro me oratio efficiat, quàm
quicquid aliud contra me. Hoc
idem, &c. pag. 2.

17. FEBR.

S. Sabinus Episcopus ex senio cæ-
cus, hominum tamen cogitationes
& corda vidit. Cæcitatem tam pa-
tienter tulit, ut post mortem mere-
retur æternùm DEUM videre. In
patientia nimirum animas posside-
mus & DEUM.

Ora pro oculis cordis mei sancte
Sabine, ut sint simplices: ora, ut ea,
quæ corpori molesta sunt, libenter
feram, quia à DEO sunt; ora, ut ita
moriens oculos claudam, ut ijs vi-
deam æternùm DEUM Salvato-
rem meum. Hoc idem, &c. pag. 2.

18. FEBR.

S. Simeon, Jacobi Jerosolymis
successor, Christi se propinquum
verè probavit, cùm centum vigin-

ti annorum senex mortem Crucis
constanter obivit. Propinquum
Christi crux probat.

Ora pro me S. Simeon JESUM cru-
cifixum, ut mors illius morti meæ
æterno sit solatio; ut ita crucifixi
amans hîc vivam, & moriar in tem-
pore, ut vicissim ille me amet in
æternitate. Hoc idem, &c. pag. 2.

19. FEBR.

S. Conradus Placentinus, puri-
tatem ut servaret, in vepres se abje-
cit; ut juvenem sceleratum hasta è
cœlo configendum, preces suas ob-
jecit. DEO animam flexis genibus
reddidit. Devotè moritur, qui vi-
vit devotè.

S. Conrade, pro me animam
agente etiam preces tuas clypeum
opponere, ne prævaleat inimicus: &
ora pro me, ut, dum vivo, DEUM
sic devotè orem, ut sequatur devo-
ta mors; mortem verò vita im-
mortalis. Hoc idem, &c. pag. 2.

20. FEBR.

S. Eucherius Infulam Aurelianensem, quam nondum nato Angelus promisit, à Carolo Martelio Rege accepit quidem, sed ab eodem eâ spoliatus, post iussus est Coloniae exulare; ab exilio migravit in Patriam Sanctorum: sed vidit prius Carolum cœlo exulare in inferno, quòd sacris manus iniecisset. Quàm dispar utriusque vita tam fuit dispar mors.

S. Eucherii, gratulor tibi, beatam illam æternitatē te possidere: quā Carolus excidit, & infelicem illam te non timere, in quam Carolus incidit. Verùm inter utrumque ego sum medius & dubius: illam spero, hanc timeo. Ora pro me, ut ita moriar, ut illam habeam, quam spero: non illam quam timeo. Hoc idem, &c. pag. 2.

21. FEBR.

S. Mauritius Apameæ in Syria
Du-

Ductor cum militibus suis uncos primùm, equuleum, flagra, flammæ, & tela pro Christo perpeffus, dein Photinum filium prope paludem ad palum alligatum vespis, muscis, & sagittis confodi coram vidit. Denique cum socijs ipse mel- le oblitus, à vespis ad mortem confoffus est. Hoc denique est militem esse fortem, si & pro Christo scias mori.

Adesto cum filio & copijs tuis mihi morienti, & ora pro me S. Mauriti, ut certanti mihi adsit Imperator noster JESUS, & in ultima pugna victorem faciat, & inter Victores suos censeat in æternitate. Hoc idem, &c. pag. 2.

22. FEBR.

S. Petrus Damiani Juvenis à fratre natu maximo porcis pascendis adhibitus, dein ab altero fratre literis admotus sic profecit, ut eas doceret. Sed memor injuriarum
mun-

mundi, eum averſatus, inter Anachoretas ſe abdidit. Cur non ludis mundum, toties tibi illudentem?

S. Petre, juva me precibus tuis ut mundum toto corde averſari poſſim, quò mundus ex hoc mundo evolem ad eum, cujus regnum non eſt de hoc mundo, & tecum illum æternùm laudem. Hoc idem, &c. pag. 2.

23. FEBR.

S. Nicolaus à Chriſto coram audiens: Nicolae ſequere me: Prompte eſt ſecutus: fuit Chriſti & B. V. adeò amans, ut aliquando undecies millies Pater & Ave recitaret. Si amas, non piget diu orare.

Ora pro me beate Nicolae, ut in omnibus DEUM me vocantem promptè ſequar, & ita Pater ad Patrem DEUM, & Ave ad DEI Matrem orem, ut & Patris illius & Matris bonus filius vivam, & moriar. Hoc idem, &c. pag. 2.

S. Mat-

24. FEBR.

S. Matthias Apostolus in locum reprobī Judæ electus est, quando fors illa felix supra eum cecidit. In Æthiopia tunc Christum prædica- vit, pro Christo lapidibus & securi percussus fortem æternæ hæredi- tatis adiit. Tali sorte quidni digna sit vita & mors talis?

O S. Apostole! sim & ego tam fidelis DEO meo usque ad vitæ fi- nem, ne cadat super me fors repro- borum, sed proborum, ut felici morte hinc in sortem Sanctorum veniam, quæ est fors filiorum DEI. Hoc idem, &c. pag. 2.

25. FEBR.

S. Tarasius primò Consul, dein Princeps, tum Archipræsul Con- stantinop. In his tamen honoribus pauperum nunquam oblitus, qui- bus præter vestes quotidie vel ci- bos è sua mensa mittiebat, vel sua manu ministrabat. Et plebejum pudeat? San-

Sancte Tarasi ! charum tibi fuit pauperum nomen ; ecce me pauperem & maximè in hora mortis egentem ! ora ergo, ut in illo æternitatis adeundæ articulo pauperulam hanc animam meam in domum gloriæ inducat DEUS. Hoc idem, &c. pag. 2.

26. FEBR.

S. Porphyrius Jerosolymis in monte Calvariæ Christum crucifixum cum coram vidisset, oravit : Domine memento mei , dum veneris in Regnum tuum. Et Christi jussu latro bonus osculum ei tulit ; Christus verò Crucem suam ferendam cum amplexu commendavit. Crux Christi pignus est amoris.

Memento sancte Porphyri, quæso , etiam mei apud Crucifixum JESUM ; jam enim venisti tu in Regnum , tibi à DEO præparatum à constitutione mundi, ut audiam à Chri-

à Christo in agône meo : Hodie mecum eris in Paradiso. Hoc idem , &c. pag. 2.

27. FEBR.

S. Athanasia Andronici conjux, eum binos filios mortuos in S. Juliani templo fleret , ab eo docta est, ijs coelum non invidere. Sic admonita, ut eodem conniteretur, omnibus opibus in pauperes abjectis, cum marito in diversa cœnobîa abiit. Relinque , quæ habes propter DEUM , & Cœlum habes.

Sancta Athanasia ora pro me , ut rebus hujus sæculi non affigam cor meum : sed ita per hæc temporalia transeam, ut non amittam æterna. Hoc idem , &c. pag. 2.

28. FEBR.

SS. Lupicinus & Romanus Germani, ambo Virginitatem à teneris coluere : ambo à parentibus ad nuptias urgebantur : sed ijs mortuis ambo ad eremum concessere,

tere, ubi superatis dæmonum fraudibus multos ad Christi castra duxerunt. A teneris assuescere tutissimum.

SS. Lupicine & Romane, orate pro me, ut nunc ita assuescam vivere DEO, ut in morte impugnantem me dæmonem vincam, & ad cœlestia castra securus migrem. Hoc idem, &c. pag. 2.

29. FEBR.

Si est annus Bissextilis.

S. MARIA, morientium tutela: S. Angele à DEO mihi assignate. Omnes SS. quibus in morte Christus, vel B. Virgo, vel Sanctorum aliquis apparuit, & ad bene moriendum iuvit: Omnes SS. qui eos, qui in horrendo mortis agone versantur, soletis singulariter adjuvare; assistite mihi in agone meo, & orate pro me, ut tunc mihi propitius appareat JESUS, qui veniet me judicare. Hoc idem, &c. pag. 2. MAR-



MARTIUS.

I. MART.

Sanctus Siviardus Abbas moriturus, suos ad perseverantiam, & gratiæ æstimationem est hortatus, inquiens: Videbit quivis, quàm bene nobis voluerit DEUS. Mortui anima Sanctorum Petri & Pauli manibus visa est cœlo inferri. Dignus gratia non est, qui æstimare aut non novit, aut non vult.

S. Siviarde, ora pro me, ut æstimem semper gratiam DEI, ut gratia DEI in me vacua non sit, sed plena semper usque ad mortem, usque ad beatam æternitatem: in qua verè videbit quivis, quàm bene nobis voluerit DEUS. Hoc idem, &c. pag. 2.

2. MART.

S. Ceadda Ep. ut in iudicio extremo non timeret, dum vixit, id
sem-

semper timuit. Unde ad ventos, tonitrua, fulmina, velut diei illius imagines flevit. Morienti Angeli adfuere. Beatus homo, qui semper est pavidus.

S. Ceadda, impetra mihi, ut à Judicijs divinis timeam in vita, ut merear à te & sanctis Angelis post mortem ad patriam illam deduci, ubi nullus timebit unquam. Hoc idem, &c. pag. 2.

3. MART.

S. Cunegundis Imp. Henrici virginis Conjux Virgo, in Virginitatis testimonium nudis pedibus & illæsis candenti ferro inambulavit. Post Conjugis mortem, ut Virginitatem porrò tueretur, mundo exivit, & Religiosa in Cænobio vixit. Nusquam tutior Virginitas; quàm inter Virgines.

Sancta Imperatrix, inveniam ego per tuas & S. Conjugis tui preces gratiam, ut continentiam sta-

C

tui

tui meo congruam servem, ut aliquando tecum in æternitate vivam, & DEUM meum laudem.
Hoc idem, &c. pag. 2.

4. MART.

S. Casimirus Poloniæ Regis Filius, sic à teneris Castitatem amavit, ut cilicio uteretur pro purpura, & humo pro molli lecto. Summa hyeme nudipes noctu templa obivit. Mori Virgo maluit Juvenis, quàm non Virgo vivere senex. Centum & ferè quinquaginta annis Corpus ejus incorruptum est repertum, unà cum Hymno Mariano, quo Omni die MARIÆ laudes dixit. Amas Virgo esse? cave corpus tuum ames.

S. Casimire, scio quæ MARIÆ honori & amori dixero, aut fecero, morientem me ad ipsam æternitatem secutura. Adsis ergo mihi dum vivo, ut corporis & animæ puritatem ita custodiam

MARTIUS.

51

ut Omni die MARIÆ dicat mea laudes anima, ut in supremo vitæ die ad finem MARIÆ vadat devotissima. Hoc idem, &c. pag. 2.

5. MART.

S. Conon conjugem à parentibus obtrusam docuit Christo nubere. A S. Michaële doctus, quomodo ad Baptismum & S. Eucharistiam adiret. Non deerunt Angeli Magistri, si non desint homines discipuli.

Doce me, S. Conon, ad Altare sanctum accedere, prout à Magistro tuo didicisti, ut semper hoc Sacramento sic utar, ac si pro viatico æternitatis illud moriens sumerem. Moriens verò eo sic muniar: ut habeam felix iter in itineribus æternitatis ad eum, quem in Sacramento adoro. Hoc idem, &c. pag. 2.

6. MART.

S. Coleta V. à sancto Joanne

Apostolo per annulum Christo est desponsata : & ipse Christus ei Eucharistiam dedit , & Martyrum omnium dolores , sicut optaverat , sensit. Moriens à Christo velut sponsa in cœlum est deducta. Vis amari à Christo ? ama amore ejus multa pati.

Ora pro me, S. Virgo, ut & ego amore JESU sic desiderem pati, ut in hora mortis deducar in domum illam , in qua qui habitant , beati sunt : ut unà cum illis in sæcula sæculorum laudem , qui passione suâ me redemit, JESUM Christum. Hoc idem , &c. pag. 2.

7. MART.

S. Thomas Doctor Angelicus scœminam impudicam ardenti titione fugavit : victor ante Crucem orans ab Angelis baltheo est præcinctus & omni post hac carnis molestia caruit ; in unam DEI gloriam semper intentus : unde post

post mortem stellato pectore gloriosus apparuit. Et quid sit dignius DEO, quò collimet homo?

O Angelice Doctor Thoma! impetra, quæso, hanc stellam tam puræ intentionis cordi meo: ora pro corde meo, ut ne sinat illud JESUS & MARIA ullo unquam crimine maculari; sed sit ad JESU crucifixi & MARIE gloriam vita mea, mors mea, æternitas mea. Hoc idem, &c. pag. 2.

8. MART.

S. Philæmon in theatro Christianum tam dextrè egit, ut Christianus mox fieret. Quare pro Christo flagra & sagittas innoxie tulit. Tandem sanguine suo meruit baptizari. Utinam vel Christiani personam suam sic agant!

Ora pro me sancte Philæmon, ut in rebus salutis meæ non nuger, sed seriò agam negotium æternitatis meæ. Obsecro, seriò &

bene agam personam hominis verè Christiani, ut illâ demum æternitate coroner, quæ non datur, nisi qui DEI obsequiis seriò se impendant. Hoc idem, &c. pag. 2.

9. MART.

S. Francisca Rom. ob vitæ innocentiam & austeritatem Angelo suo tutelari, Christo passio, & MARIÆ tam fuit familiaris, ut hæc ei in sinum dederit JESUM, JESUS comedenti & decumbenti affederit, Angelus semper spectabilis fuerit. Non habet Cœlites familiares, qui reuult mortificari.

Juva me, Francisca felix, Francisca Angelica, Francisca JESU, & MARIÆ amabilis, per mortificationem mereri, ut adsit mihi & comedenti, & decumbenti, & semper, & denique morienti, & in æternitate viventi JESUS. Hoc idem, &c. pag. 2.

II. MART.

S. Pelagia cum geminis filiabus Martyrium quæsitura Antiochiam abiens ; ne pudorem perderent , è via in profluentem desiliêrunt , & illo haustæ sunt. Corpora simul decentissimè tecta ad littus exposuerunt. Vitam amas æternam ? mortem ergo ne timeas temporalem.

Orate pro me , sancta Mater , & sanctæ Filiæ ; ut & ego pretiosam mortem quæram per vitam pretiosam , ac tandem inveniam pretiosam æternitatem. Hoc idem , &c. pag. 2.

12. MART.

Sanctus Gregorius Magnus Papa , inter pauperes , quos cibavit , Christum & Angelos meruit hospites habere. Grassante Romæ peste , beatæ Virginis Imaginem circumferens , vidit cruentum gladium abstergere , & in vaginam re-

condere Angelum, & in aëre Reginae Cœli gratantes Angelos de morte Victoriâ audivit. Devotè MARIAM invoca, & exaudiêris.

Sancte Gregori, ora pro me Regina cœli, ut eâ devotione invita eam invocem; ut per illam ad regnum ejus perveniam, ubi æternum cantem Alleluja. Hoc idem, &c. pag. 2.

13. MART.

S. Euphrosina V. Crucifixum aliquando complexa, sic in ejus amorem exarsit, ut spretis Principis nuptijs, se totam ei in Cœnobio devoverit: ubi mirâ abstinentiâ & patientiâ celebris, à sponso in cœlû est evocata. Pugna fortiter, ut vincas, & coronaberis.

O patiar & ego libenter! Ora pro me, sancta Virgo, ut patiar; & ora, ut patiar libenter. Ora, ut libenter moriar; sed in suavissimis amplexibus JESU & MARIÆ.

Hoc

Hoc idem, &c. pag. 2.

14. MART.

Sanctus Petrus Abbas vidit beatam Virginem piè laborantium sudores abstergere. E morbo factus monocus gratias DEO egit, quòd hostium alterum amisisset. Utrum melius, cum uno oculo coelù, quàm cum duobus gehennam intrare? Elige.

Ora pro me, sancte Petre, ut ita oculis meis utar, ut non poeniteat: & ita pro DEO & DE Iparæ gloria laborem & sudem, ut in mortis ultimis sudoribus MARIAM etiam habeam consolatricem. Hoc idem, &c. pag. 2.

15. MART.

S. Longinus Centurio, Christi latus aperuit, & liquorem effluentem oculis suis tum corporis, tum mentis habuit salutarem. Nam missos à Pilato, qui caput ejus præscinderent, hospitio excepit prius, dein

dein candidatus caput deditrefecandum. Hoc didicit, dum Christum mori vidit.

Sancte Longine, ora pro me, ut quam viam ad cor JESU lanceâ aperuisti, eam ego suspirijs meis frequenter teram, dum vivo: ut moriens aliquando in illud cor spiritum meum expirem. Hoc idem &c. pag. 2.

16. MART.

S. Torellus tertio galli humeris repente insidentis cantu monitus, Juventuris suæ turpitudines, 40. annis sub dio in jejunijs, catenis, veribus, in aqua gelida, trium tantum horarum quotidie somno, amarè flevit, & maculas eluit. Non puduit te peccare: & poenitere pudeat?

Sancte Torelle, juva me precibus tuis, ut me DEUS gratiâ sua sic excitet & roboret, ut agam dignos poenitentiae fructus, & tecum, Angelis

gelis de peccatore pœnitentiam agente gaudentibus, associari æternum possim. Hoc idem, &c. pag. 2.

17. MART.

S. Gertrudis, V. per MARIAM cum lachrymis à JESU peccatorum veniam, mortem & æternitatem felicem petijt; & è MARIÆ sinu JESULUS datâ manu promisit dicens: eam à se & MARIA nunquam deserendam. Vis exorare JESUM? Ora per MARIAM.

Ora pro me apud DEI param, S. Virgo, ut apud Filium suum mihi nunc periclitanti, & in supremo agone jacenti opem impetret: ut à peccatis mundatus merear hic ab ijs nunquam deseri, & ijs in æternitate sancta associari. Hoc idem, &c. pag. 2.

18. MART.

S. Eduardus Angliæ Rex, clam à Noverca, ut suo filio coronam pararet, occisus, dum venabatur,

& in casa rustica primùm sepultus, dein in paludem coniectus. Sed ubique ob liberalitatem hominibus DEO sacris præstitam, vel luce insolitâ, vel igneâ columnâ DEUS cadaver prodidit. Disce, quàm sit in liberales DEUS liberalis.

Sancte mi Rex, intercede pro me, ut siue repentinâ, ut tu, siue aliâ morte occumbam, occumbam sanctè; ut Regi Regum DEO æternùm unâ tecum homagium in sanctæ æternitatis Regia præstem. Hoc idem, &c. pag. 2.

19. MART.

S. JOSEPH, MARIÆ Sponsus, JESU Nutritius, plus quàm duodecim annos dulcissimè cum JESU & MARIA conversatus, arcana mira didicit. In eadem secum domo & mensa DEUM DEI que Matrem vidit, & loquentes audivit, & denique inter JESUM & MARIAM consolantes & ministrantes, ultimum

num agônem egit, & spiritum exhalavit. Quis dulciorem sibi mortem fingere velit, aut possit?

Adesto, quæso sancte JOSEPH, mihi morienti, & impetra, ut me in agône jacentem, suspirantem, & exspirantem juvent, ultimum spiritum colligant, & in æternum suum contubernium recipiant JESUS & MARIA. Hoc idem, &c. pag. 2.

20. MART.

Sanctus JOACHIMUS MARIÆ DEI Matris Parens, & JESU filij DEI Avus beatissimus. Assensum suum trifariam divisit: partem templo sacram, alteram egenis communem, ultimam sibi & familiæ reliquam voluit. Testamentum hoc cœlo probatum esse ostendit Filia, quam seni dedit. In cœlum & pauperes nemo frustra est liberalis.

S. JOACHIME, ideo per te MARIA, & per MARIAM JESUS est

mundo natus, ut & ego MARIÆ filius adoptivus, JESU servus, & frater felici morte nascar cœlo. Ora & illum, & illam pro me, ut non pereat in me Nativitas, vita, sanguis, & mors JESU. Adesto mihi morienti, & me tecum ad JESUM & MARIAM filiam tuam deduc. Hoc idem, &c. pag. 2.

21. MART.

S. Benedictus Abbas libidinis incendium in animo gliscens sanguine suo inter spinas nudus abjectus extinxit, ut nunquam redierit. Anima ejus sponsæ instar ornata Cœlum subijt, clamante cœlo: Hæc via est, qua dilectus Domin. Benedictus ascendit. Delectaris¹ hac gloria? imitare vitam.

O dilecte Domini Benedicte, juva me precibus ac meritis tuis, ut ego nunc sim diligens & benedicens Dominum, ut etiam fiam in vita & post mortem dilectus & à

Domino benedictus. Hoc idē, &c.
pag. 2.

22. MART.

S. Catharina Sueca S. Brigittæ filia, Virgo & conjux: ut Virginitatem in tuto locaret, sese humi locavit pannis vilissimis tecta. Nil aggressa est (ejusdemque author fuit alijs) nisi DEIPARÆ prius diceret Ave. Placet tibi rarus MARIÆ favor? placeat & devotio in MARIAM.

Ora pro me unā cum sancta tua Matre, ut omnia, quæ aggredior, invocata MARI A incipiam, & eā approbante perficiam: ut etiam MARI A me in supremo maximè lectulo decumbentem invisat & juvet, quo æternūm vivam, & DEUM videam. Hoc idem, &c.
pag. 2.

23. MART.

S. Otho è studioso factus miles, sub Lothario Imp: primūm pro Innocent:

nocent: III. Papa, Equitis titulum retulit; dein pro Alexandro III. Papa contra Fridericum Imp: militans, ab hoc captus, carcerem & vincula tulit. Sed invocatus D. Bernardus dormientem manibus hostium eduxit. Post hæc sub DEO contra se stipendium meruit: nunquam melius, gloriosius nunquam.

Sancte Ocho, adesto mihi cum sancto tuo Bernardo, ut quando morsex carcere hoc me educet, in libertatem videntium, non in carcerem cæcorum educar: & impetra, ut ubi vincula hæc mea disruperit DEUS, sacrificem illi hostiam laudis vobiscum in æternum. Hoc idem, &c. pag. 2.

24. MART.

S. Simon parvulus Tridentinus, menses vix dum 29. natus, à Judæis forcibus concisus, acubus toto corpusculo punctus, distensus,

varijs

varijs modis excarnificatus, crucifixus, morientis Christi Martyr victima factus est. Quàm, putas, placuit DEO hæc innocens victima?

S. Puer, adsis mihi morienti, & si pro Christo non potero, saltem in Christo, ut sanctè moriar, impetra. Hoc idem, &c. pag. 2.

25. MART.

Hodie SS. Trinitatis nomine salutante MARIAM Angelo, & Spiritu S. obumbrante, in Virginis utero est VERBUM CARO FACTUM. Verè dies lætitiæ!

Ave MARIA, gratia plena, Dominus tecum, Ancilla Domini, Mater DEI, in qua hodie Verbum caro factum: esto mihi MARIA, impetra, ut in gratia moriar, ô gratiâ plena! ut Dominus sit mecum, & ego cum Domino in æternùm. Obenedicta in mulieribus, ora, ut benedictus fructus ventris tui sit mihi

vi-

viventi & morienti JESUS. Ita fiat, OS. MARIA, Mater DEI, Mater viventium & morientium, & p̄t̄adestinatorum. Sancte Gabriel, saluta mecum, & pro me MARIAM, & doce me illam salutare, ut oret pro me, oret nunc, dum vivo: nunc, dum oro: nunc, dum sum in periculo damnationis æternæ, & tunc in hora, tunc in momento, tunc in sudore, tunc in agōne mortis meæ. Hoc idē, &c. pag. 2.

26. MART.

S. Ludgerus Episc. parvulus etiamnum rogatus, quid toto die egisset, libros se vel scripsisse, vel legisse respondit. Et quo Doctore? DEO, aiebat. Hinc ad mortem usque orationibus, sacris lectionibus, concionibus fuit intentus. Tanti est, bono Doctore uti.

Ora pro me, sancte Ludgere, ut omnia, quæ totâ die, totâ vitâ & mor-

morte agam, & patiar, DEO Do-
ctore agam & patiar: ut in æterni-
tate ibi sim ego discipulus, ubi est
Magister meus DEUS. Hoc
idem, &c. pag. 2.

27. MART.

S. Rupertus Vangionum Epif.
Virgis per urbem cæsus, in exilium
actus, in Bojariam venit, quam to-
tam Christo subegit. Ipso Paschatis
die post sacrum morienti Angeli
candidati Alleluja accinuerunt. Si
cum DEO es, patriâ dulcius est exi-
lium.

Adesto & mihi cum Angelis tuis
S. Ruperte, & mortem alias hor-
rendam, tuo, Angelorúmque au-
xilio amabilem effice, ut uterque
DEO nostro felix Alleluja æternùm
cantemus. Hoc idem, &c. pag. 2.

28. MART.

S. Guntramus Rex, ut plura sibi
pro morte & iudicio auxilia præpa-
raret, in egenos ac templa regias
gazas

gazas profudit. Refudit dormienti thesaurum opulentissimum DEUS, quem ipse effossum in pauperes & templa denuo effudit, ut thesaurum haberet in Cœlo. Hominem vis habere debitorem: cur non & DEUM?

Ora pro me S. Rex, ut quidquid mihi morienti vel solatio, vel auxilio fore cognovero, id faciam: & nunc serîò in singulis, quæ ago, mihi thesaurizem thesauros æternos in aurea æternitate. Hoc idem, &c. pag. 2.

29. MART.

S. Mechtildis in carnem suam tam austeram fuit, ut & carne, & lecto, & vino, quoad vixit, abstinuerit. Ægram solata est MARIA, & ei Eucharistiam Angeli porrexerunt. Qui vivunt in carne ut Angeli, quidni habeant ministros Angelos?

O Sancta Virgo, hæc mihi morienti solatia impetra, ut JESUM,
MA-

MARIAM, & Angelos unà tecum habeam protectores : ut sine SS. Eucharistia non discedam ex hac vita mortali. Hoc idem, &c. pag. 2.

30. MART.

S. Regulus Episcopus ad aram faciens mortis S. Dionysij & Sociorum nuntium per tres columbas accepit, quæ trium Martyrum nomina ore ferebant. Contra superstitionem animosè bellum gessit. Signo crucis pro clave usus, carceres aperuit, & victos liberavit, & Doemonibus terribilis extitit. Annon in cruce victoria?

Sancte Episcope ora pro me, ut nec nunc, nec in agōne meo videat in me quidquam doemon toties à te victus, ut denique meum etiam nomen, non infernales corvi, sed columbæ cœlestes ferant, & legar inter Electos. Hoc idem, &c. pag. 2.

31. MART.

Sanctus Guido Bertholdū quondam

dam in agone supremo ob conscientiaë stimulos valde lunctantem, quòd ei peccatum, licèt per oblivionem omiffum, serverè objicerent Dœmones, juvit : & ut sibi redderetur, à DEO impetravit. Quis pro agone tam difficili non patronos quærat?

S. Guido, juva & me, ubi me in difficili illo agone videris; ut in pace conscientiaë puræ, & in pace Christi requiescam. Hoc idem, &c. pag. 2.



APRILIS.

SANctus Walericus puer Pastor & hortulanus tam innocens, ut aves & vermiculos è manu sua pasceret; Spurciloquentiaë tantus osor, ut rigente bruma in ædibus morari nollet, ubi Sacerdos & loci præfectus fæda loquebantur. Abijt: at

at ille oculis captus, iste contabescens, poenas dederunt. Non vis infici à spurciloquentijs? procul esto.

S. Walerice, ora pro me, ut quidquid loquor, cogito, facio, purissimos DEI omnia videntis & audientis oculos aurésque non offendant. O vivam & moriar in DEO, coram DEO, & propter DEUM! Hoc idem, &c. pag. 2.

2. APR.

S. Franciscus de Paula Minimorum Fundator virtutibus quidem omnibus insignis erat, sed potissimum charitate; teste cœlo, è quo ad ipsum globo igneo inscripta charitas descendit. Eâ sic arsit, ut ipse ignes sublunares impunè tractaret, & alios sancto amore inflammaret. Hoc igne ardere, & pulchrum & amabile est.

S. Francisce, experiar & ego ignes tuos! Certè si viveres, Charitas

ritas tua non pateretur, ut morienti mihi non adesset, si posses. Nunc potes : O juva , ut ignis DEUS , hoc est, Caritas ita me accendat, ut in me extinguat , consumat, & consummet omne, quo cum non licet mihi DEUM amare ; & ut in charitate vivam , in illa moriar, æternúmque sim charus charissimo meo & tuo DEO. Hoc idem, &c. pag. 2.

3. APR.

S. Richardus ex paupere creatus Episcopus , cum honore mores, ut solet, non mutavit. Vasis aureis & argenteis in pauperum annonam expensis, aiebat : præstare more parentis fictilibus cœnare, quàm Christum in pauperibus esurire. Moriturus à sacerdotibus iterari sibi continuò voluit; MARIA Mater gratiæ &c. denique Crucifixi complexibus immortalus. Sic mori optas ? sic vive.

S. Ric.

S. Richarde, ora pro me JESUM Crucifixum, & MARIAM piissimam ejus matrem, ut ita tuo exemplo instructus vivam; ut aliquando inter JESUM & MARIAM piè moriar, & tecum illis æternùm asocier in cœlis. Hoc idem, &c. pag. 2.

4. APR.

S. Theodulus Juvenis & Agathopus senex, in carcere ab ipso Numine animati ad patientiam, ita pro Christo steterunt inter tormenta, ut Tyrannum in ruborem, in lassitudinem dederint tortores. Si velit te DEUS pati; an putas, prudenter renuis?

O Sancti Martyres!! animate hoc miserum corpus meum, ut pro DEO libenter & ubique patiat; ut post mortem felicem pro momentaneo, quod passum est, æternitate gloriæ induatur. Hoc idem, &c. pag. 2.

D

5. APR.

5. APR.

S. Vincentius è Divi Dominici familia, ab ipfomet Christo morbo levatus, & juffus ad pœnitentiam populos evocare. Cui labori fic vacavit, ut 25000. Judæorum, totidem Saracenorum Christo conciliârît: Christianorum verò 12000, reconciliârît: publicè infamium 40000. ad innocentiam reduxerit. Tot fpolijs triumphantem, fpoliare orcus caftitate contendit, fed fruftra. Sic ille cum MARIA, & MARIA cum illo pugnavit, ut vinceret Vincentius. Hoc eft fervum DEI gnavum effe & fidelem.

Sancte Vincenti, accende & cor meum, ut DEI amore ardeat: & pro me ora, ut nulli fit fcandalo vita mea; plurimis verò bono exemplo: ut mors, uti me viventem ex hac vita eximet, ita me det vitæ beatæ & æternæ. Hoc idem, &c. pag. 2.

6. APR.

S. Guilielmus ostensâ sibi ab Odone Abb. Crucifixi imagine, ita amore ejus exarsit: ut relicto sæculo Religionem petierit. Morientem ad coronam prius exhibitam eduxit Christus. Quidnî morientem ducat JESUS, quem viventem habuit sequacem?

O sciam inspirationibus parère divinis! sciam præ mundo æstimare cœlum! Ora pro me S. Guilielme, ut hoc unum me JESUS doceat, ut sciam, & velim, & faciam: ut vita mea sit expers sæculi, & mors mea sit origo beatæ æternitatis. Hoc idem, &c. pag. 2.

7. APR.

S. Hermanus, Joseph dictus, sic à septimo ætatis anno MARIAM coluit, ut eum ipsa in templo ad Filiolo suo & D. Joanni colludendum invitaret. Ut in ediam suam levaret, saxum ei MARIA monstravit, unde, quoties egeret, nummos pro-

D 2

meret.

meret. A MARIA sic amabatur, ut ei & Sponsi sui nomen daret, & eum in Sponsum acciperet. MARIE nomen non nisi humi prostratus audijt: unde odoribus semper cœlestibus est afflatus. Tanti est sincerè MARIAM amare.

Utinam & ego JESUM & MARIAM serò amarem! fortè mihi hætenus blanditus, meipsum decepi, quasi MARIAM amem. Occurram jam seriò in odorè JESU & MARIE! Ora pro me Sanctè Josephæ, ut morienti mihi sint solatio duo illa nomina, ut ubi in terra felici morte prostratum jacuerit pigrum hoc corpus meum, odore cœlesti pascat animam in cœlo DEUS. Hoc idem, &c. pag. 2.

8. APR.

S. Wicterpus Ep. post mortem D. Herluçæ Virgini apparens Christum à Pilato ostensum exhibuit, & expavescenti dixit, sic eum la-

niari

niari à tractantibus & sumentibus indignè Eucharistiam. Sancta sanctè tractari debent.

Esto & mihi comes S. Wicterpe, cum aliàs, tum maximè, quando ultimò accipiam illud Viaticum & pharmacum immortalitatis ; ut JESUM in cœlo mihi ostendens dicas : Ecce homo ! Ecce DEUS ! & corde sancto illum æternis amoribus amemus. Hoc idem, &c. pag. 2.

9. APR.

S. Maria Ægyptiaca, à teneris Veneri dedita, Hierosolymis in festo Exaltationis S. Crucis è templo ter divina vi repulsa, ad DEI param MARIAM conversa aditum impetravit. A quâ jussa Jordanem transiit, & quidquid homines inter peccârat, inter feras lacrymis eluit. Confide: Propitium habes Judicem, si Judicis Matrem Patronam habes.

O magna Pœnitens , impetra mihi à JESU per MARIAM, ut nunc seriò illa omnia amarè defleam, quæcunque amariorè reddere mihi possunt, amarum alias etiam, agônem mortis meæ ; & non repellar, sed inducar in templum æternum. Hoc idem, &c. pag. 2.

10. APR.

S. Macarius Pat. Ant. Christi sepulchrum invisens, à Saracenis ad ossa usque laceratus, pavimento tribus clavis affixus, ignito supra pectus saxo imposito, sed ab Angelis liberatus, in Flandria se cum socio gemino sui pro urbe victimam obtulit. Nil DEO charius ; & nil in orbe carius Charitate.

Eja, S. Macari, age, ut ita me Angeli, ita tu, ita MARIA, ita DEUS hic peregrinum juvet, ut semper ab animi peste omni sim immunis : & sanus, ac æger DEI semper sim

victi-

victima, sinq̄ue etiam moriens vi-
vum holocaustum DEO. Hoc
idem, &c. pag. 2.

I I. APR.

S. Guthlacus è nobili & milite
Eremita, Insulam ab hominibus
quidem desertam, sed doemonibus
infestam habitavit. Risit vanas
doemonum minas, & vicit. Inde
ab Angelo quotidie visitatus, &
contra insidias armatus. Latrare
diabolus potest: mordere non po-
test, nisi volentem.

Sancte Guthlace, age, ut ita me
per Angelum tuum Custodem ar-
met DEUS, ut Angelo meo semper,
doemoni nunquam vel in minimo,
quidquid suggerat, obediam: &
quotidie me diei æterno parem, &
ibi cum Angelis bonis, ac tecum ad
majorem DE I gloriam æternum
triumphem. Hoc idem, &c. pag.

I 2. APR.

S. Alferus ad Regem Germa-
D 4 norum

norum Legatus à via aberrans, ad Regem Regum in Cœnobium Cluniacense deflexit. Hanc ei sortem invidens Dœmon, ex altissimo monte eum dejecit: sed incolumis dœmonem risit. O te felicem, qui ut ad DEUM venias mundo aberras!

Impetra mihi sancte Alfere, à DEO meo vires solidas, & DEI cordi affixum cor, ut hoc velim, quod DEUS vult; non verò quod Dœmon, Caro, & Mundus, præcipitare me volentes: atque ita me è lecto mortis meæ ad cœnam vitæ æternæ invitet, & perducatur Rex æternæ gloriæ. Hoc idè, &c. pag. 2.

13. APR.

S. Hermenegildus Rex jussus à Patre Leovigildo Arriano, Catholicis sacris spretis, Ariarium in Pachtate profiteri; cum nollet, in carcere vinctus primùm, dein ipsa

Pa-

Paschatis nocte securi percussus.
Disce, quousque Parentibus ob-
temperandum.

Regie Juvenis, S. Hermenegil-
de, doce me ita humanos respe-
ctus, timores, ac spes omnes pro
DEO & æternitate despiciere, sicut
tu Regis Patris iussa, & minas de-
spexisti; ut nullus dæmonum,
nullus hominum, nulla creatura
me à DEO meo possit abducere:
sed in illo sperem, illum amem,
timeam, qui amorem & timorem
omnem verè meretur; in cuius
manu & cœlum est & gehenna: &
postquam corpus felici vel infelici
morte occiderit, tu mihi felicem
impetra, ut tecum sim æternùm
felix. Hoc idem, &c. pag. 2.

14. APR.

S. Ludwina, ut castitati forma
non noceret, à DEO deformari pe-
tijt. Audiijt DEUS votum, & eam
morbis sic exercuit, ut nemini pla-
ceret,

ceret, præterquam Christo. Sic 38. annos exercita, adstante JESU & MARIA cum Angelis migravit ad cœlum. Placet DEO, quisquis novit pati.

S. Virgo, quæso, illi felices tui erga JESUM & MARIAM amores & dolores mortis de salute incerto ac trepido intercedant; ut JESU & MARIÆ ope felix abeam ad illam, quæ sic amantibus præparata est, æternitatem. Hoc idem, &c. p. 2.

15. APR.

S. Casilda Virgo Regia furtivè ex Regis Patris mensa captivis Christianis cibos ferebat. Deprehensa, ut Patris iram evaderet, dixit se rosas ferre: exhibere jussa, & ipsa, & parens cibos vidit in rosas conversos. Tam chari sunt DEO, quibus captivi pauperes chari sunt.

Tuis precibus, ô sancta Virgo! mihi misericordem illum animum
im-

impetra, ut roſas hîc mihi colligam, eâſque per pauperum manus præmittam in cœlum, quibus me pauperum Pater JESUS coronet. Hoc idem, &c. pag. 2.

16. APR.

S. Joachimus Confess. tanta in DEUM & proximum charitate flagrabat, ut epilepsiam ab epileptico in se transferri à DEO impetrârit. Et ut plus amore DEI pateretur, vermibus absumi petijt, nec negatum. Malè non moritur, qui libenter opera charitatis exercet.

Ora pro me, S. Joachime, ut ea in omnes charitate sim, quam à me postulat DEUS meus, & opera charitatis libenter exerceam : ut sic me vivum animet Charitas, sanctæ morti me paret Charitas, & DEO Judici, qui Charitas est, me sistat Charitas. Hoc idem, &c. pag. 2.

17. APR.

S. Helenus, è mundo prius quàm

pueritia exijt, tutius inter feras, quàm homines victurus, Jejunia diu producenti dæmon escas obtrufit: fed respuit, & dapes Angeli ministrârunt. Mundus, & dæmon, etiam cùm benefacere videntur, cavendi.

Attende & mihi, ne quâ arte, vel dæmon, vel homo, à dæmone substitutus inescare me possit, & morti me æternæ addicere. Dæmonis esca est, quidquid peccatum est. O jejunem ego ab his escis! ut post talia jejunia ad æternas epulas me Angeli sancti à morte abducant. Hoc idem, &c. p. 2.

18. APR.

Sanctus Ursmarus priusquam natus, matri ostensus per scalam in cœlum eniti. Paratus quotidie animas suomet sanguine cœlo lucrari: patientiâ admirabili, ceu Jobus, cœlum conscendit. Nec facilior, nec planior est via in cœlum, Patienriâ. Opa-

O patiar & ego libenter, ut patientia mihi scala sit, quâ moriens in coelum ascendam! ora pro me, ut ita in patientia vivam, quo mihi mors mea sit pretiosa in coelum scala, non præcipitium ad infernum. Hoc idem, &c. pag. 2.

19. APR.

S. Wernerus in agro Trevirensi ruri natus, 14. annorum à Judæis crucifixus, triduo excruciatuſ, è cruce ad Paradisum abiit. Corpus in speluncam abjectum: ne lateret, accensis multis facibus coelum parentavit. Cœlo displicere non potest, cui placet pro Christo pati.

Rogo pro me JESUM Crucifixum, parvule Crucifixe Martyr, ut ponat Crucem & mortem suam, inter mortem meam, & tribunal suum: & quod mihi deest, illud de tuo ac suo sanguine suppleat, ut felicem æternitatem consequar. Hoc idem, &c. pag. 2. 20.

20. JAN.

S. Agnes Politiana è S. Dominici familia, quindecim annos solo pane & aquâ vixit: à B. V. JESULUM, ab ipso crucem, quam portabat, in finem tanquam amoris tesseram accepit. Ex Angeli manu sæpè SS. Eucharistiâ refecta. Morienti Angeli adfuère. Quid mirum? Angelico more vixit.

Exere, ô B. Agnes, vim calidissimarum precum tuarum, & impetra mihi à MARIA, ut semper JESUM in corde habeam: ut sim totus JESU, & totus MARIÆ in tempore & in æternitate. Hoc idè, &c. pag. 2.

21. APR.

S. Anselmus Cantuariensis Episc: ostendente DEO, vidit mundum non esse nisi cænosam paludem, in quâ homines suas delicias piscarentur. Indignum hoc ratus, ad religiosa septa, quæ sibi instar regiæ ap.

apparebant, transivit. Vis mundus esse, mundum fuge.

Sancte Anselme, ora pro me, ne immundus mundus me abyſſo inferni demergat. Ora quaeso, ne in portu, hoc est, morte naufragium patiar felicitis aeternitatis; sed ad illud Regis DEI palatium in aeternitate perveniam. Hoc idem, &c. pag. 2.

22. APR.

Sanctus Theodorus à DEO puer adhuc sexennis ad suum obsequium tractus: sed mater (Noverca potius) obstitit: Non tulit DEUS: per S. Georgium stricto mucrone mortem minatur matri; si à pijs exercitijs filium avocaret. Ni iratum vis experiri DEUM, cave sancta aliorum consilia impedire.

Exora mihi, S. Theodore, hanc à DEO gratiam, ut nihil me à DEO & pijs avocet. Pietas enim ad omnia quidem, sed ad mortem sanctè obe-

obeundam vel maximè utilis. Quare obsecro, impetra mihi, ut piè, & cum pijs vivam, & piè moriar. Hoc idem, &c. pag. 2.

23. APR.

S. Georgius Tribunus cùm Diocletiani tyrannidem palàm dånaret, vincula, saxum ingens supino pectore, horridam cultris machinam, ferreas crepidas igne candentes fortiter perpeffus, se Christi militem probavit: & dato pro Christo capite coronatus. Æternùm non patietur, qui patitur pro Christo.

Fortissime Martyr Georgi, ora pro pigro hoc, & ad dura pro æternitate sustinenda delicato nimis corpore. Patiatur nunc, ne patiatur æternùm; currat, quò anima & DEUS vult, ut cœlum, non infernum comprehendat, ac in morte à Christo coronetur. Hoc idem, &c. pag. 2.

24. APR.

24. APR.

S. Bona V. septennis, ut pudorem servaret suadente Christo, stramine usa pro lecto, cilicio pro veste, tres quot hebdomadis dies solo pane & aqua exegit, reliquis non nisi leguminibus vixit. Pudorem vix tuetur, qui carni blanditur.

Impetra mihi, ô Bona Virgo, ut carnem meam severè habeam, ne recalcitret, & à via cœli me excutiat. Impetra mihi præterea, ut bonâ, & sanctâ vitâ me parem ad bonam & sanctam mortem. Hoc idem, &c. pag. 2.

25. APR.

S. Marcus Evang. Alexandriae ipso Paschatis die ad aram captus, nocte Angelo exhibente nomen suum in libro vidit: de quo cum gauderet & gratias ageret; Christus pacem est precatus, ad quam altero die laqueo præfocatus accessit. Hæc pax non nisi per adversa obtinetur.

San.

Sancte Marce, exora & mihi pacem illam à JESU, pacem cordis, pacem vitæ, mortis, æternitatis, ut in albo Beatorum inscriptus, felici morte, in pace in idipsum dormiam, & requiescam æternum. Hoc idem, &c. pag. 2.

26. APR.

S. Basileus Ep. dum Glaphyrâ V. protegit, ne prostituatur, suam vitam prodigit. Jussus aut fidem, aut caput ponere, hoc abjecit in cœlo coronandum. O si quisque suum, ut hic alienum, tueretur pudorem.

Sancte Basilee, ora pro me, ut sic inter homines degam, ut & pudorem meum non prodigam, & alienum in periculum non adducâ; ut ita felici morte defunctus in cœlo merear coronari, & tecum æternum DEUM cum sanctis laudare. Hoc idem, &c. pag. 2

27. APR.

27. APR.

S. Sita V. Ancilla mirè in pauperes liberalis, ut cœlum emeret. Placuit DEO: unde panis frustula in flores, aquam pauperi porrectâ in vinum convertit. Redeunti sub noctem è templo, B. V. & pontis & urbis portas aperuit. Quanta felicitas, da frustulum panis, & recipe cœlum.

O Amem & ego pauperes, quia illos amari vult DEUS! Ora pro me, ut sub vitæ noctem mihi adsit precibus tuis invitata MARIA ad portas mortis, sitque mihi ipsa cum JESU porta ad vitam æternam. Hocidem, &c. pag. 2.

28. APR.

S. Vitalis Miles & Martyr SS. Gervasij & Prothasij Pater, Ursicinũ Medicum, ut Martyrium fortiter subiret, animavit; & ipse post equuleo tortus, terra & lapidibus obrutus, quod alterum monuit, præstitit.

tit. Is enim verè magnus est, qui quod alios docet, ipse facit.

Sancte Vitalis, tuis apud DEUM meritis hoc mihi impetra, ut nec doctrina mea, nec vita alijs sit offendiculo; sed quod alios doceo, ipse faciam; ne alijs viam cœli ostendens, ipse aberrem. Hoc idem, &c. pag. 2.

29. APR.

S. Petrus M. è D. Dominici familia, zelosissimus contra Hæreticos Prædicator, audire à B. V. meruit: Ego rogavi pro te, Petre, ut non deficiat fides tua. Ab hæretico in odium fidei interfectus. Quid obest hanc ob causam odio haberi?

Ora pro me MARIAM, sancte Petre, ut JESUM pro me roget, ne vel in vita, vel in morte mea ullo modo deficiat, sed semper proficiat fides, spes, & charitas mea: ut sic illius lateri post mortem æternus cliens adhæream. Hoc idem, &c. pag. 2.

30. APR.

30. AFR.

S. Catharina Senensis septennis à B. V. Christo desponsata, ut sponso similior esset, spineam præ autea coronam elegit, & capiti impressit. Tu eligis coronari & auro? cave.

Dilecta JESU Sponsa Catharina, impossibile est, ut impetrare non possis, quod voles à JESU tuo, & tua MARIA: impetra ergo mihi, ut in hac vita eligam cum Christo, & propter Christum affligi: ut aliquando in JESU Crucifixi, & MARIE complexu puram animam in coelo coronandam expirem, semper tecum beatus futurus. Hoc idem, &c. pag. 2.



MA-



M A J U S.

I. MAIJ.

SS. Philippus & Jacobus: quorum ille à Christo Patrem sibi ostendi ardenter desideravit, & impetravit, postquam sub annum 54. in Scythia pro Christo crucifixus & lapidatus est. Hic carne, vino & ficera à teneris abstinens, tam multus in orando, ut ex flexione genua callum obduxerint. Cùm Hierosolymæ Ep. 30. annos fuisset, anno 63. è templi fastigio dejectus mortem pro Christo obiit: quanto putas gaudio!

O sanctissimum par Apostolorú! orate pro me, ut in abstinentia, oratione, & patientia ita secundum DEI voluntatem vivam, ut morienti mihi JESUS Magister meus ostendat Patrem. Hoc idem, &c.

pag. 2.

2. MAIJ.

2. MAIJ.

S. Athanasius innocens calumniam passus à fœmina, vim sibi à S. Viro illatam, & ab Arrianis, ab eo occisum Arsenium mentientibus, exul totum pene orbé pererravit: in cisternâ annos 5. latuit: redux Alexandriam quatuor menses in patris sepulchro: mortuus in cœlo vivit. Vis & tu animam tuam possidere in cœlo? patere.

S. Præsul, impetra mihi hoc ad bene moriendum certissimû præsidium, patienter ferre, quidquid in me machinatur mundus; ut post mortem experiar, quàm magna sit merces, quæ propter justitiam innocenter patientibus est promissa. Hoc idem, &c. pag. 2.

3. MAIJ.

Debellato per Constantium Maxentio, Helena dejecto Veneris fano & statuâ, salutiferam Christi Crucem cum geminis alijs è terra eruit.

eruit. Quæ Christi esset, docuit moribunda, cui attactu sanitatem reddidit. Thesaurum quæris? vel Crucem Christi, vel missam à Christo Crucem accipe.

Crucifixe JESU, da, ut tua Crux, sicut tibi pro me morienti mortua-
lis fuit lectulus, ita mihi morienti æterno sit solatio: & quia illam ideo, ut me invenires, conscendisti; ne quæso me à facie tua perire permittas, sed fac, ut sim inter tuos æternùm. Hoc idem, &c. pag. 2.

4. MAIJ.

S. Monica Manichææ Hæresi mortuo filio Augustino tam copiosas lachrymas fudit; ut diceret S. Ambrosius, fieri non posse, ut tantarum lacrymarum filius periret. Si matris lachrymæ pro filio tantùm valuerunt; quid tuæ pro te ipso?

Ora pro me, unà cum S. Filio tuo, S. Mater, ut sim & ego filius non jam lachrymarum, sed orationum
num

num tuarum; sitque impossibile,
ut filius tantarum precum intereā.
Hoc idem, &c. pag. 2.

5. MAIJ.

Hodie S. Monicae lachrymae fru-
ctum pepererunt: nam accedente
tum lectione SS. Scripturarum, tū
S. Ambrosij adhortatione, tum
aliorum exemplo, puduit Augusti-
num non posse, quod potuissent isti
& istae: & factus ex Manichæo Ca-
tholicus, ex Rhetore Doctor Ec-
clesiae, ex mundi amatore, summus
contemptor. Et quid moras ne-
ctis in Conversione?

Doce me legere cum fructu di-
vinam Scripturam, & imitari San-
ctorum exempla; ut sicut tu per ea
ex morte deductus fuisti ad vitam,
it̄ ego ex hac mortali vita deducar
ad ~~eternam~~ aeternam. Hoc idem, &c.
pag. 2.

6. MAIJ.

S. Joannes Damascenus, cūm à
E Leone

Leone Iconomacho manus ei ob-
defensas SS. Imagines abscissa effet,
coram MARIÆ icone familiarius
questus integram recepit : quam
deinde in Virginis laudes totam
impendit. Tu tuam quomodo im-
pendis? pudeat!

Porrigere mihi, S. Damascene,
auxiliarem manum tuam, & pone
me precibus tuis juxta MARIAM, &
deinde cujusvis manus pugnet con-
tra me viventem & morientem.
Hoc idem, &c. pag. 2.

7. MAIJ.

S. Stanislaus Ep. Cracoviensis,
ut prædium à Viro nobili pro Ec-
clesia emptum contra adversarios
defenderet, mortuum jam vendi-
torem ex tumulo ad Judicè duxit.
Cùmque improbam vitæ licentiam
in Rege sæpe argueret, ab eodem
in templo occisus est. Sic scilicet
mundus remunerat.

Corripe me, dum malè ego. : &
ad-

adeſto mihi moribundo tua ope ,
 non ut me ad vitam hanc revoces,
 ſed ut ad æternam voces ; ſiſque ad
 propitium JESU tribunal , inde us-
 que ad cœlum Comes. Hoc
 idem, &c. pag. 2.

8. MAIJ.

S. Michaël Archangelus in mon-
 te Gargano hodie ad ſpeluncam
 quandam , quò cujuſpiam taurus
 fugerat , nec inde revocari poterat,
 apparuit ; ibique DEUM in ſe & cæ-
 teris Angelis coli velle docuit : un-
 de ibi templum ejus cultui eſt ædifi-
 catum. Tu animam tuam ei in
 templum exſtrue.

S. Michaël Præpoſite paradifi ,
 cujuſ oratio perducit ad regna
 Cœlorum , pro me indefinenter
 ora , ut in anima mea ſemper vigeat
 cultus tuus , mei Cuſtodis & om-
 nium Angelorum ; ut in morte ve-
 ſtro gaudeam auxilio , & poſt mor-
 tem vobiscum DEUM laudem æ-

ternum, Hoc idem, &c. pag. 2.

9. MAIJ.

S. Gregorius Nazianzenus Athenas petens gravi tempestate jactatus, vovit, si maris undas evaderet, se Baptismatis undis mergiturum, & vitam inter Religiosos acturum. Reus voti factus, utrumque explevit, & coelum petijt. Nimirum sine adversis coelum non aditur.

Ora pro me, ut & ego ita hic omnia agam, ita omnia patiar, ut JESUM æternum videam. Dicam ego moriens, id quod tu, cum patereris, dicebas: Etsi ambulavero in medio umbræ mortis, non timebo mala, quoniam tu mecum es. Hoc idem, &c. pag.

10. MAIJ.

S. Glyceria V. cum Lampadophoria celebrarent, in publicum prodijt: cruce frontem signans, aliâ lampade sibi opus esse negavit:
quo

quo dicto & facto Jovis statua corruit. Ipsa inter acerbissimas pœnas Angelum habuit consolatorem. Verè nos Crucis pretium nescimus.

O sancta Virgo, signa me, & in periculo DEUM offendendi, & in ultimo potissimum agone, signo salutiferæ Crucis; ut omnes Dæmonis molitiones in nihilum cadant, & ego securè DEO serviens ad æternitatis ducar triumphos. Hoc idem, &c. pag. 2.

II. MAJ.

S. Anthymus Presbyter propter Christum alligato ad collum saxo in Tiberim projectus, à coruscante Angelo liberatus est: multos ad Christum & Martyrium adduxit, quos denique & ipse capite plexus, est secutus. Perfectus DEI amor solus esse non potest.

Impetra mihi illum perfectum amorem DEI, ut, quotquot possum,

sum, ad ejus amorem alliciam verbo & exemplo : sic confido, in hora mortis non defuturum mihi Angelum ejus, qui ex tenebris hujus mundi me in lucem perpetuam educat. Hoc idem, &c. pag. 2.

12. MAIJ.

S. Pancratius patre orbis 14. annorum puer, ubi Romæ aquis salutis à Pontifice tinctus est, non diu latuit Diocletianum. Raptus ad tribunal, maluit vitam perdere & DEI Filius esse, quàm Jovem adulterum (sic eum vocabat) colere & à Diocletiano in filium adoptari. Et hæc summa sapientia est.

Adjuva nos precibus tuis, sancte puer, ut quam exemplo docuisti, bene & perfectè discamus Coeli sapientiam : omnia scilicet malle perdere, quàm Christum : sit mihi præ omnibus mundi delicijs & gazis Christus, ut in ipsius amore vivam & moriar. Hoc idem &c. pag. 2.

13. MAIJ.

13. MAIJ.

Sanctus Joannes Silentarius magnarum opum hæres, MARIAM ex asse hæredem, extracto nobilissimo in ejus honorem templo, vivus scripsit. Tanta fuit animi integritate, ut nudum se quoad vixit, nunquam aspexerit: quâ verecundia B. V. summè charus fuit. Putas multos inveniet MARIA hodie, quos amet?

Obsecro, S. Joannes, instilla hanc animo meo virtutem, & in MARIAM liberalem charitatem, ut ipsi sim charus; quo spero fiet, ut mihi ipsa in ultimo agône assistat, & non sinat, quem charum habuit, eò abripi, ubi amare in æternum non amplius potest. Hoc idem, &c. pag. 2.

14. MAIJ.

Sanctus Bonifacius Roman: quòd cum Aglaë impudicè versatus esset, pœnitentiæ causâ ad conqui-

renda SS. Martyrum corpora & sepelienda peregrinatus est. Tharsis Ciliciæ Martyrum vincula exoscilians, captus, in tormentis DEO gratias egit. Peccâsti? ne pereas, plenè poenitentiam age.

S. Bonifaci, in hoc mihi benefac, quantumvis jmerenti, & quem vides tot peccatis, & peccandi consuetudinibus quasi sepultum, excita, quibus modis potes ad poenitentiam, & tuis precibus adjuva; ut, priusquam hora ultima appropinquet, dignos poenitentiae fructus faciam. Hoc idem, &c. pag. 2.

15. MAIJ.

S. Dymrna Regia Virgo à proprio parente in thorum plecta, ut & Virgo & DEI sponsa maneret, ultra mare fugit: sed etiam illuc Barbarus leno, Pater, penetravit. Cùmque ad scelus filiam movere non posset: gladio peremit. Cadaver Angeli in candidissima marmorea

more a urna sepelierunt, & Virginis nomen rubeo lapillo inscripserunt. Si Castorum funus cœlum curat : quis Impurorum ?

O age, castissima V. ut semper unâ tecum mortem potiùs eligam, quàm quodlibet peccatum ! age ut hîc mihi corporis & animæ puritas cordi sit, ut moriens ab Angelis porter in Cœlum, & nomen meû in DEI pectore scriptum reperiam. Hocidem, &c. pag. 2.

16. MAIJ.

S. Ubalduſ Ep. curatis duobus cæcis, tertio idem roganti ſuaſit, ut cæcitatem mallet, quàm lumen, cordi tenebras allaturum. Ab infimæ fortis homine publicè ignominiâ affectus, pro vindicta ei ofculum tulit. Pudeat eum, dices, animi tam abjecti : imò te pudeat animi tam malè Chriſtiani.

Impetra mihi, S. Ubalde, & nunc & in agône meo verum cor-

dis lumen, & contra omnes inimicos cor amicum, ut illud & vivens, & moriens possideat JESUS. Hoc idem, &c. pag. 2.

17. MAIJ.

S. Torpes ex impia Neronis aula pijsissimus aulicus, quòd precibus suis æmulam cœlo machinam, quã Nero novus in terris Jupiter mortalibus illudebat, fregisset, factus ex aulico Martyr, & Cœli multò solidioris hæres. Stultus est, qui Cœlum sibi fabricat in terris.

Apta me aulæ cœlesti, ô S. Aulice ne mihi Cœlum fragile & vitreum in terris quæram: sed æternum in DEO mihi Cœlum ita vivendo ædificem, ut animam meam post mortem meam Cœlo invehas. Hoc idem, &c. pag. 2.

18. MAIJ.

S. Erícus Sueciæ Rex, Christo regna lucrari studuit, Patriæ & pauperum Pater dictus. Æstus libidin

nis

nis glaciali aquâ suffocavit. Cæsis bello hostibus lachrymis ipse suis parentavit. Hic verè Rex est, qui se bene regit.

Ora pro me, S. Erice, ut sanctorum præclarè facta animo generoso imitari nec tædeat, nec pigeat: & ut in hoc sedulò incumbam, ut passiones meas Christi JESU Regi Regum subjugem, & multorum cum his præliorum Victor, in cælo triumphem. Hoc idem, &c. pag. 2.

19. MAIJ.

S. Ivo Juris-Consultus Christum in persona pauperis habuit convivam: panes orando auxit, morbos curavit, flammæ precibus extinxit, signo Crucis per aquas sibi viam fecit, inter suavissimos Crucifixi amplexus ad DEI tribunal abiit suam causam acturus, & vicit. At quomodo ais? pauperum, dum vixit, viduarum & pupillorum fuit Advo-

catus: his linguam suam non vendidit, sed eorum causas beneficijs & Eleemosynis emit. Nescitis, ô Juris-Consulti, quàm sit bona pauperum causa!

S. Ivo, ecce animam meam pauperulam! habet hæc læsæ majestatis divinæ rea causam difficilem apud DEUM agendam. Obsecro, causam ejus suscipe: ut verò feliciter tractare possis, impetra mihi illam tuam in pauperes charitatem, ut illis benefaciendo, multos habeam apud DEUM pro causa mea intercessores. Hoc idem, &c. pag. 2.

20. MAIJ.

S. Bernardinus Senensis, solâ suâ præsentia turpiloquia compe-
scuit, quando & alapâ in viro ea castigavit. Fœminas omnes animo, præter MARIAM delevit: hujus coronam tam attentè oravit, ut illi assidens diceret: Bernardine in hæc
de-

devotione multum mihi complacui. De JESU nomine tam ardentem dicere solitus, ut JESU nomen caput ejus illustraret. Quam proficua in JESUM & MARIAM devotio! sed quam paucorum!

Ora, ut & ego duobus his, JESU & MARIÆ Nominibus sim devotissimus: ita loquar cum DEO, mecum & cum proximo, ita JESU & MARIÆ serviam, ut me in morte non poeniteat vixisse. Hoc idem, &c. pag. 2.

21. MAIJ.

S. Hospitius in altæ turris carceris voluntario, ferro gravis, squalore deformis, vermibus è corpore scaturientibus plenus & orans, negabat vel vermes sibi, vel alios cruciatus graves esse, quòd ijs. excitaretur ad DEUM amandum. Tanti est, quomodo rebus utaris.

Ora, ut sciam & ego uti doloribus

bus ad amorem DEI. Crescant dolores, & crescat DEI amor; ut sic per dolorem, & amorem ita ad mortem perveniam, ut locum illum, ubi nullus erit amor, sed æternus dolor, evadam. Hoc idem, &c. pag. 2.

22. MAIJ.

S. Basiliscus miles videns Theodori Cognati sui Martyrium, erubuit tot se pro Cæsare Maximiano vulnera, pro Christo tulisse nullum. Invitavit eum Christus ad pugnam: & ferro soleatus, capite pro Christo minutus est. Non desunt piorum exempla: vide tu ne desis.

Accende me exemplis tuis, sicut tu accensus es alienis. Ora JESUM, ut & mihi det illam patiendi sitim, ut me ad certamen mortuale accingat, animet, juvet; ut ille in me pugnet, vincat, ac æternùm triumphet DEUS. Hoc idem, &c. pag. 2.

23. MAIJ.

S. Desiderius posito humano respectu Reginae impuritatem corripuit : ideo contumeliam & exilium passus. A Christo ad Martyrium invitatus, pro percussoribus suis oravit. Si hominibus studeas placere, servus DEI non es.

Intercede & pro me, ut nullus me humanus respectus ab æternis abducat. Alia illa & maxima maximi DEI principia mihi imprime; ut illorum ductu id agam in omnibus, ut me post vitæ finem ad primum omnium principium DEUM deducat. Hoc idem, &c. pag. 2.

24. MAIJ.

S. Simeon stylites, sexto ætatis anno in solitudinem secedens cum Coelitibus familiariter, nectare pastus vixit. Sexennio sic exacto Coenobium ingressus, sic profecit, ut à Magistro suo ad columnam invitatus, staret corpore, & animo
supra

supra terram eminens. Sta, sed vide, ne cadas

Ora pro me, ut hîc ita stem, ut videam, ne cadam: ut me oratione & jejuniis familiarem cœlitibus reddam, quorum solatia, & nectar in morte prælibem, & post mortem illis æternum fruam. Hoc idem, &c. pag. 2.

25. MAIJ.

S. Mutius Iatro, spoliaturus Parthenonem somno oppressus, ad tribunal sibi visus est rapi, & ostendi inferorum pœnas, nisi resipiscat. Unde aliam vitæ rationem instituens, è latrone factus est virtutis Magister: & alij, ut se ad mortem pararent, triennium impetravit. Si latrones recipit: tunc despera.

Impetra & mihi lumen illud, in quo peccatorum atrocitatem, Judicem, & supplicia videam, doleam, & emendem: ne imparatus hinc abripiar; sed cùm optimè pa-

ratum me viderit, tunc me ad se venire jubeat DEUS meus. Hoc idem, &c. pag. 2.

26. MAIJ.

S. Philippus Nerijs à puero Virginitatem custodivit, jejunijs, vigilijs & orationibus intentus. Charitate DEI cor ejus sic æstuabat, ut majus in pectore spatium per miraculum obtinuerit. Omnes amamus aliquid: cur non DEUM?

Utinam ad sanctum illum amorem rude hoc cor erudias, ut amet omnia, quæ amat DEUS, & nihil nisi propter DEUM: ut felici morte hinc emigrantem animam meam illuc, ubi tu es, videas ascendentem. Hoc idem, &c. pag. 2.

27. MAIJ.

S. Restituta V. non alteri, quam Christo nubere desiderans, Orcum corrivalem sensit: sed fugâ elusit dolos. Fugiens bonum Angelum Comitem habuit, & in carcere

cere & inter tormenta solatorem. Scorpionibus pro Christo cæsa, cecinit dicens, omnia sibi propter Christum dulcia esse. Si DEUM amas, nihil tibi difficile erit.

O fac mihi dulcia omnia, quæ DEI sunt! Doce me & nunc, & totâ vitâ meâ fugere pravæ Dæmonum suggestiones, & ad me bonos genios mitte: ut cum his & tecum apud DEUM totam æternitatem vivam post mortem. Hoc idé, &c. pag. 2.

28. MAIJ.

S. Germanus Episc. mortis suæ, ut semper esset memor V. Calend. Jun. (quæ ultima dies fuerat) ad lecti spondam adscripsit. Expertus nimirum à primis annis, nunquam non de vita hominem periclitari: nam nondum nato mater, nato avia venenum miscuerunt. Quidni omnem horam timeas, quando omnis ultima esse potest?

O sim

O sim & ego ita semper mortis
meæ memor, ut & vigil, & dormi-
ens semper sim paratus: nec peto
scire, quando moriar, nisi id velit
DEUS. sed ut sanctè moriar, hoc
peto: & ut tu id roges ac impetres.
Hoc idem, &c. pag. 2.

29. MAIJ.

S. Andreas de Chio Febri æstu-
ans, MARIÆ castitatem vovit, &
sanitatem impetravit. Constan-
tinopoli inter dolores pro fide sinè
doloris signo hoc unum dixit: MA-
RIA juva me. Vis à MARIA dili-
gi? dilige.

Per hos ego te dolorum tuorum
agones, & per DElparam Virgi-
nem, tuam meamque Matrem ro-
go, adsis mihi inter dolores ultimi
agonis mei: & cùm ego non am-
pliùs potero, clama pro me: MA-
RIA Virgo juva eum. Hoc idè, &c.
pag. 2.

30. MAIIS.


S. Isacius, Valenti Imp. interitum vaticinatus, nisi desisteret Catholicos oppugnare: in vinculis detentus, donec ex praelio rediret Valens; veridicus inventus est: nec enim redijt. Morienti cœli portas aperuit DEUS. Ut & tibi aperiantur esto servus fidelis.

Adesto mihi obsecro, quando iturus sum ad portas mortis, & ora pro me DEUM; ut sicut tibi, ita & mihi morienti per tuas, & omnium Sanctorum preces pateant Cœli portæ. Hoc idem, &c. pag. 2.

31. MAIIS.

S. Petronilla V. S. Petri filia, inter omnes morbos & dolores DEO semper gratias agebat. Recusato nobili matrimonio, precibus se totam impendit, inter quas etiam acceptâ Eucharistiâ exspiravit. Sic mori cupis? assuesce sic vivere.

Ora pro me, S. Virgo, ut nullo mihi impedimento sit corpus meum & proximus, quò minùs in vita frequenter & devotè orem; ut ubi & corpus, & omnia deseram, ad locum eum perveniam, ubi DEUM sine fine laudabo. Hoc idem, &c. pag. 2.



JUNIUS.

I. JUN.

Sanctus Simeon solitudinis amantissimus, multum à Dæmonibus passus: sed orationibus & jejunijs vicit. Quid mirum toties nos vinci? tepidè oramus, & malè jejunamus.

Arma me contra omne id, quod morienti mihi obesse potest ad æternitatem. Ora, ut oratione & jejunio tentantem me hostem ita semper vincam, ut cum DEO & tecum

tecum in æternitate triumphem.
Hoc idem, &c. pag. 2.

2. JUN.

B. Blandina V. à manè usque ad vesperum pro fide cruciata, inter dolores clamabat: Christiana sum, apud nos nihil sceleris admittitur. Inter bestias & tormenta illæsa, caput pro Christo dedit. Ab hac Virginis voce quàm procul absum!

O S. Virgo! ora, ut ita vivam & ita moriar verè Christianus, ut nihil apud me, & nihil à me admittatur sceleris. Defende me, ne me irretire possit Dæmon, & impetra, ut non tradat bestijs meam hanc animam tibi confitentem DEUS meus. Hoc idem, &c. pag.

3. JUN.

SS. Pergentinus, & Laurentinus fratres, quòd Christiani, fustibus & inedia vexati: se ipsos animârunt invicem, non præsentia, sed æterna, ut timerent tormenta. Inter præ-

præfens & æternum magna est di-
versitas: vide, quid eligas.

Amem æterna præ his, quæ ad
mortem stulta corda invitant; ti-
meam æterna præ his, quæ hîc
terrent: & ita per mortem feli-
cem ad vitam felicem inviter. Hoc
idem, &c. pag. 2.

4. JUN.

S. Quirinus Ep. innumeris tor-
mentis cruciatus, DEUM negare
noluit, inquiens: à DEO se didicif-
se, pro imortalitate mortem con-
temnere. Quid de te sentias, qui
non jam finis violenter tibi auferri
DEUM; sed sponte abjicis?

O quæso nulla creatura è corde
meo eximat DEUM! ut propter
DEUM, & vita & morte contem-
ptis, ita moriar, ut in moriente
corde meo se inveniatur DEUS meus,
& se cor meum in DEO meo inve-
niatur in æternitate. Hoc idem, &c.
pag. 2.

5. JUN.

S. Bonifacius Germaniam ad Christum multo labore convertit: ad labores à Michaële Archang. animatus. Tandem à Frisonibus, quos Christo nuper genuerat, dum eos S. Chrismate uncturus adiit, cum 51. Socijs peremptus. Nunquam DEUS suis operarijs deest.

Anima etiam me unâ cum S. Michaële, morientium Advocato, in ultimo vitæ agone: ut fortiter contra hostes infernales pro DEI gloria pugnem, & à vobis in æternam gloriam deducar. Hoc idè &c. pag. 2.

6. JUN.

S. Norbertus Præmonstratensium Fund. & Archi-Episc. Magdeburgi, quòd in pravos urbis mores pro DEO liberè diceret, odia sibi peperit. Se suòsque æternùm MARIÆ devovit. A Christo Crucifixo, cui imprimis erat devotus, edo-
ctus

Etus de Ordinis sui progressu.
 Quidni Crucifixum JESUM, &
 MARIAM ardentè diligo?

Commenda me Christo iu Cru-
 ce morienti, & MARIÆ, ut sim si-
 cut oliva fructifera in domo DEI
 mei: ut vivens & moriens sit cor
 meum conscientia candore orna-
 tum, & in paradisum æternitatis in
 pace transferar. Hoc idem, &c.
 pag. 2.

7. JUN.

S. Robertus Abb. lautè epulari
 sibi visus, si in Paschate avenaceum
 panem butyro adipatum comedis-
 set. Mortuus à tribus Angelis cœ-
 lo visus est inferri, nequidquam
 contra latrantibus Dœmonibus.
 Angelos sachabeas comites, & ri-
 debis Dœmonem latrantem.

O S. Roberte, latrabunt & con-
 tra me morientem Dœmones, ut
 cœlo non inscribar: verùm assiste
 tu mihi tunc cum Angelis tuis &

meo Custode; ut non prævaleant mali Angeli, sed à bonis ad bonam bonorum æternitatem deducar. Hoc idem, &c. pag,

8. JUN.

S. Medardus opum suarum, ex patrimonio, non alium usum habuit, quàm liberalitatem in pauperes. Puer prætextam suam cæco donavit, & ad matrem nudus rediens gestijt, quòd Christum vestijset. Morituro cœlum pandi est visum. Si liberalibus in pauperes cœlum aperitur; profectò avaris claudetur.

Amem obsecro pauperes, ut me etiam DEUS amet! Aperiam erga illos cor, ut & mihi morienti DEUS aperiat Cœlum, & animam meam paventem contra infernales vultures securè eò deducat. Hoc idem, &c. pag. 2.

2. JUN.

SS. Primus & Felicianus Fratres,
pie-

pietate sua contra Deos, patientiâ
 contra Tyrannos, pugnârunt. Vir-
 gis, plumbatis, leonibus & ursis
 vexati, capite mulctati triumphâ-
 runt. Frustra triumphos exspe-
 ctas, si pugnare nolis.

O nobile par Fratrum, animate
 me in adversitatibus, ut patientiâ
 & pietate me JESU crucifixi ser-
 vum probem; ut in morte me ille
 vocet ad coronam æternitatis, ubi
 vobiscum triumphem. Hoc idê &c.
 pag. 2.

10. JUNN.

S. Margarita Scotorum Regina,
 noctu non prius cubitum concef-
 sit, quàm de SS. Triade, S. Cruce,
 B. V. Matutinum, certas preces
 pro defunctis & Psalterium Davi-
 dis percurrisset, & 6. pauperum pe-
 des abluisset. Manè 9. Infantulos
 pauperes flexis genibus cibo pasce-
 bat. Per diem cum Malcholino
 Rege Conjuge 300. pauperibus ci-

bos ministrabat: ipsa dein sola priusquam accumberet, 24 pauperibus ministrabat. Sic peracta dies, putas, perditur?

Ora pro me, ut ego dies noctesque vitæ meæ sic transigam ad DEI mei honorem, ut per illos ego præparer, non ad noctem, sed diem æternitatis inchoandum, ubi hinc migrabo. Hoc idem, &c. pag. 2.

II. JUN.

S. Barnabas Christi discipulus, D. Pauli socius, cum Christus Salaminæ, æternam gloriam bonis, pœnas æternas malis præparatas prædicaret, lapidibus obrutus, & in ignem coniectus est. O quàm est gloriosus, qui pro fide moritur!

Habe mei curam, S. Christi discipule, cum in ultimæ iufirmitatis meæ loco decumbam, ut inde non ad eum locum descendam, ubi omnibus omnium infirmitatũ tormenten-

mentis maiores sunt dolores, quia æterni: sed ad amœnissimum æternæ sanitatis locum ascendam. Hoc idem, &c. pag.

12. JUN.

SS. Basilides, Cyrinus, Nabor & Nazarius milites Rom. propter Christum vincti, nec in carcere, nec in tormentis cessârunt Christum prædicare. Verus Christi servus homines non timet.

SS. Milites, sicut exemplo vestro me docuistis homines non timerè, sed potius eum, qui potest corpus & animam perdere in gehennam; ita etiam precibus vestris mihi impetrate ut usque ad finem vitæ meæ timeam DEUM, & ei soli placere studeam. Hoc idem, &c. p. 2.

13. JUN.

S. Antonius de Padua severè pro concione in vitia invectus, multos à pravitate vitæ revocavit: inde Dœmon ei infestus, noctu suffoca-

re conatus est : Sed MARIÆ nomine Dœmonem fugavit. Quid tu agis?

S. Antoni, effice apud JESUM & MARIAM, ut MARIA à me Dœmonem, præfocare me æternum conantem, fuget, & JESUS morienti unà cum illa mihi benignus assistat. Hoc idem, &c. p. 2.

14. JUN.

B. Basilius Magnus per MARIAM impetravit, ut Julianus Apostata divinitus puniretur. Virginitatis florem orationibus, jejunijs & studijs ita custodivit, ut illibatum tumulto inferret. Tu putas, tuam in otio, delicijs & tepore custodies?

Illucesce mihi sub vesperam, ac tenebras mortis meæ tuis meritis & precibus discute: & me ex hoc deserto feliciter eductum, deduc saluum in terram, imò in cœlum promissionis. Hoc idem, &c. p. 2.

15. JUN.

15. JUN.

S. Vitus admodum puer baptizatus: quòd ægrè ferens pater, ipse filium Judici verberibus castigandum sistit: sed is flagra Christiana fortitudine sustinet. Dein mulierculis seducendus traditur: sed ope cœlesti vicit. Romæ pro fide Martyrio affectus. Nec inter parentes semper tuta fides.

S. Vite ora pro me, & impetra mihi illam animi fortitudinem, ut à recto tramite nec parentes, nec consanguinei, nec deliciæ, nec minæ mea vocare possint: sed usque ad æternitatem curram, in quâ me coronet JESUS omnium bonorum remunerator. Hoc idem, &c. pag. 2.

16. JUN.

S. Ludgardis V. non ignobiles habuit procos: sed cor rivalis Christus, ut sibi eam desponderet, in pectore cor suum faucium ostendit.

dit, & ejus vulneris nectare potavit: Ex quo omnia ei humana vilescere, & nulli præter Crucifixi amores, placere. Moritura JESUM & MARIAM sibi obvios habuit. Sperne mundum & sapiet JESUS.

S. Virgo, ora pro me, ut ad talem mortem ita cor meum disponam, ut nil me delectet, nisi quod est secundum cor JESU & MARIÆ: ut Crucifixi & MARIÆ amantissimus, illos ad magnum illud iter duces habeam. Hoc idem, &c. pag. 2.

17. JUN.

S. Rainerius ad infames adolescentiæ scopulos naufragium innocentiae fecit, & noxius pudor fecit, ut poenitentiae tabulam non enataret. Quare objurgatus ab Angelo, bona fide se reum peregit, cum tanto dolore, ut ex continuis lachrymis oculos perdiderit. Erubescis coram uno homine: O quid facies olim coram toto orbe.

Ora pro me, ut ita sancte, ita crebrò confessiones meas, dolore, & proposito solido animatas (non per superficiem tantùm) instituam, quasi jam jam moriturus; ne ultimum, idque gravissimum in morte naufragium faciam. Hoc idè &c. pag. 2.

18. JUN.

SS. Marcus & Marcellianus fratres propter fidem in pedibus clavis confixi, diem noctemque in tormentis inter divinas laudes transegerunt, dicentes: nunquam se tam jucundè epulatos, quàm libenter hæc pro Christo paterentur. Quàm malè epulabitur, qui propter mundum Christum vel opere, vel verbo negat.

O ardeam & ego illo amore, ut tam libenter pro Christo omnia humana spernam, & injurias & quidquid mundus intulerit adversi, patiar; ut æternùm vobiscum

ad mensam Regis cœlestis epulari
possim. Hoc idem, &c. pag. 2.

19. JUN.

SS. Gervasius & Protasius frater,
distributo patrimonio in pauperes,
& servis libertate donatis, Genti-
lium Sacerdotes in se concitârunt.
Cùmque negare Christum non
vellent: hic gladio, ille plumbatis
enectus. Mali te oderunt? gaude:
hoc bonitatis tuæ testimonium est.

Impetrate mihi, ò SS. Fratres,
ut ita semper vivam, quò DEUS &
Cœlites me ament: licet totus
mundus, & omnes Dœmones
oderint: ut post talem vitam cum
DEO & ejus amicis æternùm gau-
deam, & DEUM sinè fine amem.
Hoc idem, &c. pag. 2.

20. JUN.

S. Silverius Papa omni humano
respectu altior, & constantissimi
animi, à vero & recto deduci nun-
quam potuit: ideo in exilio post
mul-

tas ærumnas extinctus est. Quid
juvat esse in patria, & exulare à
DEO?

Ora pro me, ut hoc exilium,
quod habitamus omnes filij Adæ,
non ejiciat me in exilium æternum;
sed ducat ad patriam cœlestem,
ubi nobis MARIA ostensura est JE-
SUM benedictum fructum ventris
sui. Hoc idem, &c. pag. 2.

21. JUN.

B. Aloysius Gonzaga ope MA-
RIÆ natus, adhuc infans ostendit,
qualis futurus esset. Prima verba,
dum fari cœpit, dixit: JESUS &
MARIA. Hanc, gradus ascendens,
in singulis salutavit. Vix audiit JE-
SUM aut MARIAM dici, & mox in
teneras lachrymas solutus, & in
amoris tesseram Florentiæ coram
ejus imagine Virginitatem vovit.
MARIAM sumptâ Eucharistiâ, con-
sulens de vitæ statu, audiit: Socie-
tatem JESU ingredi. Ingressus

(sed post multas cum Patre pugnas) in ea instar Angeli vixit, & mortuus nullius gravioris noxæ conscius. Quis sic vivit, quidni lætus moriatur?

O Angelice Juvenis, JESU & MARIÆ ardentissime amator! doce me ita tenero, & affixo coelis corde orare, ita JESUM & MARIAM ardentem amare, sicut tu: ita JESU in Eucharistia, & MARIA consiliarijs in omnibus agendis uti, sicut tu; ut moriens lætus illuc abeam, ubi unà cum illis es tu. Hoc idem, &c. pag. 2.

22. JUN.

S. Paulinus, Juvenis amplissimum patrimonium in pauperes distribuit. Episcopus Nolanus factus, omnibus in captivos liberandos expensis, se ipsum viduæ dedit in commutationem pro filio abducendū. Quid huic charitati dabit DEUS, qui etiam haustum frigidæ remunerabitur? Ora,

Ora, ne moriens abripiar in captivitatem æternam. Offer merita DEI JESU & tua pro me: Solve vincula mortualium tædiorum meorum in tædijs mortis meæ! Voca me, vindica me, & duc me hinc illuc ad liberos DEI. Hoc idem, &c. pag. 2.

23. JUN.

S. Maria Ogniacensis Crucifixum nunquam sinè lachrymis asperxit, nunquam coram eo sinè suo, vel aliorum bono oravit. Centies quotidie genibus flexis oravit, & trecentis plagis corpus laceravit. Fœminæ morienti, & ob vestium luxum damnandæ, cor pœnitens impetravit. Quid non impetrat DEO per orationem familiaris?

One patere me mori desolatum: impetra mihi orationis studium, & in hora mortis cor verè pœnitens, ut migrans hinc Spiritus meus, ad JESUM & ad MARIAM abeat,

aternum victurus in caelo. Hoc idem, &c. pag. 2.

24. JUN.

S. Joannes Bapt. in utero sanctificatus, DEUM suum in MARIAE utero latentem agnovit & in gaudio exultavit. A puero eremum habitavit: cibum habuit locustas & mel agreste, vestem cameli exuvias. Inde poenitentiam praedicans, viam Christo munivit. Sic vivunt sanctificati. Vae mihi!

Ora pro me S. Joannes ut post tot commissa peccata dignos agam poenitentiae fructus, & sic sine peccato renascar aeternitati. Confige cor meum, ut non adhaereat huic mundi fallacis, sed soli DEO: & in umbra mortis meae me trepidum una cum JESU & MARIA sub umbra manus tuae protege. Hoc idem, &c. pag. 2.

25. JUN.

S. Gallicanus licet Gentilis, votum

tum fecit DEO pro victoria: & Angelum cum cruce habuit stratêgū, quo duce ipse Angelis cinctus Scythas devicit. Redux Victor, Christo nomen dedit, & mundo valedixit, pauperum ac peregrinorum factus Pater, hospes, servus: nunquam major, quàm cum se & mundi gloriam vicit.

S. Dux, adesto mihi, cum ultimum mundo dicam vale per mortem: adesto mihi cum tuis Angelis & Cruce, quando cum principe tenebrarum pugnabo; ut vincam, & moriar, æternum coronandus. Hoc idem, &c. pag. 2.

26. JUN.

SS. Joannes & Paulus fratres, Juliani impij familiaritatem declinârunt, ne contaminarentur in moribus. Omnes facultates in pauperes erogârunt, ut paratiores ad mortem essent. Ne sic desipiã, ut mundi sim amicus, & DEI inimicus!

Ora-

Orate pro me, ut fugiam & ego inimicas amicitiaë Christi amicitias. Amicitia hujus mundi, scio, inimica est DEO. Me precibus vestris juvate, ut DEUM præ omnium hominum respectu habeam semper præ oculis; & DEI potius, quam ullius mortalium amicus vivam & moriar. Hoc idem, &c. pag. 2.

27. JUN.

S. Ladislaus Ungariæ Rex Apostolicus, familiares in aula sua habuit Angelos; qui tum in duello cum patruo suo, tum in alijs pugnis astiterunt. Dux lectus copiarum pro recipienda terra sancta, in ipso aditu gloriosè occumbens cœlum ingressus est. Angelos devotè cole: experieris amicos.

O S. Rex, defende me cum Angelis illis tuis in ultimo & singulari meo certamine. O experiar opem tuam, ut vincam in horrendo illo mortis duello, ubi mihi pro æternitate

tate

tate pugnandum , vincendum & moriendum erit. Hoc idem, &c. pag. 2.

28. JUN.

S. Potamiana spretis pluribus prociis contra Tyrannum Virginitatem suam patientiâ defendit. Ad rogum ducta à Basilide est contra populum defensa; gratitudinis ergò ad cœlum invitavit, quod capite plexus adiit. Quàm gratus tu es Cœlitibus?

O Cælestis Virago! quæso, ora illic pro me, ut pro beneficijs è cœlo acceptis gratus vivam semper, gratusque moriar. Tuere me viventem & morientem contra hostes omnes in terris: ut æternitate coronatus, æternùm DEO, ac tibi sim gratus in cœlo. Hoc idé, &c. pag. 2.

SS. Petrus & Paulus Apostoli, Ecclesiæ Principes: quorum ille Christi in terris Vicarius, quæ ad ignem

ignem Jerofolymis peccaverat. jugi
oculorum imbre plectens, JESUM
secutus est usque ad mortem cru-
cis. Hic verò Vas electionis nomen
JESU portavit coram gentibus; ca-
pite abscisso lac fudit: caput resectū
ter JESUM inclamans triplici saltu
tres fontes elicuit. Quanta vis
charitatis Petrum perfidum, &
Paulum persecutorem DEO recon-
ciliavit!

Orate pro me SS. Appstoli, ut
in ultimo vitæ articulo me non pe-
riclitari permittat DEUS: adeste
mihi, sicut pluribus morientibus
adfuistis; ne in tempestuoso illo
portu naufragium faciam, patiâr-
que. Hoc idem, &c. pag. 2.

30. JUN.

S. Erentrudis V. Abbatissa, pau-
perum pedes abluebat, & ulcera
ceu gemmas tractabat. Ad men-
sam accumbens, plùs divinis collo-
quijs, quàm cibo pascebatur. Di-
cere

cere solebat: Mihi adhærere DEO bonum est, ponere in DEO spem meam. Annon & tibi bonum esset?

O DEO addicta V. illam mihi divinorum aviditatem, illam DEO adhærendi voluntatem, illam à DEO cordatâ spem impetra; ut illud adhærere DEO bonum, sit mihi bonum æternum, neque me à DEI adhæsione avellat æternitas. Hoc idem, &c. pag. 2.



JULIUS.

I. JUL.

SANCTUS Theodoricus à parentibus ad nuptias compulsus, primâ nocte conjugii Votum Virginitatis suavit; & consulente S. Remigio persuasit. Inde Sacerdos ordinatus, virtutum studio deditus, cû fama sanctitatis obiit: quem Rex suis ipse humeris ad sepulchrum tulit.

lit. In quanto pretio tum erat
Virtus!

S. Theodorice, impetra mihi tã
flexibilem animum ad virtutes, ut
ijs animam meam ornem, quò pla-
cere possim JESU & MARIÆ, ut in
hora mortis meæ mihi adsint, & ad
æternam gloriam me deportent.
Hocidem, &c. pag. 2.

Postquam B. V. nuntiante An-
gelo Verbum dñvinum concepe-
rat, ivit in montana, divinitus im-
pulsã, tum ut Joannes sanctificaretur,
tum ut Elisabeth Cognata gra-
tularetur fructum ventris à DEO
impetratum. Felix quem MARIA
cum JESU visitat,

O Virgo! non potui te amare
antequam nascerer, sicut parvulus
Joannes: ora ut saltem nunc, & in
hora mortis meæ, & per omnes
beatitatis æternitates sim in nume-
ro servorum & filiorum tuorum
lætantium in te. Ut hoc fiat, ô

Do-

Domina, visita, me frequenter cum tuo JESU: ita ut nunc & in hora mortis meæ visitatio tua custodiat spiritum meum hinc migrantē, ut in æternū unā tecum Magnificet anima mea Dominum, & exultet spiritus meus in DEO salutari meo. Hoc idem, &c. pag. 2.

3. JUL.

S. Irenæus pro Christi fide in equuleo suspensus, ferreis unguis in lateribus disceptus, in flammis injectus, aliisque cruciatibus integritas DEO acta immortalis. Si patiendum: cur non libenter, ut profit?

Nemo est, scio, qui hinc exeat, quin adversis exerceatur: & quā infelix, si ex his in æternas miseras labatur! Ora, ut ita hujus mundi adversitates sustineam, ut per eas securam mihi viam sternam ad beatitudinem. Hoc idem, &c. pag. 2.

4. JUL.

S. Udalricus à puero levibus sermonibus nec linguam, nec aurem dedit, socios mundi declinavit, Cupidinem cilicio absterruit, Veneris flammam immisso in ignem digito extinxit, foeminas omnes fugit. A teneris sic assuescere multum.

Assiste mihi, & instrue me, quid fugere, quid omittere, quid agere debeam, ut DEO placeam in vita & morte : sed simul precibus, & meritis tuis juva, ut, quod doces, opere compleam. Hoc idem, &c. pag. 2.

5. JUL.

S. wilhelmus Mathematicus & Orator insignis ; sed factus Episc. maximè celebris sua in pauperes liberalitate, quibus vestiendis non semel seipsum nudavit. Cùm omnia erogasset, divina manu deinceps aurum, frumenta, vina recepit. Miraris DEUM in te tam libe-

liberalem? vide qualis tu sis in pauperes.

Impetra & mihi hoc donum sanctæ in omnes charitatis; ut in hora mortis meæ liberalem & meiamantem reperiam illum, qui omnium bene amantium amantissimus est DEUS. Hoc idem, &c. pag. 2.

6. JUL.

S. Goar, Trevirensium Apostolus inimicis suis euntibus, ut innocentiam ejus apud Archiepiscopum traducerent, & mensam paravit, & in via ne deficerent, cervam impetravit, quæ lacte foveret. Ad tribunal Archiep. fornicationis accusatus, ex infante patrem suum rogavit, qui alium linguâ & digito ostendit. Discite benefacere his, qui vos oderunt.

Innocentem ab omni nævo vitæ non duco, multorum apud DEUM criminum reus, sed tuis precibus mihi impetra talem pœnitentiam

in vita mea; ut in morte & post mortem coram DEO Judice innocens compaream. Hoc idem, &c. pag. 2,

7. JUL.

S. Wilibaldus puer adhuc, se peregrinum in mundo agnovit. Hinc positus Regijs insignibus, peregrinorum more Romam cum Patre, Fratere & Sorore, dein Jerosolymam peregrinatus. Quam desipit, qui hinc sibi patriam fingit!

S. Wilibalde cum tota sancta familiatua orapro me, ut ita me in hoc exilio & peregrinatione meageram; ut non adhæream corde his perituris rebus, sed toto corde aspi-rem & tendam ad patriam coelestē. Hoc idem, &c. pag. 2.

8. JUL.

S. Chilianus cum Colomanno, & Tomano Soc. Christum in Franconiam primò intulerant, ipsūque Ducem Gosbertum Herbipoli
Chri-

Christo conciliârunt. Huic dum fratris defuncti Conjugem dissuadent, ab ea necantur. Tu, si sapiſ: nec blandienti, nec iratæ fceminæ fide.

S. Chiliane cum Socijs impetra mihi eos animos, ut nec blandimenta, nec terrores me unquam à veritate avertant: sed eam per omnia pericula usque ad mortem, & si opus est, sanguine fuso constanter profitear. Hoc idem, &c. pag. 2.

9. JUL.

S. Anatolia V. ob fidem in exilium missa. Sed ibi, cùm morbidorum esset asylum, instruitur Magus, qui immanem serpentem in eam armet. Erravit serpens & magi collo implicitus eum suffocâſſet, nisi precibus Virgo liberâſſet. Si malus es: time serpentem infernalem.

Intercede pro me, ne antiquus

G

ille

ille & callidus serpens, qui calcaneo, hoc est, ultimo vitæ meæ insidiatur, mihi noceat, meque Paradiso extorrem faciat; sed ut potius in Paradiso Beatorum, è quo ille infelix excidit, æternùm tecum vivam. Hoc idem, &c. pag. 2.

10. JUL.

S. Felicitas septem filios suos Martyres in tormentis, Januarium sub plumbatis, sub fustibus Felicem & Philippum, in præcipitio Silvanũ: Alexandrum, Vitalem & Martialem sub securi, generosè hortata, non pœnas, sed quæ cœlum gaudia spondet, aspiciant. In filiis postquam septies mortua, ferro & ipsa Martyrium subijt. Hæc verè est Mater!

Esto & Mihi Mater: adesto mihi, & adhortare, ut & ego in agone meo ultimo pro DEI gloria gloriosus decertem, & moriar de hoste victor; tecumque & cum filiis tuis

æter-

æternùm DEO triumphos decanté.
Hoc idem, &c. pag. 2.

I I. JUL.

S. Golinducha adhuc Gentilis epulo assidens, animo cœlestes delicias primò, dein fame & siti cruciatum apud inferos Epulonem, & cum eo proprios parentes contemplata, ad Christum se convertit. Novissima cogita: & non peccabis.

O recorder & ego æternitatis utriusque in omnibus actionibus meis; & sic me præparem ad beatam mortem, per quam deducar ad vitam sinè morte vivendam, ubi æterna est felicitas, & felix satietas!
Hoc idem, &c. pag. 2.

I 2. JUL.

S. Joannes Gualbertus cognati sui interfectori, in Christi gratiam veniam poscenti dedit; & templum ingressus, vidit Crucifixum capite annuere, & cœlum donare. Hac charitate Cœlum expugnatur.

Roga etiam pro me JESUM Crucifixum, ut in tui gratiam mihi omnia ignoscat, quibus eum offendi. Ego etiam ex nunc omnibus libentissimè propter ipsum ignosco. Utinam & nunc tibi pro me felicem mortem petenti inclinato capite annuat DEUS! Hoc idem, &c. pag. 2.

13. JUL.

S. Justina V. inter carnificinam læta, rogata à Zenone è paradiso fructus mitteret. Misit strophium: quo dum frontem cum risu abstergit, & Christianus & Martyr factus est, Quid horres dolores, quibus Coelum emitur?

O S. Virgo! mitiga tuâ illâ lætitiâ mortis meæ dolores, & mortuales meos sudores illo tuo sudario absterge; ut lætus moriar, & amœnam Paradisi æternitatem lætus ingrediar. Hoc idem, &c. pag. 2.

14. JUL.

14. JUL.

S. Bonaventura Bibliothecâ non alia usus, quàm Crucifixo. Primus sub noctem pulsus æris Campani instituit, quo B. V. salutamus. Quid desit, si JESUM habeam & MARIAM?

Rogo te per JESUM Crucifixû, & MARIAM, ora pro me, ut bonus Crucifixi discipulus, bonus MARRIÆ servus & filius vivam & moriar. Hoc idem impetra mihi S. Henrice Imp. castissimæ Cunegundis caste conjux; & omnes, &c. pag. 2.

15. JUL.

S. Jacobus Nisibensis Ep. precibus saxum in testimonium veritatis in sexcentas partes confregit; & hominem fictè mortuum, verè mori, dein rursus vivere fecit. Cur tuæ preces non audiuntur? vide quomodò ores

Ora pro me, optime orator,
G 3 ut

ut & ego bene discam orare. Tota
mea & vita & mors sit sancta oratio,
ut etiam in æternitate orem, &
DEUM adorem, & semper amem.
Hoc idem, &c. pag. 2.

16. JUL.

S. Raineldis V. Christo verè ad
aras usquè amica, quando Crucis
in modum prona, inter laudes di-
vinas virginitatis DEO victima ce-
cidit. Vis DEO esse charus? gra-
tias frequenter age.

En ego humilis corde, ad aram
illam tuo sanguine cruentam sup-
plex provolvor, ut id pro me à
DEO impetres; ut amando DEUM,
illique gratias agendo vitam, mor-
tem, & æternitatem meam im-
pendam. Hoc idem, &c. pag. 2.

17. JUL.

S. Alexius, prima nocte nuptia-
rum Edessam fugit, & inter men-
dicabula latuit. Proditus Romam
rediit, & in paterna domo ignotus,

tan-

tanquam mendicus delituit usque ad mortem. Quàm magnus erit, qui sic se humiliavit?

S. Alexi Virgo, Sponse, com-
menda me MARLÆ, Matri humi-
lium, ut seriò eligam abjectus esse
in militante domo DEI mei usque
ad mortem: ut post mortem sin-
gloriosus in triumphante DEI mei
domo. Hoc idem, &c. pag. 2

18. JUL.

S. Symphorosa VII. filiorum
MM. Mater, saxo ad collum alliga-
to in aquas demersa filios hortata:
animosè per mortem sequerentur
in Cœlum. Omnes VII. ad pa-
lum alligati, Crescentius ferro gut-
tur, Julianus pectus, Primitivus
umbilicum, Nemesus cor trajici-
tur: Eugenius in duas partes, mè-
bratim secatur Justinus: Stacteus
telorum fit scopus. Felices hac
matre filij: his filijs mater!

Orate pro me unà cum Matre

vestra Fratres fortissimi: conjurate in meam salutem, & impetrate mihi felicem hinc exitum; ut sim Frater vester & ejusdem cœlestis Patris hæres, inter electos filios in æternum. Hoc idem, &c. pag. 2.

19. JUL.

S. Arsenius Arcadij & Honorij Magister, audita è cœlo voce: Fuge, tace, quiesce. Fugit ex aula in Eremum, continuò lachrymatus, mortis se horam timere dixit. Quis ego? & non timeo? heu me!

O timeam & ego timore sancto; ut morte non timenda, sed speranda & amanda defungar: & demùm illic tecum sim æternum, ubi nemo habet malum ullum, quod timeat. Hoc idem, &c. p. 2. 20. JUL.

S. Margarita V. pro Christi fide virgis cæsa, & uncis lacerata: in carcere Dæmonem Draconis specie infestum Cruce fugavit, & cœlitus solatia accepit. Cur tu solatia petis è terra? Ade



AUGUSTUS.

I. AUG.

SS. Fides, Spes, Charitas, S. Sophiae filiae, pro Christo & fide passae, vicerunt Tyrannum, dum occubuerunt, triduo post sequente Matre. Sinè his virtutibus cave coelum tentes.

Orate pro me, ut vestris vestrorumque nominum virtutibus instructus ita vivam, & moriar, ut tandem in Regnum charitatis inductus, æterna charitate amem illum, qui charitate perpetua dilexit me. Hoc idem, &c. pag. 2.

2. AUG.

S. Franciscus Seraphicus, hodie in templo MARIÆ de Portiuncula, gratiam prius inauditam à DEO impetravit, Indulgentiam plenariam omnibus, qui confessi (cæteris
ris.

ris operibus seclusis) eo die in templo illo orarent. Quam Sixtus IV. & V. ad omnes Ordinis Seraph. Ecclesias propagavit. Hic salutis tuæ satage, si sapiis.

O Seraphice Pater, commenda hanc & ultimam vitæ meæ horam **MARIÆ** de Portiuncula & Angelis tuis. Doce cor meum, ut sit ad **JESU** & **MARIÆ** cor & nutum; & impetra illi plenariam à **JESU** per **MARIAM** pro hora mortis Indulgentiam. Hoc idem &c. pag. 2.

3. AUG.

S. Stephani Protom. Corpus divinitus repertū, hodie translatum. Flores corpori admoti cæcæ visum restituerunt. Quid nocebit, si tales tibi concilies amicos?

Adesto mihi ope tua S. Stephane, usque ad tumbam, & me non solum hic videre fac ea, quæ **DEO** placita sunt, sed ipsum **DEUM** æternum in cœlis. Hoc idem, &c. p. 2.

4. AUG.

4. Aug.

S. Dominicus dum vixit, in ordine suo MARIÆ honorem per Rosarium quàm maximè promovit. Quatuor Infulas, ut alij quærunt, sic ipse rejecit. Ter quotidie in se flagello sævijt. Morituro MARIA adfuit. Nemo frustra MARIAM colit.

Ora pro me, ut MARIAM ita mihi sanctis artibus devinciam; ut sicut tu ipsa præsentem in cœlum abiisti, ita & ego ipsam experiar in agone Patronam. Hoc idem, &c. pag. 2.

5. Aug.

Anno Christi 365. Romæ Joannes Patritij sanguinis, quòd prole careret, ingentium opum hæredem scripsit MARIAM. Inde Hodie monstrante cœlo nivibus locum, in Monte Exquilino Templum, quod MARIÆ Majoris dicimus, ædificavit. Opum hæredem eam scri-

scribere non potes? Operum bonorum scribe & animæ tuæ.

Oro te Domina, dignare opera omnia vitæ meæ, mortem & animam meâ pro hæreditate tua accipere; sicut & nunc tibi transcribo. Quare rogo, ut semper invigiles, & maximè in hora mortis, ne in tuam hæreditatem hostis manus injiciat. Hoc idem, &c. pag. 2.

6. AUG.

Hodie in monte Thabor transfiguratus est JESUS; & audita Patris vox: Hic est filius meus dilectus, in quo mihi complacui, ipsum audite. Audi illum, ut audiat & te.

Miserere mei, vivorum & mortuorum S. Judex, ut resurgens corpus meum configuretur corpori claritatis tuæ, videâmque gloriam tuam, & experiar bonum esse, me ibi esse, ubi tu es. Hoc idem, &c. pag. 2.

7. AUG.

7. AUG.

S. Albertus à parentibus DEO promissus, severè moram arguente MARIA, datus est. Civibus suis fame pressis tres cum comœatu cœlo remige triremes impetravit. DEO, non diris, tuos devove.

Ora, ut sicut te ad aram, quasi victimam, stitère patentes: ita tu cum MARIA animam meam post mortem sistere possis cœlo, hostiam DEO placentem. Hoc idè &c. pag. 2.

8. AUG.

S. Cyriacus, filia Regis Persarum à dœmone liberatâ, Regem & 340. alios baptizavit. Romæ post multos circa proximum labores, securi percussus est. Felices labores, quibus Cœlum & impletur, & obtinetur.

Clament labores tui pro me, ut in hora mortis meæ non moriar, sed vivam: separetur anima à corpore in tempore, quæ mors est; sed
con-

conjugatur cum DEO in æternitate, quæ est vita æterna. Hoc idem, &c. pag. 2.

9. AUG.

SS. Firmus & Rusticus post plagas à patria pro Christo acceptas, cibati sunt ab Angelis in carcere. Ab iisdem, gladio cæsi, sunt sepulti. Sic amantur ab Angelis, qui patiuntur pro Christo.

Orate pro me, ut ita libenter pro Christo patiar, ut & vitæ, & mortis meæ curam vobiscum suscipiant Angeli lucis contra Angelos tenebrarum, è quibus à carcere mortis hujus egressus educar ad DEUM. Hoc idem &c. pag. 2.

10. AUG.

S. Laurentius, quòd thesauros Ecclesiæ in pauperes dispersisset, in craticula affatus est, & gratias egit DEO, quia januas ejus ingredi meruisset. Si pati janua est ad DEUM, væ reuuentibus pati!

Accende me tuo illo igne, ut pro DEO patiar : & cùm ego jacebo in lecto ultimo, qui valde me uret de æternitate sollicitum, ora pro me, ne degenerem me reperiat DEUS : sed ita obdormiam, ut mortem meam sequatur nox, quæ, sicut tua obscurum nihil habeat. Hoc idem &c. pag. 2.

11. AUG.

S. Tiburtius pro Christi fide, se Cruce signans, per prunas ardentes nudipes ambulavit dicens : prunas sibi flores videri. Patientia in doloribus reperit flores.

Impetra mihi concordem cum DEI voluntate patientiã, ut omnia, quæ patior, mihi flores fiant, quibus ultimus vitæ meæ lectulus floridus reddatur : ex quo non ad igneam, sed floridam æternitatẽ transeam. Hoc idem, &c. pag. 2.

12. AUG.

S. Clara pro urbe Assisio coram
V. Sa.

V. Sacramento orans audiit: Ego vos semper custodiam. Tunc precibus suis hostem, alias morbos & dæmones fugavit. Orantes, sed ferventer, petite; & accipietis.

Ora JESUM & MARIAM, ut me semper, sed in morte maximè, custodiant. Tunc precibus tuis animæ meæ morbos, peccata, & dæmonem à me fuga; ut tecum DEUM adorem in beata æternitate. Hoc idem, &c. pag. 2.

13. AUG.

S. Cassianus positâ Infulâ pueros docuit. Quòd Deos nollet colere, ab iisdem jussu Tyranni stylis acutis confixus & excarnificatus est. Solitum juvenibus Minerval; sed quo Magistro cœlum, sibi referant infernum.

Instilla cordi meo gratitudinem, ut parentibus & præceptoribus, quibus par reddere nunquam poterò, saltem gratum animum exhibeam

hibeam; ut pro consortio dignus,
 cœlo non excludar ab eo, qui red-
 det unicuique secundum opera sua.
 Hoc idem &c. pag. 2.

14. AUG.

S. Eusebius Sacerdos Romanus,
 Arrianis acriter restitit. Constan-
 tius Imp. tantam ejus fidem indi-
 dignè ferens jussit, eum in carce-
 rem compingi tam arctum, vix ut
 movere se posset. Expletis septem
 mensibus tandem à Domino preci-
 bus impetravit ut ex carcere ad æ-
 ternam libertatem evolaret. Hic
 verè aurea libertas

Ora pro me afflicto, & agoni-
 zante, ut in omnibus doloribus
 meis Divinæ me conformem vo-
 luntati; idque lectulo meo inscri-
 bi possit, quod tumulo tuo; Hic
 jacet homo DEI. Hoc idem, &c.
 pag. 2.

15. AUG.

Hodie DEI para Virgo annos
 H ætatis

ætatis (juxta probatos authores)
72. post Christi Ascensionem 24.
mortua terris, unâ cum corpore
assumpta est in cœlum. O si trahat
nos post se!

O gloriosissima cœlorum, ac ter-
rarum Imperatrix MARIA, per sa-
crofanctam & divinissimi amoris
plenissimam mortem tuam, & per
amorem, quo DEI, DEOQUE aman-
tissima fuisti, erisque æternùm, ro-
go, sit tibi cordi vita, mors & æter-
nitas mea. Assume misellam hanc
animam meam, ad æternitatis no-
men trepidam, ut in morte itine-
re sancto abeat à me ad te. Cupio
DEUM & te modis omnibus ama-
re, colore, & honorare. Trahe me
postea O Mater! ut currâ in odorem
unguentorum tuorum, & in pre-
tiosissimo altissimi erga DEUM
amoris actu corde humillimo emo-
riar, & postea tecum æternùm vi-
vam. Hoc idem, &c. pag.

16. Aug.

16. Aug.

S. Rochus pestiferis amore Christi serviens, cruce plures sanavit: æger à cane dietim panem accepit. Demum peste mortuus, cœlitus contra pestem Patronus promissus est. Ne time hoc, vel illo morbo mori; sed malè mori.

Adesto mihi morienti; ut illo morbo, morte illa, tunc & ibi bene moriar, ubi & quando gloriæ suæ & æternitati meæ quàm optimum fore judicârit DEUS. Hoc idè &c. pag. 2.

17. Aug.

S. Mammæ in carcere ex matre M. natus, cùm primo lacte suxit fortitudinem: hinc in fornace ardente velut inter flores psallebat. Vis coronari, flores patièdo collige.

Per patientiam tuâ, rogo te, impetra mihi cum Matre tua patiendi desiderium per vitam meam, for-

itudinem in ultimo agone, quâ ita
pugnem contra Dæmones; ut vin-
cam, & in æternitate à DEO me-
rear coronari. Hoc idem, &c. p. 2.

18. AUG.

S. Agapitus 15. ann. puer, ner-
vis, inediâ, cardonibus, equuleo,
fumo, aqua bulliente cruciatus,
DEO semper gratias agebat. Vel
à puero discas pati.

O ætatem virtute supergressæ
Martyr, tuæ fortitudine commen-
do ultimam illam infirmitatem &
fragilitatem meam, ne cum cor-
pore tunc langueat anima mea;
sed fidelis DEO inter angores per-
sistat. Hoc idem, &c. pag. 2.

19. AUG.

S. Ludovicus Siciliae Regis Fi-
lius, Ep. Tolofanus frequenter MA-
RIAM de die salutavit. Rogans,
cur? dixit: Morientem me ipsa
juvabit. Et juvit. Times mori?
& MARIAM non salutas?

Ora

Ora pro me vivente & moriente! Pro vivente, ut serviam DEO in munditie & puritate; pro moriente, ut morientem MARIA juvet. Hoc idem, &c. pag. 2.

20. AUG.

S. Bernardus, vale mundo dicens fratres suos aliósque post se traxit, JESU & MARIÆ vsemper amantissimus, huic quotidie tam amanter (Salve) dixit: ut meruerit ab ea (Salve) recipere. Et quis non amet MARIAM?

Impetra mihi animæ puritatem, & instilla cordi meo illum in MARIAM, tuam & meam Matrem filialem amorem; ut, quod tu verè dixisti, MARIAM esse spei nostræ fiduciam, & ad Cœluum scalam, in hora mortis meæ merear experiri. Hoc idem, &c. pag. 2.

21. AUG.

S. Bassa licèt sacrificulo nupta, tres tamen filios fide Christi im-

buit, & Cœlo per Martyrium secum genuit. Hanc mulierem tu fortem neges: fortior te est.

S. Mater, cum filiis tuis ora pro me, ut vobiscum JESUS & MARIA me adjuvent morientem: ne in ultimo & difficili agone illo deficiam, sed vobiscum victor ad Cœlum perveniam. Hoc idem, &c. pag. 2.

22. AUG.

S. Symphorianus adolescens, post diros cruciatus ad mortem ductus, audiit matrem monentem: esset memor, horæ unius negotium esse æternitatem: Et obediit. Obrevis hora! O longa æternitas!

In illo tanto unius horæ, & præcipuè horæ ultimæ negotio juva me, & è cœlo ad me morientem cum S. Matre tua respice, ut illud negotium negotiorum in hora illa ex animi sententia conficiam. Hoc idem, &c. pag. 2.

23. AUG.

23. AUG.

S. Philippus Ord. Serv. B. V. Pontificatûs honorem fugâ elusit. A Rudolpho Imp. redux ante MARLÆ aram adjectus dixit: Hæc requies mea; Næ suavis, & secura!

Serve bone & fidelis MARLÆ, ora & impetra pro me, ut requies mea, id est, mors mea, sit in servitio JESUS & MARLÆ: quando melius mori non possum. Hoc idē, &c. pag. 2.

24. AUG.

S. Bartholomæus Indorum & majoris Armeniæ Ap. centies noctu genibus flexis orare solitus. Pro Christo vivus excoriatus. Tu dedi el semel devotè ora.

Per illas ferventes preces tuas, & mortis tuæ dolores, te rogo, impetra mihi studium sanctæ orationis, & adesto mihi in doloribus mortis meæ; ne me circumdent dolores inferni, sed lætus intrem

domum æternæ felicitatis. Hoc idem, &c. pag. 2.

25. AUG.

S. Ludovicus Gallixæ Rex, matris Blancae voto imbibito, mori maluit quàm mortaliter peccare. Innocentiam corporis afflictione custodivit, dum vixit. Hac viâ Cœlum securè tenetur.

Ora pro me, S. Rex ut ita mortime parem, ut semper & ubiq; mori malim, quàm peccato, quàm iræ DEI, quàm gehennali æternitati obnoxius esse. Hoc idem, &c. p. 2.

26. AUG.

S. Alexander ad fidei lumen vocatus, maluit mori, quàm ad Idolatriæ tenebras reverti. Ad mortem damnatus, ultrò ictum excepit, & vicit. Quàm cæcus tu, qui tenebras lumini præfers!

Ora, ut vincam semper: & sanctas DEI illuminationes, tenebrosis aliorum ad peccatum suggestionibus

nibus præferam usque ad mortem :
 ut post mortem in admirabile lu-
 men videntium DEUM inducar.
 Hoc idem, &c. pag. 2.

27. AUG.

S. Margaritha Vidua panem,
 quem unicum habebat, pauperi
 (Christus erat) dedit : & cælo
 alium recepit. Ut haberet porrò,
 quod egenis daret, mendicavit
 Nemo non potest, si velit, pauperi-
 bus benefacere.

O fiat in me hic spiritus tuus, ut
 pauperibus libenter elargiar ! Tu
 verò nunc è cœlestibus thesauris
 emendica à DEO tuo & meo,
 quod pauperi animæ meæ nunc, &
 in hora mortis largiaris, quò beatè
 migrem. Hoc idem, &c. pag. 2.

28. AUG.

S. Augustinus moriturus 7. Pfal.
 Pœnitentiales cum lachrymis le-
 git, dicens : neminem, licèt nul-
 lius sceleris conscium, sine pœni-

tentia debere mori. Aut pœnitendum, aut ardendum!

O amore Divino inflammatissime Augustine! veris pœnitentiæ ac amoris lachrymis, puro DEI calore cor meum imbue: ut sancta verè pœnitentium, & verè amantium morte emoriar. Hoc idem, &c. pag. 2.

29. AUG.

S. Joannes Baptista ob reprehensam liberè Herodis Regis impuritatem, dicendo: Non licet tibi, &c. decollatus. Veritas odium parit.

Ora, ut quidquid mihi non licet, procul sit à me, ut ego sim prope DEUM. In mortis angustijs ostende mihi JESUM dicens: Ecce Agnus DEI, &c. & roga, ut JESUS peccata mea tollat à me & me tollat ad se. Hoc idem, &c. pag. 2.

30. AUG.

S. Bononius adolescens mortis cogitationem altiùs animo imprimens,

mens, posthabitis hominum judi-
cijs, mundo mori doctus est. Non
malè moritur, qui priùs mundo
moritur.

Imprime & mihi sanctas bonæ &
malæ mortis cogitationes, & hu-
manorum judiciorum despectum,
ut verè servus Christi sim, & place-
am Domino in regione vivorum.
Hoc idem, &c. pag. 2.

31. AUG.

S. Aidanus Ep. stipem, quam pau-
peri daret, non habens, donatum à
Rege Oswino equum cum omni or-
natu dedit. Verè misericordi nihil
nimis est vel charum, vel pretiosum.

Ne nega & mihi unam à te elee-
mosynam flagitanti. En mensem
hunc hodie finio, sed nescio ubi, &
quomodo vitam finiam. Tu juva,
ut feliciter & omnes menses meos
per ultimum vitæ momentum fi-
niam, & nunquam finiendam san-
ctorum æternitatē ingrediar. Hoc
idem, &c. pag. 2. SE-



SEPTEMBER.

I. SEPT.

Sanctus Ægidius puer pauperi vesté dedit. Adolefcens omnia egenis distribuit: ut perfectè DEO ferviret. Vis perfectus esse? ecce modum!

Ora & pro me; ut ita omne imperfectum meum abjiciam; ut nihil sit in me, quod divinæ majestati displiceat, & me morientem ab ejus amplexu morari possit. Hoc idem, &c. pag. 2.

2. SEPT.

S. Antoninus Sac. à puero Virginitatis amans; & Martyrij sitiens. Ejus caput in undas abjectum Angeli naviculâ exceperunt. Talibus Angeli ministrant.

Ora JESUM & MARIAM, ut boni Angeli miserum hoc meum, & (nisi DEUS protexerit) damnandum

dum caput, custodiant: & in horrendo mortis periculo ad æternam securitatem deducant. Hoc idè, &c. pag. 2.

3. SEPT:

S. Albertus Conf. olim auro cœlum vendidit, tempestate doctus, quàm propè Infernum esset in ipso portu, ex voto opum sponte inter pauperes naufragium fecit. Mergere opes, ne te mergant.

Impetra mihi à DEO illam gratiam, ut animum ab opibus perfectè abstraham: ne in portu æternitatis mihi sint oneri, quod me in barathrum infernale demergat. Hoc idem, &c. pag. 2.

4. SEPT.

S. Rosa V. ut contra procaces manus suum florem tueretur, à primis annis carnem asperitatibus armavit: Quo quia placuit DEO, ei MARIA JESUM ostendit saucium. Hoc munus est Cœli.

Ora pro me JESUM Crucifixum & MARIAM dolorosam, ut cordi meo profundè imprimatur crucifixus JESUS, utque sigillo illo signatus, quasi ipsius vivam, & illi conformis emoriar. Hoc idem, &c. pag. 2.

5. SEPT.

S. Eudoxius lictoribus mensæ adhibitis, se ipse Tyranno stitit. In tormentis oravit, ut omnes, qui suum patrocinium implorarent, audiret DEUS. An non hoc est DEUM, proximum, & se amare?

Tuum ego nunc patrocinium imploro, ora pro me apud DEUM, ut ex hac vita, quæ militia est, mihi decedenti mors sit triumphus. Hoc idem, &c. pag. 2.

6. SEPT.

S. Eleutherius solâ præsentia sua puerum à Dœmone liberavit: sed cùm id à se factum recenseret, de novo puer obsidetur; donec vanam glo-

gloriam ipse eluit. Subtile malum
vana gloria!

Repelle à me & vanæ gloriæ ne-
quam spiritum, & omnes dæmones
in mortis periculo me oppugnatu-
ros compeſce: ne in vita, vel in
morte in ullam tentationem inda-
car. Hoc idem, &c. pag. 2.

7. SEPT.

S. Stephanus ut aleas, aliósque
dierum feſtorum ludos abrogaret,
coëgit Dæmonē pro concione ta-
lem apparere, qualis ea ſuaderet:
comparuit, & nemo non abhor-
ruit, Væ ijs, qui hic non abſter-
rentur!

Ora pro me, ut non ſim ex ijs,
qui à vitijs, niſi Dæmone exhibito,
non poſſunt avocari; ſed ut ſancta
audiens monita, ſecurè tendam ad
beatam æternitatem. Hoc idē, &c.
pag. 2.

8. SEPT.

Hæc dies gaudium annuntiavit
&

& terræ & cœlo : quia hodie ex sterilibus, sed felicissimis parentibus nata est MARIA, ex qua deinde natus est JESUS. Et esse possit, qui non amet MARIAM?

O MARIA parvula beatissima! ad tuas beatissimas cunas, ad primū tuum lectulum supplex provolvor & rogo: ut me in ultimo meo lectulo morientem non deseras. Adesto mihi tunc, & juva, ut in solidissimo erga te, tuūque Filium amoris actu animam meam in tuos amplexus expirem. Hoc idem, &c.
pag. 2.

9. SEPT.

S. Gorgonius Diocletiano à cubiculis, spretis honoribus, Martyrij amore se Christianum confessus, dirè cruciatus est. Quid profunt honores, si D E U S te contemnat.

Impetra mihi gratiam; ut spretis omnibus, quæ mundus offert,
Chri-

Christum corde, ore, & opere confitens, merear ab eo agnosci, & audire: Intra in gaudium Domini tui. Hoc idem, &c. pag. 2.

10. SEPT.

S. Nicolaus Tolentinus audito illo Joan Nolite diligere mundum, &c. inter D. Aug. Eremitas se abscondit. Tantò plus diligeris à Christo, quantò minus diliges mundum.

Subveni mihi, ut bonorum MARIÆ filiorum more, divinis monitis aures & animum sequacem præbens, & bonâ vitâ vivam, & bona morte moriar. Hoc idem &c. pag. 2.

11. SEPT.

S. Euphrosynus humilibus in Monasterio culinæ laboribus libenter occupatus, ad excelsum sanctitatis apicem pervenit. Respicit humiles DEUS.

Im-

Impetra mihi veram illam, & ad feliciter moriendum necessariam humilitatem; ne superbo mihi resistat DEUS, sed humili mihi morienti det gratiam, & gloriam postea æternum viventi. Hoc idem, &c. pag. 2.

12. SEPT.

S. Guido, puer adhuc, nunquam lætior, quam cum preces DEO, aut pauperi stipem dedisset. Errata etiam minima crebrâ confessione & multis lachrymis eluit. Hæc tu dedecori ducis?

Ora pro me, ut vestigijs tuis insistam, & si DEUM offendi, sanctè doleam; ut moriturus audiam vocem, quam audisti: Veniat dilectus noster ad coronam Jucunditatis. Hoc idem, &c. pag. 2.

13. SEPT.

S. Mauritius humilitate & animarum Zelo insignis, moriturus adstantes hortatus: perpenderent
ani-

animas suas Christi sanguine redemptas esse. Tu toties tuam tantillo vendis?

Impetra mihi à JESU, ut pretiosam illam cogitationem toto corde imbibam, & pretiosam animam meam ita curem in vita, ut moriens illi reddam, qui eam redemit. Hoc idem, &c. pag. 2.

14. SEPT.

S. Christi Crucem Heraclius Imp. non nisi abjecto regio cultu, & nudipes referre potuit illuc, ubi priùs steterat. Etiam Crucem suam DEUS superbis non indulget.

Sit mihi, obsecro, humillime JESU, & viventi & morienti pretiosa humilitas, tanquam certissima felicitatis tesserà; ut, dum me humilio in terris, per crucem tuam exalter in cœlum. Hoc idem, &c. pag. 2.

15. SEPT.

S. Nicomedes Sac. dum Martyris

ris corpus sepelit, capitur; & iussus
 Dijs sacrificare, negat se alteri,
 quàm DEO Cœli sacrificare posse.
 Cave DEO subtrahas, quod DEO
 debes.

Assiste mihi, ut per totam vitam
 semper, quod DEO meo debeo,
 tribuam; ut & animam meam mul-
 tis ipsi debitam, in morte in manus
 ejus tradam. Hoc idem, &c.
 pag. 2.

16. SEPT.

S. Euphemia, multis ad Christum
 conversis, inter tormenta & feras
 illæsa fuit: donec, cæteris pedes
 lambentibus, orans unius feræ
 morso obijt. Nec citiùs, nec seriùs
 morimur, quàm DEUS velit.

Ora pro me, ut nunquam nisi
 ex DEI mei nutu vivam; sic spero,
 fiet, ut etiam non moriar, nisi ex
 DEI nutu, hoc est sanctè. Hoc
 idem, &c. pag. 2.

17. SEPT. *ליל ה' ט' תשס"ז*

Hoc die, biennio ante mortem,
S. Francisco Seraphinus crucifixus
quinque SS. Christi stigmata im-
pressit. Putas meliora sunt mun-
di oscula, an Christi vulnera?
elige.

Sine, Seraphice Pater, tibi JE-
SU stigmata in corpore portanti
molestus sim; & rogem, ut me ac-
cendas, quo cognoscam, mihi vi-
venti & morienti meliora esse JESU
diligentis vulnera, quam mundi,
vel carnis blandientis oscula. Tu
contra hæc me in vita & morte pro-
tege. Hoc idem, &c. pag. 2.

18. SEPT. *ליל ה' ט' תשס"ז*

S. Ferreolus, solutis divina vi-
catenis, Rhodanum succollantibus
Angelis tranavit. Retractus capite
plectitur. Fidelibus DEI servis
omnia serviunt.

Ora cum Angelis tuis pro me, ut
vincula, quæ me in terris tenent,
felix

felix exuam, & rapacem mortis
fluvium succolantibus Angelis
transmittam, in æterno portu fu-
turus æternum felix. Hoc idẽ, &c.
pag. 2.

19. SEPT.

S. Januarius inter flammam cum
Angelis cecinit. Blandientibus ei
feris gladio percussus est. Concre-
tus ejus sanguis in capitis conspectu
positum ebullit. DEO ferventer
servi; & nihil time.

O buliat sanguis tuus apud
DEUM pro me tum vel maximè,
quando meus hic sanguis mortuali
tempore torpescet in venis; & impe-
tra mihi ferventia animi amantis
suspiria, inter quæ expirem. Hoc
idem, &c. pag. 2.

20. SEPT.

S. Eustachius Christi Crucifixi
intra cervi cornua invitatu, fidem
amplexus est: eamque tam in exi-
lio, conjugis, filiorumque jactu-
ra,

ra, quàm inter victorias & triumphos constanter tenuit. Tu quàm leviter perdis!

Doce me obedire JESU Christo, ad bona vocanti, ut sicut ad fontem cervus, ita desideret anima mea ad DEUM. Assiste mihi nunc, & in hora mortis, ut in fide nunquam vacillem. Hoc idem, &c. pag. 2.

21. SEPT.

S. Matthæus, Publicanus ad unam Christi vocem relictis omnibus, Apostolus factus. Dum fidem Parthis & Æthiopibus attulit, securi percussus. Pudeat, promptius nos Dæmonem audire!

Intercede pro me, ut semper citò & ferventer JESU mihi loquenti obediam. Ora verò, ut ita mihi loquatur JESU, ut simul det mihi gratiani obediendi, & morte obedientium moriendi. Hoc idem, &c. pag. 2.

22. SEPT.

22. SEPT.

S. Mauritius Thebææ Legionis Princeps, occiso decimo quoquo pro Christo; author fuit, ut omnes hoc est, 6666. pro eo occumberent. Nunquam gloriosius hæc Legio vicit!

O SS. Milites, gloriosi Martyres! adeste mihi, cum militiæ meæ finē moriendo imponam. Orate & clamate tunc pro me, ad omnia muto: ut me, licet meritis meis bona morte indignum, tamen propter JESU & MARIÆ merita, vestrâ societate dignetur DEUS. Hoc idem, &c. pag. 2.

23. SEPT.

S. Thecla à S. Paulo in vinculis conversa, Christo nupsit: non satutam se videns inter homines, fugit & vicit. Fugiam & ego perniciofa hominum confortia.

Adesto mihi S. Virgo in arena mortis, & protege me, ne fera pessima
ani-

animam meam devoret; sed duc me tecum in paradifum. Hoc idem, &c. pag. 2.

24. SEPT.

S. Gerardus Hungarus Christi & MARLÆ cultum docuit. Nihil negavit, quod interposito MARIÆ nomine rogabatur. Quid talis non impetret à MARIA?

Ora pro me, ut & ego alios ad MARIAM traham. O me totum, vitam & mortem meam ejus amori consecrem: ut post mortem me ipsa tanquàm suum in cœlum deducat. Hoc idem, &c. pag. 2.

25. SEPT.

S. Puer, quod audierat ab Angelis cantari: S. DEUS, S. Fortis, S. Immortalis, miserete nobis, docuit suos. Et quievit à terræ motu Constantinopolis. Disce DEUM placare ab Angelis.

Doce me placare DEUM; & maximè illâ horâ, quæ ultima erit,

I

me-

mecum clama : S. DEUS, da sanctè vivere in timore tuo ! S. Fortis, da fortiter mori in amore tuo ! S. Immortalis da morienti sanctam immortalitatem. Hoc idem, &c. p. 2.

26. SEPT.

S. Justina legem Christi clam docta, parentes eandem docuit. Impuras faces, à mago accensas signo Crucis extinxit, quo & ipsum convertit. Disce vim Crucis.

Impetra mihi, ut multos doceam viam salutis : & ne ab ea aberrem, adesto mihi in omni tentatione, maximè cùm migrabit anima ex hac vita : & S. Crucis signum tentatori objice, ut nocere non possit. Hoc idem, &c. pag. 2.

27. SEPT.

S. Elzearius Comes à MARIA doctus, in aula sua neminem, nisi probum passus est. Passioni Christi tam devotus, ut in latere ejus se diceret habitare. An tu Magistram habes MARIAM? mores tuos inspice.

Ora MARIAM, ut à Christo, quod me docet sanctè vivere & mori, mihi discendi gratiam impetret: & ut vivus in latere JESU habitem, & moriens in illud spiritum meum emittam. Hoc idem, &c. pag. 2.

28. SEPT.

S. Wenceslaus Dux, ab avia Ludmilla piè educatus, nudis pedibus hyeme templa obibat, sacerdoti ministrabat, omnia oratione inchoabat. Tanti est à pijs educari.

Exora mihi gratiam, educatoribus (qui boni mihi non desunt) obsequendi; ut sic recto tramite tendam ad portù felicissimæ æternitatis, quam tu inhabitas. Hoc idem, &c. pag. 2.

29. SEPT.

S. Michaël. Archang. Angelorum bonorum Dux, malorum dormitor; cui DEUS tradidit animas sanctorum, ut ducat eas in paradisum.

Hunc, si sapiſ, ſtude habere Patronum.

Ne me deſere morientem, S. Michaël, & cum Dœmone luçtanti; & ſuſcipe benignus animam meam migrantem. Ora pro me, ut te Duce, & Angelo meo ita vivam & moriar, ut hæreditatem capiam ſalutis. Hoc idem, &c. pag. 2.

30. SEPT.

S. Hieronymus flens dicebat: ſive edam, ſive bibam, ſive aliud agam ſemper videtur mihi ſonare: Surgite mortui, venite ad iudicium. Sancti timent iudicari: tu rides?

Ora pro me, ut & ego, dum vivo, à Judicijs Diviniſ timeam, & ita me parem ad ſecurum tranſitum ex vita: ut demum inter ſanctas ad Crucifixum JESUM aſpirationes exſpirem. Hoc idem, &c. pag. 2.



OCTO.



OCTOBER.

I. OCT.

SANCTUS Remigius Rhemorum Archiep. tam benignus erat in pauperes, ut dominante fame, ingentem frumenti numerum coarcervari jufferit, unde alerentur pauperes. Cùm ejus inimici huic frumento sceleratas faces admovissent, ad ignem accessit: Quin & vos, inquit, acceditis: nunquam non prodest ignis. Utinam & tibi!

S. Remigi, age, ut & mihi profit ignis inferni. Crebriùs huc descendam vivens, ne moriens æternùm cremer. Hoc idem, &c. pag. 2.

2. OCT.

S. Leodegarius Cruce è templo armatus hostibus suis obviam ivit: nec ullis tormentis coërceri potuit, quin de DEO loqueretur. Non confunditur, qui in Cruce spem ponit.

Ora pro me, ut non nisi in Cruce sperem. Hæc mea fit armatura contra hostes, in ultimo maximè conflictu, & in adversis solatium; ut securè transeam ad æternos triumphos. Hoc idem, &c. pag. 2.

3. OCT.

S. Joannes Chuzubita, humilitate eximius, in adversis non aliud solitus dicere, quàm; si DEUS hæc pati potest, quidni ego velim? Et quis tu, qui nolis?

Doce me agnoscere meum nihilum, ut verè sim parvus in oculis meis, & in omnibus me DEI dispositioni accommodem; ne me tanquam sibi contrarium à cœli porta repellat. Hoc idem, &c. pag. 2.

4. OCT.

S. Franciscus simul pauperrimus & ditissimus. Vis nôsse, quomodo? Relictis omnibus possedit DEUM, in DEO omnia. Non potes omnia dimittere? saltem cor non affige.

Agno-

Agnoscam hanc veritatem, quam docuisti: DEUS meus & omnia; ut maturè ab omnibus, quæ DEUS non sunt, cor abstraham, & nihil sit, quod in morte me impediat; quò minùs tendam ad DEUM, qui est omnibus omnia. Hoc idem, &c. pag. 2.

5. OCT.

S. Meinulphus audito: Vulpes foveas habent, Filius hominis non habet, ubi caput ponat: Illico Christo locum in corde dat, & templum struit. Quoties eadem audis, & animum claudis?

Impetra mihi sacris eloquijs tam promptas aures & cereum cor; ut me, meaque DEO planè transcribam: non enim me in morte recipiet, nisi eum in vita recepero in cor meum. Hoc idem, &c. pag. 2.

6. OCT.

S. Bruno, audito, probatæ aliàs vitæ viro post mortem, se justo DEI

judicio accusatum, judicatum, condemnatum afferente, elongavit fugiens & mansit in solitudine. Quisquis sapis, time judicia DEI.

Imprime mihi magna illa æternitatis lumina, & tepidam voluntatem meam accende; ut solide perpensis DEI Judicijs, me ita parè, ut misericordissimo DEI judicio adjudicer cœlo. Hoc idem, &c. p. 2.

7. OCT.

Hoc die Anno 1571. ad Insulas Echinadas, ope DEI paræ Turcas Duce Joanne Austrio, Pius V. cum Hisp. & Venetis vicit. Cæsa Barbarorum 30000. Christiani liberati 3486. naves captæ 190. flammis & aquis haustæ 80. Tormenta hosti crepta majora 116. minora 256. Hæc scilicet Virgo Lunam habet sub pedibus.

Invictissima Virgo! nos etiam hodie juva, & crescentem semper Lunam pedibus tuis contere. Christianis

stianis unum cor & animam unam impetra, ut cum illis faciat potentiam suam DEUS. Mihi verò nunc, & in ultimo mortis conflictu sis cum JESU tuo certanti tessera: ut vincam, & tu mihi sis MARIA de Victoria in terris, & MARIA de triumpho in Coelis. Hoc idem, &c. pag. 2.

8. OCT.

S. Birgitta Sueca, ex quo JESUM faucium vidit, nunquam sine lachrymis de ejus Passione meminit, & totâ vitâ pauperibus infirmis servivit. O vel semel sic ego Christi Passionem recolam!

Ora pro me, ut sic Crucifixum & MARIAM amem, ut eorum amore pauperibus & infirmis libenter me impendam. Inde spero, JESUM in morte mihi ad futurum, qui, quod uni ex his minimis fit, sibi factum æstimat. Hoc idem, &c. pag. 2.

9. OCT.

9. OCT.

S. Dionysius à S. Paulo conversus, in Gallia multa pro Christo fecit, & tulit. CX. annorum senex capite plexus, quod ipse 200 passus ad tumulum tulit. Vis scire quantum Christum ames? quantum pro eo pateris.

Impetra mihi id, quod optimum est: ut, dum vivo, caput meum in manibus portem. DEO & superioribus illud subjiciendo, ut demum in morte illud in sinum JESU mei deponam. Hoc idem, &c. pag. 2.

10. OCT.

S. FRANCISCUS BORGIAE Gandiæ Dux, viso Isabellæ Imp. nuper formosissimæ putrescente cadavere, in JESU Societatem se abdidit. Corpus ut servum habuit: singulis horis ad mortem se paravit. Viso in MARIÆ sinu JESU LO decubat: Mihi Virgo hoc onus gestat:
mihi

mihi lac Matris & Filij sanguis bullit. O omnes hoc agnoscant.

Impetra mihi S. FRANCISCE, ut bulliat & pro me nunc, & in hora mortis peroret lac Matris, & Filij sanguis, ut lacte candida & sanguine purpurea mea anima, ad fontes ipsos, JESUM & MARIAM abeat. Hoc, &c. pag. 2.

II. OCT.

S. Bruno Archiep. Col. visis, sub divinis, Henrici Fr. & Cunonis Affinis sui fabulis & levitate, palam arguit, dicens: familiaritatem hanc fore semen magnæ inimicitiae: quod & factum. An non & hodie id pluribus dici posset:

Ora pro me, ut nunquam ego tam perniciosam sub divinis cum homine familiaritatem contraham, quæ mihi possit facere æternam cum DEO inimicitiam: sed potius sim cum DEO in templis &

ubique familiaris nunc & in æternum. Hoc idem, &c. pag. 2.

12. OCT.

S. Wilfridus patientiâ insignis, quadriennium vitæ, **MARIÆ** ope impetratum, præparationi ad mortem impendit. Tu, si sapias, totam vitam huic impende.

Intercede pro me cum **MARIA** apud **JESUM**, ut det mihi tempus & voluntatem præparandi me ad S. mortem; ut ita mihi vitam pro roget, vel abrumpat, prout scit mihi prodesse ad æternitatem. Hoc idem, &c. pag. 2.

13. OCT.

S. Venantius Abb. audiens Angelos canentes: Sanctus, se suosque ad **DEUM** laudandum accendit, dicens: Væ nobis inertibus! Putas hoc væ nos evasuros?

O accendat & me ad laudes divinas
cœle-

cœlestis Curia! Me verò, ò DEI amice; juva nunc & in agône mortis, ut non iners, sed fervens vivâ; ne post mortem audiam illud tepidorum: Væ! Hoc idem, &c. pag. 2.

14. OCT.

S. Burchardus primus Herbipoli Episcopus, è tenebris in lucem Franconiam deduxit, eique Christi & MARIÆ amorem instilavit. Omnibus charus ob Zelum & modestiam. O non sim ego degener filius!

Excita in me, si tepescat, in JESUM & MARIAM amorem; ut in agône & à te filius tuus hoc signo agnoscar, & à JESU & MARIA vicissim merear amari, & æterna beatitudine, quâ jam frueris, donari. Hoc idem, &c. pag. 2.

15. OCT.

S. Terefia V. Christo à B. V. desponsata, amore ejus vovit semper

a re, quod perfectum nôisset, Viso semel JESU spinis coronato, semper dicebat: Domine aut pati, aut mori. Quid tu eliges?

Impetra mihi, sic DEUM amare, ut eligam nunc, aut pati, aut mori. Ora pro me, ut eligam semper optima? & adesto cum JESU & MARIA dilectis tuis agôni meo, ut ab illis tunc assumar inter electos, futurus tecum in æternum. Hod idem, &c. pag. 2.

16. OCT.

S. Gallus, ne carnem hostem sentiret, triduanis jejunijs, cilicijs, & catenis domuit. Hinc quæ voluit, impetravit à DEO. Disce, qui quereris à DEO nihil te impetrare.

Impetra mihi, ut domem carnem meam, & elevem ad cœlum; ne illa indomita è cœlo detrahat blandientem & conniventem nimium animam meam in Infernum. Hoc idem, &c. pag. 2.

17. OCT.

17. OCT.

S. Andreas Sanctorum Imagines per multa tormenta propugnavit; in quibus non aliud dicebat, quàm: Domine serva, Domine dirige. Si pro DEO pugnas, non metue.

Dic pro me vivente & moriente: Domine serva, Domine dirige! & doce me Sanctorum imagines colere, ut adsint mihi in vita & morte, & me servent & dirigant in viâ pacis æternæ. Hoc idem, &c. pag. 2.

18. OCT.

S. Lucas Evang. primus pictam sua manu MARIÆ effigiem posteritati reliquit, quæ etiam hodie miraculis Romæ claret. O si & nos MARIÆ effigiem in moribus exprimamus!

Impetra mihi à JESU & MARIA felicem coronidem omnium gratiarum, hoc est, felicem mortem; ut MARIAM non jam à te pictam, sed

sed de facie ad faciem videam in templo sancto gloriæ in æternum. Hoc idem, &c. pag. 2.

19. OCT.

S. Ethbinus adol. ad illud Christi: Qui non renuntiat omnibus, non potest meus esse discipulus. omnes opes egenis, seque DEO dedit. O nos indociles! quàm pauci hanc Philosophiam capimus!

Impetra mihi hanc docilitatem, & in miseros charitatem; ut quando cum morte luctabor, à Christo agnoscar discipulus, & ab ipso excipiar in cœlo. Hoc idem, &c. pag. 2.

20. OCT.

S. Fides V. pro Christo super candentem craticulam lento igne assata, constantiâ suâ Caprasium ad Martyrium pellexit. Pudeat te, à Virgine Patientiâ vinci!

Offer DEO pro ultimo lectulo meo aliquid de meritis igneæ tuæ

craticula

craticulæ : & roga, ut mihi morienti rorem æternæ suæ benedictionis infundat. Hoc idem, &c. pag. 2.

21. OCT.

S. Ursula ad sponsum suum itura, adverso vento Coloniam ejicitur : ubi ab Hunnis cum 11000. Virg. pro fide & Virginitate sagittis confossa, agonizantium est Patrona. Invoca, & experiere.

S. Ursula cum sodalibus, advola ad agônem meum, nec permitte me perire. Vallate me morienté, & facta quasi contra hostes meos manu, me in illa, in qua estis, æternitate collocate. Hoc idem, &c. pag. 2.

22. OCT.

S. Joannes nomine Bonus, sed ex divitijs malus. Ex matris precibus & morbo sapuit, & opes abiecit, ut DEUM teneret, & esset bonus. Tales bonos Christus amat.

Ora

Ora pro me Christum, qui te ad vulnerum suorum oscula invitavit, ut me doceat amare & odisse, quod ille amat & odit; & ut morienti mihi è suis vulneribus propinet vitam, in qua nemo est nisi bonus. Hoc idem, &c. pag. 2.

23. OCT.

S. Macarius post vitam diu austerè actam, incautus foeminam tugurio recipit, & in impuram cogitationem dejicitur. Culpam multis lachrymis & jejunijs eluit. Vis non labi? semper cave.

Impetra mihi, ut nunquam non cautè ambulem: aut si incautè prolapsus sum, illico resurgam; ut cum Angelis super poenitente gaudentibus æternum gaudeam. Hoc idem, &c. pag. 2.

24. OCT.

B. Joannes Angelus, MARIÆ fervus, carnem vitæ austeritate totam prodegit; ut in morte nil nisi cutem

cutem & ossa relinqueret. Hunc prodigum imiteris, licet.

Ora pro me, ut MARIÆ serviens, & carnem spiritui subigam, & bene vivam; quo bene moriar, & tecum inter MARLÆ servos merear in coelis numerari. Hoc idē, &c. pag. 2.

25. OCT.

S. Chrysanthus paucis ex Evangelio lectis, Christo manus dedit: & contra patris blanditias, mulierū insidias, Tyranni sævitiem stetit, & vicit. Si stare nōsti pro DEO, stabit DEUS pro te.

Aperi mihi castissimis tuis precibus cor ad legenda & agenda, quæ me legere & agere vult DEUS; ut morientem me lux sancta adducat in montem sanctum DEI. Hoc idem, &c. pag. 2.

26. OCT.

S. Fulco è pauperrimo factus Episcopus. Hujus memor, quotidie

tidie 5. studiosos pauperes cum suo Magistro mensæ adhibuit. Honores mutant mores: quàm pulchrú, si in meliores!

Revoca mihi frequenter in memoriam, quis, qualisve fuerim, ne elatus ruam, unde non tam facile resurgam: & ut per pauperum manus mihi securam semitam sternam ad vitam æternam. Hoc idem, &c. pag. 2.

27. Oct.

S. Elesbaan Rex, ter invocato S. Gabriele hostem vicit. Victor positus Regijs vestibibus, privatâ & asperâ vitâ ad mortem se paravit. Quidni cœlum applaudat?

Invoca pro me Gabrielem, ut mihi morienti adsit; qui (frigidè licèt) toties ejus ad MARIAM orationem perorans petij, ut illa me nunc, & in hora mortis meæ tueatur. Hoc idem, &c. pag. 2.

28. Oct.

28. OGT.

SS. Simon & Judas, Ægypto ille, hic Mesopotamiæ, dein simul Perfidi Christum prædicantes, & morte Christum glorificârunt. Si sic Christus glorificatur: certè tu non honoras.

Ora pro me, ut in vita omnia dirigam ad DEI, & majorem quidem gloriam, & denique morte in DEI gratia obitâ, DEUM glorificè; ut ab ipso doner æternâ gloriâ. Hoc idem, &c. pag. 2.

29. OCT.

S. Ermelindis V. 12. anno. sensit corrivales DEUM & Mundum: elegit pulcherrimum, Christum: & ne perderet, mundo exivit. Putas sapit, qui mundum eligit?

Impetra mihi, ut agnoscam quantum Christus sit mundo melior; ne præ Christo mundum, qui totus in maligno positus est, eligam, quo cû impossibile est salvarî. Hoc idè, &c. pag. 2.

30. OCT.

30. OCT.

S. Zenobius aditam hæreditatem brevè inter pauperes dilapidavit: pro qua reddidit ei DEUS, ut morbos solo tactu curaret. Date & dabitur vobis.

Ora pro me, ut hanc artem feliciter discam, quâ DEUM mihi faciam tam liberalem amicum: ut, ubi ab omnibus deserar, reddat mihi hæreditatem æternam. Hoc idem, &c. pag. 2.

31. OCT.

S. Wolfgangus Ep. per vitam suam ingenium suum gratis Juventuti ad DEI gloriam excolendæ impendit. In lubrico stat Juventus: obsequium præstas DEO, si dirigis.

Adjuva me, ut Juventutem & meam & aliorum eò dirigam, ubi omnia momenta vitæ sanctis DEI obsequijs impendantur; ut in hora mortis sanctam æternitatem feliciter inchoemus. Hoc idem, &c. pag. 2.

NO-



NOVEMBER.

1. Nov.

Hodie in Ecclesia festus dies agitur in honorem omnium SS. O si tu sis aliquando in numero eorum!

O vos omnes SS. qui ulli morientium opem unquam tulistis, ferte & mihi! & tu in primis Augustissima omnium SS. Regina, & vos omnes, qui singulari cordis affectu MARIAM hinc amastis, quique singulare illius auxilium in agone experti estis! O amem & ego illam ita, ut etiam experiar! Offerte pro me vestra merita, & impetrate, ut una vobiscum æternis amoribus amem JESUM & MARIAM. Hoc idem, &c. pag. 2.

2. Nov.

Hodie per Ecclesiam fit Commemoratio Animarum in Purgatorio, ut

ut precibus fidelium juventur. Multæ sunt, quæ ab omnibus sunt desertissimæ: & multæ, quas B. V. vellet juvari: multæ, quæ diu jam opem tuam expectârunt. Quod tibi voles fieri aliquando, fac illis.

O SS. Custodes Angeli Animarum, quæ in Purgatorio igne expiantur, excitate me & suggerite mihi, ut indefesso studio animas illas juvem, quæ amicæ DEI sunt, sed adhuc à facie DEI exules, quæque seipsas juvare non possunt: ut & ipsæ, & vos earum Custodes Angeli, & SS. Patroni Cælites, & potissimum MARIA earum omnium Advocata maxima, mihi & agonizanti, & illic maculas eluenti adsint; ne prius cessent pro me DEUM orare, quàm sim cum illis in æternitate sancta. Hoc idem, &c. pag. 2.

3. Nov.

S. Wenefrida V. Christo nupta,

ta, in templo, quò fugerat, à le-
none pro Virginitate & fide ob-
truncata est. Quàm malè tuta
Virginitas apud alterum sexum!

Impetra mihi, ut fortiter pro
animæ salute pugnem, dum vivo,
& dum moriar: & coronam acci-
piam æternitatis legitimè certanti-
bus paratam. Hoc idem, &c.
pag. 2.

4. Nov.

S. Carolus Boromæus E. R.
Card. redditus Ecclesiasticos non
nisi in pauperum usum convertit.
In peste populo suo ipse Sacramen-
ta ministravit Mediolani. Verè bo-
nus, Pastor!

S. Carole, obsecro, ut sis etiam
pastor animæ meæ: ideo rogo, quæ
à DEO & MARIA per Angelum
tuum pro felici morte petijsti, mihi
de morte sollicito benignus impe-
tra, méque inter illos repone, quos
cœlo lucratus es. Hoc idem, &c.
pag. 2. K 5. Nov.

5. Nov.

S. Emericus S. Stephani Reg. Hungar. Fili. audiens, cœlo nil gratius esse Virginitate, suam DEO dicavit, & sponsæ persuasit. O quàm erunt cœlo ingrati, qui eam prodigunt!

Ora pro me unà cum B. V. à te in Matrem electâ, ut semper id agâ, quod Superis maximè placere cognovero: ut citò post mortem unà tecum DEUM laudare incipiam. Hoc idem, &c. pag. 2.

6. Nov.

S. Leonardus tam charus erat DEO, ut precibus suis reos è carceribus, solutis sponte vinculis, educeret. Disce orare, & potes quid vis apud DEUM.

Ecce mortis (utinam non æternæ!) rea hæc anima mea, carcere hoc per mortem egredi horret, quia æternos timet. Elice ex oculis meis lachrymas, quibus vincula peccatorum

torum rumpam, ut sim æternùm liber. Hoc idem, &c. pag. 2.

7. Nov.

S. Engelbertus Archiep. Col. de Friderici Cognati insidijs monitus, noluit eum prodere: & moriens pro ipso, à quo pro Ecclesia 47. vulneribus sauciatus fuerat, à D E O sanctam mortem exoravit. Hoc est, Christi esse discipulum.

Doce me, obsecro, hanc charitatem, ut agnoscar verus Christi discipulus in vita & morte. Hoc idem, &c. pag. 2.

8. Nov.

S. Godefridus Ep. quotidie 13. pauperes, abluens priùs eorum pedes, cibavit: hyeme suis nudos vestibus textit. Reis subditis supplex factus, ut resipiscant. Talis in te erit DEUS, qualis tu in alios.

Ora pro me DEUM, ad parcendum quàm ad puniendum proniorum; ut me, ceu filium benignè ar-

guat viventem, ne æterno furore corripiat morientem. Hoc idè, &c. pag. 2.

9. Nov.

S. Theodorus miles, accenso Matris DEORUM fano, dirè fame & unguis cruciatus, pfallens in igne expirat, Lætè moritur, [qui bene vixit.

O quàm felix & ego hinc migra-
bo, si tecum & cum Angelis mig-
rem! Impetra mihi, ut bene vivam,
ut mortem habeam lætam, quâ
DEO æternùm benedicam. Hoc
idem, &c. pag. 2.

10. Nov.

S. Theodista V. è captivitate Arabica, ut pudorem servaret, fugit, & in sylvis 35. annos non nisi ex herbis vixit. Non expugnatur pudor, nisi proditor sit animus.

Intercede pro hac anima mea miseranda, quæ tam languidè se parat ad æternitatem: impetra mi-

hi

hi è tuis ardoribus unam constantem scintillam, quæ mihi semper in corde vivat usque ad mortem. Hoc idem, &c. pag. 2.

11. Nov.

S. Martinus, adhuc Neophytus in paupere Christum vestivit. Moriturus Dæmonem videns dicebat: Nihil in me funeste reperies. O me felicem, si hoc dicere possim!

Interpone pro me preces tuas, ut, dum vivo, funestum illum vincere assuescam: ne quid in morte bestia illa cruenta reperiat. Hoc idem, &c. pag. 2.

12. Nov.

S. Didacus, idiota MARIÆ festa jejunijs colebat, & Crucis amantissimus, exspirans arrepta Cruce dixit: Dulce lignum, &c. Ecce surgunt indocti, & doctis Coelum eripiunt.

Intervenipro me, ut MARIAM & Crucem sic semper amem, ut

dulce lignum, dulces clavi, & Crucis dulcissimum pondus JESUS, dulcem mihi morienti det æternitatem. Hoc idem, &c. pag. 2.

13. Nov.

B. STANISLAUS KOSTKA DE Ipará sic amavit, ut cum Socijs certaret, qui magis eam honoraret. Hinc ægro illa JESULUM in sinum dedit, & morbo fugato, Societatem ejus jussit ingredi. D. Barbaræ devotus obtinuit, ut ab Angelis in morbo Ven. S. reficeretur. Societatem Jesu, ut expeditiùs adiret, fugit Patrem morantem: ut impetraret, Dilingæ in Convictu mediastinum egit. Adhuc Novitius meritorum plenus, inter SS. Nomina abiit in Cœlum. Nunquam frustra coluntur Cœlites.

Adesto mihi cum JESU & MARIA, Barbarâ morientium Patronâ, & SS. Angelis, & his tuis auxilijs ultimum mei morientis lectulû
bea;

bea; ut in tuo & illorum sinu spiritum meum felix deponam. Hoc idem, &c. pag. 2.

14. Nov.

B. Albertus S. Thomæ Magister, audito MARIÆ Magistræ suæ nomine dulcissimè flevit. Ultimo vitæ triennio omnis scientiæ repente oblitus, quotidie tumulum suum est contemplatus. Putas, talis imparatus morietur?

Hoc est, quod desidero B. Alberte: Magistram sanctè vivendi & moriendi habere MARIAM; adjuva me, ut nunc sanctè amem, & postea sanctè moriar. Hoc idem, &c. pag. 2.

15. Nov.

S. Leopoldus Austriae Marchio, in egenos, & ad fundanda DEO templa liberalis, sibi thesauros condidit in Cælo. In æternitate ne egeas, jam provide.

Impetra mihi, ut semper sim li-

beralis in pauperes, & ea quæ DEI sunt: ut ita vicissim DEUM in morte, ac æternitate mea erga me experiar liberalem. Hoc idem, &c.

16. Nov.

S. Edmundus malos socios fugiens, JESUM habuit socium, à quo doctus contra repentinam mortem, vesperi cruce frontem signare & dicere: JESUS NAZARENUS REX JUDÆORUM. Fuge, qui JESUM fugant, & habebis socium JESUM.

Ora pro me JESUM tuum & MARIAM, ne me improvisa morte mori permittant: sed faciant, ut sim semper paratus mori. Hoc idem, &c. pag. 2.

17. Nov.

S. Gregorius, Thaumaturgus dictus ob miracula. Maximum ipse fuit, quòd MARIAM & S. Joannem Ev. Magistros in fidei mysterijs habuit. Nec mirum: Virgo fuit. Ora

Ora pro me Magistros tuos MA-
RIAM & Joannem, ut me docilem
reddant scientiæ æternitatis. Ora
DEUM, ut in vita & morte mira-
bili sua ope me protegat, ut salver.
Hoc idem, &c. pag. 2.

18. Nov.

S. Odo plus vanis Poëtis, quàm
pijs libellis temporis inpendens, ex-
pertus est cœlum sibi iratum. Mo-
nitus destitit. Putas, cœlum non
irascetur, si volvas lasciva?

Adesto mihi & oranti, & studen-
ti, & quidvis aliud agenti: præci-
puè morienti; ut avertas à me,
quidquid veneno suo me tradere
potest æternæ morti. Hoc idem, &c.
pag. 2.

19. Nov.

S. Elisabetha Regina, visa Cru-
cifixi effigie, omnem ornatum ab-
jecit, & exstructo Xenodochio
900. pauperibus serviebat, Mor-

tuo conjuge, arce pulsa, fortiter tulit. Tu non possis, quod fœmina?

Accende me illo, quo JESUM in Cruce amâsti, igne cœlesti. Feliciter moriar, si ita succensus extinguar; neque ardebo igne infelicis æternitatis. Hoc idé, &c. pag. 2.

20. Nov.

S. Dasius Juvenis gratiosissimus, maluit Christo pro fide victima fieri, quàm Saturno more patrio, delicijs saginatus, immolari. O sic vel parentes, vel Filij sapiant!

Ora pro me, ne suis me delicijs mundus fami & siti æternæ sagine: sed ut potiùs fame & siti ad suas epulas paret DEUS, & hujus solius vivens & moriens sim victima. Hoc idem, &c. pag. 2.

21. Nov.

SS. JOACHIM & ANNA MARIAM trimulam, longè charissimam obsequio DEI in templo dicârunt. Ipsa prom-

promptè secuta, & sponte sola templi gradus ascendit. Habent parentes & liberi, quo erubescant.

ODEO, Angelis, & hominibus amabilis parvula MARIA! ego me tibi, & per te DEO præsentio in servum. Ad te jam pertinet, ô Domina, curare, ut ita vivam, ita moriar, sicut decet tuum servum, & à te DEO offerendum. Adesto mihi ô dulcissima parvula, hodie & totâ vitâ meâ! Hoc idè, &c. pag. 2.

22. Nov.

S. Cæcilia, licèt Virginitatis suæ singularem haberet Angelum Custodem, tamen cilicio, jejunio, oratione, & lectione sacra eam custodivit. Nimirum inter hæc tutissima Virginitas.

Impetra mihi, ô S. Virgo, mortificationis studium : & pete pro me à DEO, pro sancta ad mortem præparatione, quod pro te petisti, ut fiat cor meum immaculatum. Hoc idem, &c. pag. 2. S.

23. Nov.

S. Clemens Pont. Chersonæ in exilio 2000. Christianorum, in latomijs aquæ dulcis fontem orans impetravit. Qui rectè novit orare, omnia habet.

Roga Agnum illum fontis Judicè, ut me fonte vitæ nunc, & morientem ita recreet; ut postea torrente voluptatis perpetuæ poter. Hoc dem, &c. pag. 2.

24. Nov.

S. Chryfogonus nullis honoribus, aut divitijs induci potuit, ut Deos coleret, qui (ut aiebat) essent Dæmonum simulacra. Etiam hodie sub his escis Diabolus sua retia ponit; cave.

Impetra mihi tam generosos spiritus: ut non quæram alium honorem & divitias, quàm DEO servire; cui servire in terris, est regnare in Cœlis. Hoc idem, &c. pag. 2.

25. Nov.

25. Nov.

S. Catharina Maximinum facrificantem Dijs arguit, 50. Philosophos Christo lucrata: spretis Imp. amoribus, per Martyrium eos secuta est. Hoc Christianorum est.

Converte me, ut totus ab ijs, quæ DEUS non amat, averfus, totus convertar ad JESUM: & ad memorientem sit ejus conversio, quâ mihi æternùm faciem suam ostendat. Hoc idem &c. pag. 2.

26. Nov.

B. Sylvester, viso sodalis sui olim pulcherrimi cadavere, exclamavit mundo valedicens: Hoc speculum meum est: sum, quod hic fuit; brevi ero, quod hic est. Hoc speculum & tu inspice.

O B. Juvenis! objice mihi quotidie hoc speculum, ut agnito, quid sim, & quid futurus sim, discam mundum spernere, & totum me ad DEUM convertere. Hoc idem &c.

pag. 2.

K 7

27. Nov.

27. Nov.

S. Jacobus in Isdegerdis gratiam Christum ejurat: sed à matre & conjuge objurgatus, resipuit, & membratim dissectus, sanguine factum obliteravit. Errare humanum est, perseverare Diabolicum.

Impetra mihi, toties DEO infideli, per merita tua gratiam, ut in lapsu non perseverem, sed per poenitentiam exsurgam, & usque ad vitæ finem in bono perseverem. Hoc idem, &c. pag. 2.

28. Nov.

S. Stephanus M. acerrimè pro Sanctorum imaginibus pugnans, exilium primò, dein & mortem tulit. O sic DEI in nobis imaginem tueamur!

Ora pro me, ut DEI in me Imaginem contra Dæmonem, Mundum & Carnem sanctè defendam: ut in illa die DEUS imaginem suam agnoscat, & in sua recipiat. Hoc idem, &c. pag. 2.

29. Nov.

S. Radbodus Sanctorum vitis ve-
lutspeculo usus, ut suam compone-
ret. Morituro adfuit B. V. quòd
ejus in precibus semper fuisset me-
mor. Numquid & tu sic eam po-
tes facere Patronam?

Adjuva me, ut semper sim MA-
RIÆ memor, quò & illa sit memor
mei: & ut componam vitam me-
am ad speculum vitæ & mortis JE-
SU, & SS. ut mors mea sit speculum
mortis sanctæ. Hoc idem, &c.
pag. 2.

30. Nov.

S. Andreas Ap. in Achaja pro fi-
de cruci affigendus dixit: O bona
CruX, diu desiderata! Accipe me
ab hominibus, & redde me Magi-
stro meo. Non est brevior ad
DEUM via Cruce.

O Crucifixe Crucifixi discipule!
impetra mihi, ut non fugiam Cru-
cem, sed pretiosè æstimem. Et ora

ut

ut Christi Crux ultimam meam
Crucem reddat efficacem; ut per
eam veniam ad gloriam. Hoc
idem, &c. pag. 2.



DECEMBER.

I. DEC.

SANCTUS Philaretus Rusticus, ob
liberalitatem in pauperes, vidit
neptem suam Constantini Imp.
Conjugem, se consulam. Testa-
mento orbi reliquit, quod ipse fe-
cit: Estote misericordes.

Adjuva me, ut hoc documentū
altè animo imbibam, & si corporali
non possum, spirituali eleemosyna
pauperibus succurram; ut etiam
in morte DEI misericordiam expe-
riar. Hoc idem, &c. pag. 2.

2. DEC.

S. Bibiana propter Christum bo-
nis omnibus spoliata, dein ad co-
lumnam plumbatis cæsa, obiens

tri-

triumphavit. Hac morte an tu gloriosiore[m] nōsti?

Precibus tuis me conforta, ut nulla tormenta à fide & Christo me absterreant; sed quidvis libenter patiar, ut vivens & moriens JESU meo fidelis inveniar. Hoc idem, &c. pag. 2.

3. DEC.

S. FRANCISCUS XAVERIUS Indiarum Ap. insatiabilis animarum Zelator, laboribus, exemplis, precibus & miraculis multis hominum millibus felicem mortem & æternitatem procuravit. In laboribus & ærumnis dicebat: Amplius, amplius Domine; in solatijs: fatis est, Domine, fatis est. Quàm multi hodie sentiunt contrarium!

O Genuine S. IGNATIJ fili! lucrare, obsecro, etiam hanc animam meam. Adesto mihi ægro & morienti, qui Mastrillo tuo & plurimis alijs morientibus adfuisti. Com-
men-

menda me Crucifixo tuo JESU & MARIÆ, ad quos suspirans expirasti; & impetra mihi sanctum desiderium, multa pro Christo patiendi, donec me ducens ad cœlum JESUS dicat: satis est. Hoc idem, &c. pag. 2.

4. DEC.

S. Barbara V. ab ipso Patre suo pro Christo decollata. A Christo obtinuit, ut sinè Viatico nemo, qui ipsam colet, emoriatur. Tantillo tantam gratiam emes?

Numera me inter clientes tibi devotos, ut tuis precibus adjutus, non discedam ex hac vita, nisi Corpore & Sanguine Christi munitus; in cuius cibi fortitudine progrediar ad montem DEI. Hoc idem, &c. pag. 2.

5. DEC.

S. Sabbas Abb. signo Crucis savientes flammæ extinxit. Contra Dæmonem, ab ipso Christo armatus

tus, pugnavit, & vicit. Pugna: & DEUS non deerit.

Impetra mihi, obsecro, à JESU, ut nunc & in ultimo meo agone me armet; ut in JESU Doemonem vincam, & victor æternùm vivam. Hoc idem, &c. pag. 2.

6. DEC.

S. Nicolaus Ep. quam Infans jejuniij consuetudinem cœpit, ut feriâ 4. & 6. semel tantùm, idque vespere lac sugeret, totâ vitâ suâ tenuit. Cœpisse à teneris & continuâsse laudabile est.

Doceme constanter tenere sancta proposita, ut ita ad quævis mortis pericula paratus, morte sancta ad patriam securè perveniam. Hoc idem, &c. pag. 2.

7. DEC.

S. Ambrosius Augustino converso, Te DEUM laudamus fecit & cum eo cecinit. Moriturus flentibus alijs dixit: Mori non timeo; bonum

num Dominum habemus. Per nos fiat, ut bonum habeamus.

Ora pro me, ut DEO ferventer in vita serviendo, illum mihi bonum Dominum faciam; ut in fine vitæ nec me vixisse pudeat, nec timeam mori. Hoc idem, &c. pag. 2.

8. DEC.

B. Virgo ab æterno in Matrem Filij DEI electa, speculum est sinè macula. Tuas tamen tibi ostendit: inspice.

OMARIA sinè macula concepta! fiat cor meum immaculatum, ut plùs amet & honoret te apud omnes, quàm ulla creatura te possit inhonorare! Tu vitam tuam sinè macula inchoasti; ora pro me apud Filium tuum JESUM; ut ego meam sinè macula finiam. Hoc idem, &c. pag. 2.

9. DEC.

S. Syrus, Zelosius fidei prædicator pro veritatis testimonio mortuum

tuum excitavit, & cum Diabolo inimicitias gessit. Cave eum & vicinum habere, & amicum.

Ora pro me, ut nunquam vel leviter consentiam Diabolo, & operibus ejus; sed sicut in Baptismo abrenunciavi, ita ejus sim inimicus usque ad mortem. Hoc idem, &c. pag. 2.

10. DEC.

S. Eulalia duodennis, Angelis comitata, Judicem impietatis arguit; ei blandienti in faciem exspuit: flagris cæsa in igne obiit. A puella hac disce unum DEUM amare.

Propulsa è tepido pectore meo pigrum & semi-volens-nolens Cor: & impetra mihi cor amore DEI constanter ardens; ne in decretoria æternitatis hora è DEO evomar. Hoc idem, &c. pag. 2.

11. DEC.

S. Daniel, annos 29. in columna stans,

stans, pio supercilio terrena omnia despexit; ut conversatio ejus verè fuerit in cœlis. Ubi tua est? Væ tibi in terra!

Ora pro me, ut constanter stema in amore & timore DEI, ne cadam: ut sic stantem mors sancta inveniat, & deponat in sinu JESU mei. Hoc idem, &c. pag. 2,

12. DEC.

S. Spiridion ex opilione Episc. factus, pauperes pavit: cùm opes deficerent, ad ejus preces DEUS serpentem in aurum mutavit. Vide, quàm DEO sit grata misericordia!

Impetra à Patre misericordiarum & misericordiæ Matre pro me in agone meo æternam misericordiam; ut me morientem ponat inter æternùm viventes. Hoc idem, &c. pag. 2.

13. DEC.

S. Lucia accepto ad D. Agathæ tumbam nuncio de morte pro
Chri-

Christo obeunda, cum matris venia omnia sua pauperibus distribuit: quare in igne gladio necata. Nullibi opes profunt, quam in manibus pauperum.

Per illos tuosignes, oro, impetra mihi, ut non ponam fiduciam meam in opibus terrenis, sed lætus illas expendam: ut pro illis in morte recipiam divitias coelestes. Hoc idem &c. pag. 2.

14. DEC.

S. Nicasius Ep. Rhemensis, irruente Attilâ, ut Pastorem decet, hosti obviavit, ostenditque gregi: quomodo pro peccatis & DEO deberent cadere. Brevi morte æternam redimere, prudentis est.

Ora pro me, ne iram DEI & hostes in me peccatis meis armem, sed pœnitentiâ placem; ut moriens talis inveniar, qualibus felix æternitas promissa est. Hoc idem, &c. pag. 2.

15. DEC.

15. DEC.

S. Ancilla apud Ibêros serviens, divino obsequio se totam tamen impendit; unde Reginæ sanitatem, Regi fidem, & libertatem contulit. Ubique DEO servire potes, si velis.

Ora pro me, ut anima mea impigrè serviat JESU & MARIÆ in vita; ut etiam in morte sit in manibus JESU & MARIÆ. Hoc idem, &c. pag. 2.

16. DEC.

SSS. Ananias, Azarias, Misaël propter DEI cultum in fornacem Babylonicam missi, DEO benedixerunt. Hoc fidelis amici est.

Orate pro me, ut semper mori malim, quàm DEUM offendere, & in adversis æquè ac prosperis DEO benedicam, ne mittar in fornacem æternitatis damnatorum. Hoc idem, &c. pag. 2.

17. DEC.

S. Lazarus Christo tam fidelis fuit,

fuit, ut ab ipsomet Amicus diceretur. A Judæis propter Christum præter alia exilium passus. Utrum melius, Christi an mundi amicum esse? elige.

Veni ad me, & unà cum SS. Sororibus tuis juva; ut in vita, morte & Judicio inveniar amicus JESU. Hoc idem, &c. pag. 2.

18. DEC.

S. Modestus à cohæredibus suis in Ægyptum venditus: Jerosolymis deinde Patriarcha factus, venditoribus suis benefecit. Disce diligere inimicos.

Impetra mihi, ut illud Christi præceptum: diligite inimicos vestros, animo altè imbibã, & opere exequar; ut in morte mea etiam me diligat JESUS. Hoc idè, &c. p. 2.

19. DEC.

S. Megengor Comes & Dux militum, occiso in bello Bohemico filio, mortem & æternitatem meditando,

L

tando,

tando, se ad mortem paravit. Te mortalem credis? & ad mortem non paras?

Ora pro me, ut seria & frequens mortis & æternitatis memoria me doceat bene vivere; &, quod maximi refert, bene mori, à quo pendet æternitas. Hoc idé, &c. pag. 2.

20. DEC.

SS. Ammon & Socij militem ter-
ritum, & in fide labantem animâ-
runt: unde ad supplicium rapti gau-
dentes, quòd Cœli civem servâs-
sent. Væ illis, qui perdunt!

Adeste mihi tum in peccandi oc-
casionibus, tum in agône ultimo,
& labantem omni ope excitate; ut
me DEO servetis, & in beatam æ-
ternitatem ducatis. Hoc idem, &c.
pag. 2.

21. DEC.

S. Thomas primus Indiarum
Apost. incredulus priùs, sed vulne-
ribus & latere Christi palpatis ac-
census,

census, ut pro eo sagittis & hastâ confixus sit. Finis coronat opus.

Obtestor te per amabile cor JESU, impetra mihi, ut vitam beneficiniam; & quæ nunc credo de gloria æterna, illic lætus videam & experiar. Hoc idem, &c. pag. 2.

22. DEC.

S. Anastasia cum alijs navi perforatæ propter Christum imposita, S. Theodorâ velificante portum tenuit: ubi palo alligata exusta est. Cœlum suis non deest.

Adjuva me precibus tuis, & veni in auxilium mihi, ne mala navi navigem, néve naufragium patiar in immenso æternitatis mari. Hoc idem, &c. pag. 2.

23. DEC.

S. Servulus paralyticus, inter dolores psallendo, DEO gratias agendo, & lectione sacra, & suam stipem pauperibus largiendo, ad bonam mortem se parabat. Tu fac similiter.

Effice apud DEUM, ut omnes mei dolores ad mortem bonam me præparent; ut nimirum eos libenter patiar, quia D E O ita placet. Hoc idem, &c. pag. 2.

24. DEC.

SS. Adam & Eva primi peccatores quidem Cœlum perdiderunt: se & primi pœnitentes per Christi merita receperunt. Sequeris peccantes: sequere & pœnitentes.

Adesto mihi nepoti vestro, inter tot vitæ hujus pericula, & maximè in ultimo agône; ne me vaferimus serpens superet, & à Cœlo avertat. Hoc idem, &c. pag. 2.

25. DEC.

JESUS Christus Filius. DEI & Hominis, Verus DEUS-Homo, hodie ex MARIA V. natus Bethlehemi, mundi Salvator, pannis involutus, reclinatus in præsepio. Nisi hîc amas, homo non es.

O DEUS in stabulo nascens, ut pro

pro me moriaris in Cruce! Primam gratiam peto à te parvule DEUS: ut morientem suscipias me, ut vivens & moriens, & postea æterno amplexu complectar te; ut Francisci tui lachrymis alloquar te, Ignatij tui silentio amem te, Catharinæ tuæ Senensis osculis desiderem te, Bernardi tui ore osculer te, Josephi tui æstimatione admirer te, MARIÆ dulcissimæ Matris tuæ corde hauriam te, omnibus Angelorum obsequijs demerear te, omnibus tuo & MARIÆ cordi devotis cordibus diligam te, & denique in ardentissimi amoris actu emoriar tuus. Hoc idem, &c. pag. 2.

26. DEC.

S. Stephanus Diaconus ab impijs Judæis lapidatus, primus pro Christo sanguinem fudit. Exemplo Christi, pro lapidantibus se oravit. Disce: non supra hominem est, inimicis ignoscere.

S. Stephane Protomartyr impe-
tra mihi, ut exemplo tuo omnia
odia in dulci DEI amore absorbeã:
ut anima mea in morte cœlos aper-
tos & videat, & introëat. Hoc
idem, &c. pag. 2.

27. DEC.

S. Joannes, Discipulus, quem di-
ligebat JESUS, quique sub Cruce
MARIAM accepit in sua. Nihil aliud
usque ad mortem suos est adhorta-
tus, quàm: Filioli diligite alteru-
trum. O hanc unam lectionem be-
ne discam!

Ora pro me, ut ex hac hora MA-
RIAM accipiam in cor, animum,
cogitationes, verba & opera mea;
& illi de me moriente dicat JESUS:
Ecce Filius tuus, & illa tunc me re-
cipiat in sua, & Filij æterna taberna-
cula. Hoc idem, &c. pag. 2.

28. DEC.

SS. Innocentes ab Herode, ut sic
simul Christum, quem Magi quæ-
rebant,

rebant, tolleret, occisi sunt in Bethlehem Judæ. Quanta furia, ambitio! & tu eam foveas.

Adeste mihi morienti, & me cingite, S. Legio tot millium Innocentum; ut nihil possit contra me in illa hora inimicus, sed per vos DEO sistar immaculatus. Hoc idem, &c. pag. 2.

29. DEC.

S. Thomas Archiepisc. Cantuar. pro Ecclesia exilium & mortem passus: ut suis caveret, hostibus obviam ivit. Suis è feretro benedixit, & Regi pœnitens cor impetravit. Qui verè amat, in finem amat.

Benedic etiam è Cœlo mihi, per mortem abeunti in tumulum, & impetra mihi cor pœnitens; ut ad palmam possim æternam aspirare. Hoc idem, pag. 2.

30. DEC.

S. Philæterus Adol. ob formæ

decus multum hominibus, ob virtutem Superis plurimum amabilis, maluit per tormenta formam, quam fidem relinquere. Hæc pulcheritudo vera est; altera vana.

Impetra Animæ meæ virtutis pulcheritudinem, quâ DEO placeam; ut in amabili pulcheritudinis fonte DEUM æternum contempler. Hoc idem, &c. pag. 2.

31. DEC.

S. Sylvester Papa Constantinum, monitu SS. Petri & Pauli accersitus, baptizavit, & lepram ejus extinxit. Peccati leprâ vis liberari? lachrymis baptizare.

Extingue in me omne id, quod exitio esse animæ meæ potest; & aufer à me, quidquid oculis DEI displicere potest.

Hodie annum, mi DEUS, hunc finio, dum multi per orbem finiunt vitam: da mihi felicem diem & horam ultimam ultimi anni vitæ meæ.

meæ. Doleo de omnibus, quæ hoc anno & aliàs commisi, malis; & quæ ullus commisit: gratias ago de omnibus, quæ à te hoc anno, & aliàs accepi bonis; & quæ accepit ullus: gaudeo de omnibus, quibus hoc anno à coelo & terra cultus es honoribus: & per omnium Sancto- rum, quos hic annus coelo trans- scripsit, intercessionem supplex peto felicem exitum ex his annis momentaneis, & felicem ingres- sum ad immortalem æternitatem, in qua JESUM & MARIAM cum omnibus Angelis, & Sanctis æter- num amem & laudem. Hoc idem, &c. pag. 2.





FESTA MOBILIA.

*Ad Sanctum tui Nominis, quo die
occurrit, vel semel in mense.*

S. N. Cujus patroncinio & nomine
jam ab ipsa hora Baptisimi me
DEUS munivit, respice ex illa æter-
næ securitatis Urbe me hîc inter
quotidiana æternum pereundi pe-
ricula exulem, & juva: ut felicem
hujus Nominis Catalogum nomi-
ne meo augeam in libro vitæ. Tol-
le à me, quod me impedit, & im-
petra id, quod mihi magis expedit
ad salutem: nec me desere, usque
dum unà tecum coràm DEUM vi-
deam & amem in æternum.

FERIA IV. CINERUM.

A Drêpo cinere aspersus ad te,
cùm sim pulvis & cinis, DEUS
meus, qui tuum altare olim cinere
mundare jussisti. Da mihi felicitum
& infeliciû cinerum sapienter me-
mi-

minisse; ut à cineribus damnatorum discam te timere; cineres verò Sanctorum ignem amoris tui in me custodiant. Munda cor meum, velut tuum altare, veræ poenitentiae cinere, & accipe omnia mea jejunia: quæ cum jejunijs JESU, MARIÆ, & omnium SS. conjungo, ut tibi placeant: & me mensæ tuæ cœlestis post hanc vitam facias participem, qui verè poenitentibus pro cinere das coronam.

FERIA V. CŒNÆ DOMINI.

PROSTRATUS coram te, ad Judæ pedes prostrato, divinas tuas manus adoro & exosculor; meumque cor ad Apostolorum pedes à te lavandos abjicio: ut illud simul abluas, & Eucharistico tuo epulo deinde saties. O amabilissime JESU! Gratias tibi ago, pro infinito illo amore, quo in hoc SS. Sacramento te totum mihi cum corpore, & anima, carne & sanguine, Divinitate

tate & Humanitate dedisti. Da, ut vicissim me totum tibi reddam : & ut in fine vitæ meæ non nisi hoc Sacramento munitus, ingrediar viam æternitatis.

FERIA VI. PARASCEVES.

SAlve JESU Nazarene, Rex Judæorum ! Vesperis pedes lavans, orans, sanguinem sudans, capte, vincte : Nocte illa apud Annam & Caipham : Manè factò in aulis Pilati & Herodis accusate, percusse, illuse, flagellate, spinis coronate : horâ sextâ Crucifixe : per tres horas pendens, & sole obscurato Patrem, Matrem, Joannem, conversum latronem allocute : horâ nonâ voce magna clamans & expirans : serò de Cruce deposite ac sepulte ! Ecce horas omnes tuis cruciatibus mihi implevisti : tuæ sint ergò omnes & singulæ horæ meæ. Rogo te per illum amorem, quo me dilexisti usque in finem, da mihi gratiam
illam

illam efficacem, ut te omnibus horis vitæ meæ amem, nec amare prius desinam, quàm vivere.

DIE PASCHATIS.

Salve JESU, gloriosissime Victor mortis, à morte hodie resurgens! O vere Agne, qui abstulisti peccata mundi! aufer & mea: qui mortem nostram moriendo destruxisti, destrue & meam: qui vitam resurgendo reparasti, repara & meam. Regna in me: ne regnet in me peccatum; & da mihi, ut totus vivam tibi: mihi, Mundo, & Carni planè mortuus: ut ita hora mortis meæ sis felix Pascha, hoc est, transitus ad vitam in Urbe illa, per cujus vicos perpetuū cantabitur Alleluja.

DIE ASCENSIONIS.

ADoro te, Victoriose Triumphator JESU, qui ascendens hodie in altum, captivam ducis captivitatem: O! illam etiam captivitatem in triumpho tuo duc captivam, quæ
me

me captivum tenet, ne liberè te amem. Ideo flecto genua mea supplex, & rogo per admirabilem Ascensionem tuam, ut benedicas mihi in benedictionibus dulcedinis tuæ, & trahas me post te; ut sicut S. tuo Ignatio, ita & mihi sordeat terra, dum cœlum aspicio: ut te in hora mortis meæ sequar in cœlum.

DIE PENTECOSTES.

Veni, ô Amor DEUS! Veni Numen & Lumen! mitte ignem tuum in omnia ossa mea, & erudi me. Da linguas igneas, & doce me tacere & loqui: lava, riga, sana, flecte, fove, rege sordidum, aridũ, faucium, rigidum, frigidum; deviũ cor meum: & fac, ut DEUM suum verè amet. Da mihi amorem, ut exurat in me multitudinem peccatorum meorum, & me accendat; ut tibi in holocaustum nunc & in hora mortis meæ, & in æternum ardeam.

FESTO

FESTO SS. TRINITATIS.

Credo, spero, amo te, SS. Trinitas unus DEUS! offero tibi pro libello supplici omnia merita JESU, MARIÆ, omniumque SS. & rogo, ut tuis beneficijs bene utar semper; ut nunquam te offendam; ut semper faciam, quæ tibi placent; ut te sancto timore timeam, & perfecto amore amem, totâ vitâ meâ & in hora mortis meæ, usque dum te videam DEUS Trine, & te fruam, ô bonitas infinita! in æternum.

FESTO CORPORIS CHRISTI

Domine JESU, in hoc Amoris Sacramento abscondite, da ut hoc Sacramentum sit mihi amoris veri Gymnasium, qui me ipso me exutum faciat, ut per totam vitam, id quod tibi placet, quæram; tibi annuam, cum aliquid inspiras: mihi verò omnia negem, quæ dicitur amoris proprii instinctus. Fac ut amorem dolore acuam: dolore

cor-

256 FESTA MOBILIA:

cordis de tanta mea ingratitude,
dolore corporis, in illius odio amo-
re tui suscepto. Fac, ut quidquid
agam, agam instinctu amoris tui,
quo ad recipiendam in hoc Sacra-
mento tuam gratiam semper magis
idoneus reddar. Fac ut semper ad
hoc Sacramentum tuum sumen-
dum me præparem, quasi ultimò
& pro Viatico sumpturus: ut deni-
que sicut per illud futuræ gloriæ
nobis pignus dedisti, ita per illud
particeps fiam æternæ
gloriæ tuæ.



FESTA



F E S T A

SS. PATRONORUM
CARNIOLIÆ.

A P R I L I S.

23. APR.

S. Servulus, Nobili genere ortus,
 12. annos natus, Eremiticam
 vitam amplexus in antrum, quod
 hodie in Castro S. Servuli in-
 terioris Carnioliaë visitur, secessit.
 An. 282. Junilio Præsidente in vincu-
 la conjectus, cum idolis sacrificare
 renueret, equuleo tortus, aliisque
 cruciatibus affectus, tandem jugu-
 latus, Martyrij palmam obtinuit.
 Sic cadendo assurgitur ad gloriam.
 Impetra mihi, &c. vid. diem 11.
 Augusti. Hocidem, &c. pag. 2.

M

MAJUS

M A J U S.

29. MAIJ.

S. Maximus Ep. Æmonen. Carniolix fulgidum fidus, incolarum fidus Pastor, decus, & protector, quos deterfa veteris impietatis caligine, Evangelicæ veritatis lumine illustravit, sub Decij persecutio-
ne capite plexus, ad debitam apud superos zelosissimæ fortitudini suæ coronam evolavit. Quàm bene caput ponitur, ut sic coronetur. Impetra mihi illum perfectum amorem DEI, &c. vid. diem 11. Maij. Hoc idem, &c. pag. 2.

J U N I U S.

22. JUNIJ.

S. Achatius Martyr. Patronus primarius universæ Carniolix, cuius intercessione & patrocinio Ann.

1593. Turcæ ad Sisekum ingenti clade profligantur, & à finibus Patriæ, nè ultrò noceant, averuncantur. Inter tormenta invictus Athleta se ac Tyranno major, ne æternùm coelo moreretur vitam amisit. Nunquam victurus in gloria, si maluisset perfidus vivere, quàm occumbere fidelis. Ora ut vincam semper, &c. vid. diem 26. August. Hocidem, &c. pag. 2.

AUGUSTUS.

28. Aug.

S. Pelagius Civis Æmonensis Nobilibus & opulentis parentibus Pelosiâ, & Hilariâ ortus, Patronus ejusdem Civitatis, qui sub Nume- riano Imperatore & præside Evi- lasio in vincula conjectus, equuleo tortus, aliisque tormentis triduo cruciatus tandem gladio decola- tus. 25. Annos natus de Idolorum

260 FESTA SS. PATRON.

superstitione victor triumphavit
 An. 284. nec hoc trinum perfectum fuisset, nisi finis talis totum opus coronasset, adeò perseverantia omnis perfectionis complementum est. Impetra mihi gratiam &c. vid. diem 9. Septembris. Hoc idem &c. pag. 2.

S E P T E M B E R.

26. SEPT.

S. Nicephorus Episc. Petinen. admirandæ prorsus submissionis, charitatis, patientiæ, & mansuetudinis, nec non in pravorum reformatione morum pervigil pastor. Omnibus blandus, durus solus sibi rigidusque censor. Magni criminis per summum nefas accusati innocentiam cœlites rarò exemplò manifestârunt. Quantum à tui cura deficis, tantum Numinis de te crescit sollicitudo. Ora pro me viv.

vente, &c. vid. diem 19. August.
Hoc idem, &c. pag. 2.

O C T O B E R.

3. OCTOB.

S. Vitalis Martyr. Nobilis Romanus. Cujus sacrum corpus Labaci in Cathedrali Basilica colitur. Pietate sua contra Idola perseverantiâ contra Tyrannum Domitianum dimicavit, victor utriusque martyrij palma in cœlis corruscat. Disce hic pati, ut ibi quiescas. Assiste mihi, &c. vid. 15. Septembri. Hoc idem, &c. pag. 2.

5. OCTOB.

S. Peregrina V. Nobilis Romana 1660. huc translata in æde Divo Josepho sacra stabile sibi post fata fixit domicilium, ubi in vita corde & animo habitabat. Tyranni tum blandimenta tum sævitiam virili constantia elludens plumbatis cæsa virginitatis & martyrij laurea insignita

262 FESTA SS. PATRON.

signata occubuit, an non sponsa per omnia similis dilecto candido & rubicunda? En ego humilis corde &c. vid. diem 16. Julij. Hoc idem &c. pag. 2.

27. OCTOB.

S. Florius Episc. primitivæ Eccles. Amonen. Catholicæ fidei firmamentum Idolorum destructor, Evangelij præco: à teneris virtutibus deditus, totum vitæ cursum intemeratis moribus, DEIque timore commendatum egit. Mira suavitate & amabilitate sibi concreditum gregem demeruit, & indemnem inter turbines servavit. Ovis esto, si talem cupis habere pastorem. Excita in me, &c. vid. diem 14. Octobris. Hoc idem &c.

N O V E M B E R.

12. Nov.

SS. Januarij & Soc. Mart. quorum sacra lypsana in Ecclesia Divi Jacobi

Jacobi Soc. JESU hac die publicæ
 venerationi exponuntur. Posuêre
 hi pro fide animas, ut eas in vitam
 æternam invenirent, dum inter
 cruciatus invicti, non tam tormen-
 torum quàm amoris victimæ supe-
 rata Tyranni immanitate è mundo
 ad condignam fortitudini & chari-
 tati mercedem in cœlum evolâ-
 runt. Orate pro me &c. vid. diem
 9. Augusti. Hocidem &c. pag. 2.

Reliquorum SS. Patronorum
 festa, utpotè S. Nicolai Episc. Ca-
 thedralis Basilicæ Labacen., & S.
 Georgij Mart. Civitatis Labacen.
 Tutelarium, nec non SS. Herma-
 goræ, & Fortunati, à quibus uni-
 versa Patria, ab ipsis Ecclesiæ incu-
 nabilis orthodoxæ fidei lacte in-
 stillato fuit enutrita, suo
 loco congruo re-
 peries.

F I N I S.

CARNIOLA

Jacobi Soc. JESU hac die publice
venit ad exponendum Pontificis
in hoc loco scriptis, ut esse in vitam
etorem invenerit, dum inter-
tructus invicti, non tam tormen-
torum quam amoris victimas sube-
rata Tyranni immunitate & modo
ad condempnam fortitudinem
eius in hoc loco in certum
tunc. Quae prima die videtur
2 Augusti. Hoc idem die pag. 21

Religionem in hoc loco
fuit, quae in hoc loco
in hoc loco in hoc loco
Georgii Marti Christiani
Tolerantiam, nec non in hoc loco
gore, & hoc loco in hoc loco
vita, quae in hoc loco
natura, quae in hoc loco
libero in hoc loco
loco, quae in hoc loco

P. I. N. I. A.

